



Z121.5

11

:106

貞一齋詩文稿



江蘇古籍出版社





四庫未收書提要

擘經室外集卷五

貞一齋詩文彙二卷提要

元朱思本撰思本字本初豫章臨川人常學道于龍虎山中貞一其號云顧嗣立元詩四集稱思本嘗從吳全節居都下博洽文雅見稱於時所著詩文稿世無刻本僅存范梈劉有慶歐陽應丙虞集柳貫及全節六序俱諸人手書藏吳中劉損抑夫家此本乃叢書堂吳寬手鈔凡二卷上卷為雜著文下卷則古近各體詩思本好學遠遊遍歷名山大川幾半天下嘗以昔人所刻禹迹圖混一六合郡邑圖皆有乖謬乃

叅閱郡縣九域一統等志攷訂古今校量遠近成輿
地圖一書計里開方之法至思本而始備今文稿內
有輿地圖自序一篇可証也大約思本之學地理為
長也



貞一稿序

夫為大而無當往而忘反之言者必世所謂山林枯槁果於違人之士豈非以其志與若仁義之本風化之原論說必歸儒者而稽之章逢家或反謬是夫士也乃氣必充辭必端馳騁上下橫從今古無不極而約之無踰乎禮其志若是惡可以山林之果者蔽之耶余得上清朱君本初貞一稿讀之未嘗不掩卷而三嘆息也余與朱君游知其文學舊矣來南州君主玉隆別館去年冬行縣田有烏山小兵馳田間得君

寄詩二章蓋六朝庾鮑而唐太白之流也今夏君自西山來示余此稿槩篇百數而槩度若一其武當山賦與巢湖等詩論在詞澹尤吾所謂馳騁橫從而無所踰者其大而不夸徃而知所至與雅頌廢風氣降數十年來鄉之事進取伎者一趨於詩人愈多而詩愈少非詩少也徵諸本原則微矣江西號多文邦湏在都與同列論是邦人咸獨推某某今又得君君故臨川人也顧又蔽於是山林者又惡足以蔽君使無知者亦云然耳茲所以資吾掩卷之歎而尚悲其

志也世之觀人者徃徃循名遠實靡然成風將使天下負無士之累於後世其病類如是凡不可而衆說可與而失之者豈特如本初之文而已君論著外此若詩所稱輿地圖書者尚多謹先歸此稿俟休告叩雲谷相與并論之至治三年八月朔臨江范梈序

貞一彙叙

為蒙體禦寇之學者超然脫離塵滓恢廓胸臆欲與天地無際其智豈不能知踐平實遵槩度之為中若是者蓋亦激於卑陋沒溺之累而不自知其為賢知

之過也有人焉得其清虛廣大者而寄跡焉以行吾
平實槩度之素則其於道何如哉吾友朱公本初故
禮義家厭世溷濁霞裾星弁訪歷名山大川與太初
溟滓游於無窮而嗜聖經史傳諸子百家若飢渴然
入與元德大宗師留輦轂下交當世偉人魁士聞見
滋博暨主教玉隆余來江右始獲盡窺其稿名貞一
者如泉涌石竇日挹日新如雲幻晴峯愈變愈麗比
興序論粹乎儒者昔人言天上無凡俗神仙世無仙
則已有則必通古今盡心性如吾聖賢聖賢不作仙

亦未之見豈人心沈溺不獨吾遊方之內為然耶自
鴻儒代作統緒復振孔氏之道昭若發矇矣本初一
榻林下內境虛曠中夕夢回松月在窓夜氣聞然全
體豁露于斯有得則顧是區區者又將有不屑焉者
矣余安得從君抵掌跋燭根極指歸以會貞一之傳
芻狗陳言相視一笑至治第三禩倉龍癸亥中秋友
人眉山劉有慶志善父謹叙

朱鍊師文集序

勤者為學之本也士而或怠能有進焉者否也曩遊

京師獲識本初朱鍊師於環樞堂下讀其詩則排體
五言學工部長句與文則馳驟老坡間時本初已四
十餘以道法承應中朝日不暇給然省其私稍有餘
力則卷不釋手夜讀由乙至丙以為常吾固知其必
將有進也久之文進於韓復進於選迄今十有餘年
其所進方未已也吁勤矣經生曲士自少至老役役
事窠臼語言或者不知蘓為何文杜為何詩者有矣
况老氏學者歟况韓與選歟壯得志而自畫者有矣
况四十五十歟本初大父以科舉仕宋至淮陰宰抑

其家學有所從歟環樞尊師以清靜佐化理文采動
公卿若漢蓋公唐吳筠者本初出入贊襄其間而有
所講益歟不然顧其所學之勤之進歲異而月不同
者又何歟後之為學思有進者展讀茲卷知所勉矣
雖然猶有望也伯陽君曰上士聞道子貢亦謂不可
聞者夫子之言性與天道愚故於此猶望其終進於
道文章云乎哉本初名思本朱姓臨川人學道龍虎
山中貞一其號云至治癸亥十月甲子臨江歐陽應
丙書

貞一稿序

集與朱君本初相從於京師廿有餘年矣每見其酬應之暇即自洗滌以讀書為事其書既不汎雜讀之又有其道集甚敬焉至於臧方之學尤所偏善遇輜軒遠至輒抽簡載管累譯而問焉山川險要道逕遠近城邑沿革人物土產風俗必叅伍詢詰會同其實雖靡金帛費時日不厭也不憚其心不止其治事也討論如議禮嚴分若持憲立志之堅確精敏類如此施之功業必不苟且循習而已然既從事道家之學

不屑於世用乃折而托之文章宜其過人之遠哉嘗以所著貞一稿示予俾題其端予讀而歎之曰善哉慎所當言而不鼓浮夸以為精神也言當於事不為詭異以駭觀聽也事達其情不托褻溢以為奇古也情歸乎正不肆流蕩以失本原也若是者固足以名家也乎集嘗聞為老子之說者曰欲靜而不躁也重而不輕也容而不苛也畏而不肆也紓而不蹙也貴而不蕩也迫而後動不先事以為必審而後言不隨物以成妄若是者豈止於為文而已乎本初蓋得之

矣而集以為言誠知而不能者也本初尚有廣予者
乎觀其書者試以集言求之泰定二年四月八日承
德郎國子司業蜀郡虞集伯生甫書

貞一稿序

吾嘗怪夫言出於聖賢者謂之經出於諸子百家者
謂之書均是言也經與書何為而別乎道有隆汙言
有精粗非人之所能為也經書之分故判然若天之
尊地之卑高下之位確乎其不可以相踰也秦漢諸
人刻意詞章以專門名家樂毅李斯屈原司馬遷班

固楊雄之流號稱獨步雖然以擬諸經可得乎臨川
朱本初儒家子也為黃冠與予同道居龍虎與予同
山處京師與予同 朝雅志詩文與予同好予長於
本初四歲則其年之相若也予自四十來言語詞章
漸刊落而無為非無為也吾聞諸教父曰為道日損
損之又損以至於無為無為而無不為矣今觀本初
示予貞一齋稿其文皆四十後作而用志方銳也用
志銳則學日益矣損與益二者又不可同日語焉或
者曰本初其亦良賈之深藏者歟方其處山林也則

以損及升於朝也則以益蓋山林以道相高而朝廷以才學相雄長本初又不得不資益之道以自混其處焉亦孔子齊人之獵較也若是者又豈吾之所望於本初乎孔子曰行有餘力則以學文是則本初之志哉不然予與本初又何以為居同山處同朝身同道而志同好也惟其同故本初之文欲徵予言而為之序為之序而不言其所以同者又豈本初之所望於予哉予故曰道有隆汙言有精粗非人之所能為也若是者本初其將有同見歟抑將不歟是書

為貞一齋文稿敘泰定四年歲在丁卯四月八日丙子元教大宗師吳全節書

貞一藁序

言行之在人動之形也惟其動而不離乎正則有言焉而為文辭有行焉而為德行動為之用靜為之體也然其所以歷萬變而常存者以其貞於一而已耳非夫樂天趨時而純體乎易道之淵微者則動於言而言為詭辭動於行而行為怪行或不免焉矣老氏之學蓋原於易然而疏之為莊周列禦寇庚桑楚計

然尹文子之流其刻意尚行有不待言而至於動為
文辭又皆離去垢濁而適乎清虛疊疊然斐斐然進
於易之幾神所謂貞於一云者真足以括天下之動
而無違其與觀乎天文人文者固有合哉臨川朱君
本初是嘗寄跡老子法中所謂遊方之外者也居京
師多從公卿大夫遊比年奉將使指代祀名山車轍
馬迹半天下矣每情與景會轍形之篇什有風人咏
歎之思而無山林愁悴之音南歸專席玉隆因即其
齋居之名而題其彙次之編曰貞一稿懿夫體易之

言予嘗讀易而知動之為動蓋風行水上其卦曰渙
渙者天下之至文也因其有行而文始生焉非其動
之所形能致然乎故水之靜者為淵而動者為波凡
其大波之浩渺小波之瀾汭者風觸之耳而水固不
知也不知故一一故能貞然則君之所以貞夫一者
雖形之於動而實未嘗不本於靜也予非知詩者而
知君體易之意深矣迺為之評曰君之詩似吳宗元
元丹邱而遠遊之跡過之君之自得似葛稚川司馬
子微而頤神坐忘之妙需其至焉返之於靜以知終

終之此顯道神德之能事而貞一之極功也予之視
君其猶龍乎何可及哉何可及哉東陽柳貫道傳父
序實天歷紀元之歲十又一月之丁酉也

貞一稿序終

貞一齋文

臨川朱思本本初父

武當山賦有序

僕以大德癸卯至大己酉一再遊武當其山
水之勝仙靈之迹聞見雖習而賦詠莫傳往
來于懷益增茲歎蓋懶與拙并無以發其興
境與神會斯能屬其辭理則然也延祐四年
春夏之交由梅溪趨五龍過南巖登大頂下
元聖宮經福地橋出九度澗宿留久之周覽

卷二

11

晚狡獪之蹲踞叻哈呀兮欲噬翮聯翮兮未舉變怪
百出瑰詭萬狀應接不暇心目惝恍乃經北麓陟卷
阿振衣兮先登乘風兮浩歌俯梅溪之清駛瞻五龍
之差我長松鬱以交錯巨石憂其磊砢既冒險以徐
行亦逢夷而屢憩羨麋鹿之優游喜獐獠之懷利羗
吾行之蹇拙眩嵌石而驚悸彼荷篠之丈人何乘危
而掉臂爾其出幽谷臨飛橋簫風磴凌山椒豁蒙蔽
空泐寥驅屏翳乘招搖山靈肅以前驅雨師紛而清
道振鼓鐘之鏗鉤耀旌幡之紛倒朱門豁兮洞啟金

碧輝其相冒厥有至靈尊臨大庭鎮北配水虛危之
精披蒼髮兮儼服隱元旄兮翠於龜蛇盤蛇以著垂
風霆揮霍以流形仁存不殺功極扞禦時暘而暘曰
雨而雨忠者致於君王孝者盡於父母斯作休於邦
家亶聰明曰元武元為天之正色武有止戈之文三
月三日為神降生於赫

元后同符茲辰爰封香幣歲致明禋開

聖壽於無疆與茲山而匹倫播元風於廣宇溥嘉惠
於生民紀盛事於穹碑有吳君之所云若乃循山而

東窮極荒遠探黑虎之幽岩逐青羊之芳磻紛藤蘿
於木杪強躋攀於分寸類太白之危途殊王陽之峻
坂歌竹枝之到退甚木皮之流汗陰木蔽日元蟬噪
風名花異石錯落其中珍禽奇草時躍時從方瞳綠
毛白叟黃童餐霞之侶采藥之翁亦徃徃而相逢何
南巖之奇詭隱靈蹤之烜赫聳曾樓之十二列威神
之五百岩崖炳其相輝丹青黥以無色下臨不測之
淵上有試心之石歛冉冉兮上征撫曾臺之遺迹敞
洞府之幽深閤雷聲之淵默鬼怪潛藏陰陽著靈紫

霄展旗三公九卿金鎖獅子疊字大明綵以崇墉簇
以畫屏晝則祥雲隱空天風流鈴萬籟並作宮商和
鳴夜則素月交暎天燈熒熒迸若飛電飄如流星亦
時顯而時冥爾其衆峯之尊粵有大頂中啟洞天迥
絕塵境皇厓極風羣帝所領下包渾淪上徹溟滓轉
岩隈而仰視極霄漢以彌高梯絕壁之峻嶒凜方壺
之巨鰲抱琪樹以返顧淙赴壑之驚濤恨羽翰之無
從約飛仙以遊遨歷天門之九重乃平平而蕩蕩諒
無階而不升砥瑤壇之尋丈俯烟巒之萬疊競奔騰

而趨向擢金莖與玉筍盡殊形而異狀謂天蓋高於
茲逼焉有仙則名於茲息焉於是徙倚徬徨俯仰周
旋感雲輶之來下冷風馭之翩翩授以長生之訣畀
以青瑤之編慨塵緣之未息乃稽首而言還遵彼迤
途載行載止飛泉冷泠蘋蘋草靡靡飄飄兮襟裾逶迤
兮列施曾晝景之未移已屆乎南山之趾徒觀其希
夷故隱丹竈苔封標名福地樓殿玲瓏寶奎文之璀
璨表元聖之新宮蓄泓泓之明鏡卧沉沉之雄虹澗
曲折兮九度雲晦曖兮千重若乃異人之所廬神物

之攸處裂石室之髓垂瑤珠之露風雷之變化山君
之呵護蓋未得窮探而悉舉也高情渺然蒼山相摩
呼吸之氣想通帝座遡風援筆而為武當之歌歌曰
蓬瀛雖異遼海隔兮崑崙雖大邈西極兮未若茲山
峙中國兮斂福錫民昭 聖德兮繫神之都於皇赫
兮祚我 皇元千萬億兮

登武當大頂記

延祐丁巳四月壬寅蚤作自武當山真慶宮登大頂
初穿林莽尋微逕可五里所碎石磽确壤水從衡逕

漸湮蕪乍升乍降萬木交錯葉或大如箕或小如蒙
茸或直上數十百尺或樛櫨扶踈皆昔所未見質諸
野人亦莫能盡名也復多花蛇土蝮聞人聲輒趨避
惟山蛭尤病人藏敗葉沙土中着屨即蟻蝨而上初
如毛髮既飲人血彭亨徑寸長倍之故行者每數步
必自視其足見亟抉去否則流毒為瘡痂非旬月可
瘳蓋山蛭多噉巨蛇鱗甲中螫人非水蛭比也又七
里所緣青壁攀藤蔓而匍匐登返顧嵌巖幽深草木
蔥蒨惟聞水聲淙淙莫能窺其底也咳唾笑語山谷

響應怪禽飛翔大如雞鶩小如雀鷁光采絢爛鳴聲
清越非所嘗聞強以其聲之似人言者名之則有不
空中空尤為異焉靈草敷榮多黃精芎藭草烏大黃
之屬又七里所至下天門峭壁如削薜竹繫其顛縋
而下約可六丈餘側足石磴間援竹而上始也懼而
顛中也勇而奮既至也則恬而嬉天門砥平可尋丈
兩石對立上合而中通謂之門亦宜至此山蛭虺
皆無所見矣山誌云是為太安皇屋顯定極風二天
帝所治復上五里所為三天門其勢視下天門差平

夷而從廣倍之喬松怪石天風冷然長蘿卷舒芬芳
襲人過此以往無復甚峻亦繚繞百轉又數里乃至
絕頂礮石為方壇東西三十有六尺南北半之中冶
銅為殿凡棟梁牕戶靡不脩方廣七尺五寸高亦如
之內奉銅像九中為元武左右為神父母又左右為
二天帝侍衛者四前設銅缸一銅爐二缸可盛油一
斛燃燈長明爐一置殿內一置壇前四望豁然漢水
環均州若衣帶其餘數百里間山川城郭皆髣髴可
辨俯視羣山盡鱗比在山足千態萬狀如赴如挹如

聽命待役焉者天宇晃朗風景凌厲或云率以五鼓東望日出尤為奇觀則又知非徒泰山天壇衡嶽之為然惜怯露宿未暇驗其說也盤桓久之乃逡巡而返至真慶午陰微轉大率為里僅三十而真慶下至分道口平地又二十有五里云

故榮祿大夫大司徒饒國吳公誄

延祐六年夏五月二日丙辰榮祿大夫大司徒饒國吳公薨嗚呼哀哉哲人云亡民將疇依悠悠蒼天胡不憇遺嗚呼哀哉生必有死此理之常五福既備令

名孔彰先民所稱死而不亡行由謚顯德以誄揚爰
託旒旗庸寫憂傷其辭曰

伊昔太伯至德作吳綿綿洪緒實基厥初猗歟番令
美化宏敷漢祖錫封長沙是徂廟食于番世遠益崇
昭穆繁昌令聞攸同自公二祖積行在躬養潛樂幽
食報宜豐逮公顯考奕葉彌芳持平閭里言不否藏
宜顯而隱孰云不揚篤生我公乃熾乃昌岐嶷其姿
貞固其操學探淵源理窮旨奧溫兮如春時雨斯膏
肅如秋霜匪怒伊教禮賢下士汲汲孜孜揚善掩惡

遐邇寔師仁親為寶勞謙自持不矜於人無競惟時
年踰不惑喪亂式逢東西震驚大小哀恫不恒厥居
視天夢夢屹然自守亦惟我公自守伊何潭潭公府
義以為門仁以為宇莫之或欺孰予敢侮天道無親
善人是與惟公仲子實掌元門善服明訓有德有言
奉祠桂館慶會風雲於赫四朝恩數駢繁位以貞人
表以元德永言孝思嵩高維則間歲歸省莫匪帝力
疇昔之歲公及希年 錫命元德束帛戔戔侑以上
尊乘傳言還僉曰休哉公則慊然碩德升聞誕膺

明制玉堂虛席以企以俟 武廟龍飛益隆孝治擢
拜司徒位亞三事即家開國瑞慶大來公與夫人寵
命寔偕上及顯考爵同秩異葉茂根榮流長源邃延
祐之初公壽八旬故若稽故典惟帝時遵 帝曰俞
哉申錫惟均明明元德載馳載驅式燕以衍承顏悅
愉名動中朝榮耀鄉閭桂襲其芳蘭森其玉簪笏滿
堂雍雍穆穆五福攸敘惟公備足永錫難老齊老逾
難公與夫人攸處安安天爵斯崇如陵如山曰惟晚
香堂匪虛構鄉以祿名惟天所授里曰具慶地同恩

厚嗟嗟松柏歲寒彌貞仁者必壽宜享百齡如何寢
疾遽夢奠楹嗚呼哀哉木落山頽天降時喪悲風興
感零露方灑走獸狂顧飛鳥失翔嗚呼哀哉昔公之
存邦人寔依如彼河山以潤以輝如彼鸞鳳是則是
儀今公往矣云胡不悲嗚呼哀哉嗟嗟諸子痛哉奈
何元德純孝淚如懸河五內崩摧孰知其他燕吳萬
里長路漫漫欲濟無梁奮飛無翰擗踊哀號靡有夜
旦帝閔其哀驛傳斯卑乃命奉常易言定謚慰彼
孝心以勗有位僕之於公東西其州生髮未燥景行

前修少長學道息影丹邱乃遇元德雲滄龍游拜公
於堂職由師故溫溫其言循循其度佩公之訓感公
之遇云何六年俛仰今古堂堂遺像目想心存琅琅
德音胡可再聞不弔昊天殞鳳摧麟嗚呼哀哉日月
遄邁靈輒既遷翩翩丹旒於彼山田素驥悲鳴黯若
新阡嗚呼哀哉嗟予小子承諱驚惻目短淒風魂飛
涼月百身莫贖寸心如割矢辭告哀永慕增怛嗚呼
哀哉

輿地圖自序

予幼讀書知九州山川及觀史司馬氏周游天下慨然慕馬後登會稽泛洞庭縱游荆襄流覽淮泗歷韓魏齊魯之郊結輒燕趙而京都實在焉繇是奉

天子命祠嵩高南至於桐栢又南至於祝融至於海徃徃訊遺黎尋故迹考郡邑之因革覈山河之名實驗諸滏陽安陸石刻禹迹圖樵川混一六合郡邑圖乃知前人所作殊為乖繆思構為圖以正之閱魏酈道元註水經唐通典元和郡縣志宋元豐九域志皇天一統志叅考古今量校遠近既得其說而未敢

自是也 中朝夫士使于四方冠蓋相望則每喁以
質諸藩府博采羣言隨地為圖乃合而為一自至大
辛亥迄延祐庚申而功始成其間河山繡錯城連徑
屬旁通正出布置曲折靡不精到至若漲海之東南
沙漠之西北諸番異域雖朝貢時至而遼絕罕稽言
之者既不能詳詳者又未必可信故於斯類姑用闕
如嗟夫予自總角志於四方及今二毛討論殆遍茲
其平生之志而十年之力也後之覽者庶知其非苟
云

北海釋

四海其東與南者密邇中國人得以耳目接也西海雖遠在數萬里外而驛使賈胡時或至焉惟北海不聞所在孟子云伯夷辟紂居北海之濱是則指古之孤竹秦漢之遼西今之永平而言實東海也今考夫大磧以北金山之東水皆北流赴大澤中大澤綿亘萬里蛇龍居之蒲葦生焉舟車不通故莫有絕澤而北者然則大澤之外海之遠近不可知已金山之西水皆西流經諸藩絕域咸會於西海云

和寧釋

和寧即哈刺木林乃 聖武始都之地今嶺北行中書省治所常以勲舊重臣為之外則諸王星布綦列於以藩屏朔方控制西域實一巨鎮云

八番釋

八番宣慰司都元帥府治順元統八番安撫司番各有府州軍名復有順元宣撫統蠻夷部落長官十數處播州宣撫統黃平府思州宣撫統鎮遠府又各有部落長官萬蠻都雲永順南丹安撫金筑府又各有

所統州縣部落長官無慮數十百處皆溪洞險阻地
窄而名猥多茲得以畧

兩江釋

邑州之西曰左右兩江北接八番西抵雲南南距交
趾地方千里列田州來安鎮安思明太平路軍民總
管府分統州五十餘縣二十餘絕長補短州不能百
里或一二十里皆溪洞險阻非有城池兵甲又非有
貢賦之益徭役之奉也地窄而名猥多茲得以畧

雷說

雷之興隆隆焉其甚也轟轟焉號號焉其震於物也
奄焉以滅靡焉以碎不疾而速不見而彰其為神也
審矣世之言震於人者則曰是為惡者惡稔帝怒故
使震之予曰不然今夫牛馬畜獸蠢然無知或震焉
是不必為惡而後震也或曰此釋氏所謂輪迴果報
者昔嘗為人惡未罰今其形獸也心固人也故震之
予曰是大不然今夫木石偃然無情或震焉又豈為
惡輪迴者耶人之生百行莫先於忠孝世之不忠其
君不孝其親滔滔者皆是曾不斯震顧乃及無知之

畜獸無情之木石耶是必不然也然則其震於物者
果何為者耶予曰雷者陰陽之氣磅礴奮激固天地
之怒氣也惟人與獸或感惡氣以生復丁是氣震以
滅矣木石則適遭其逢耳作雷說

擇交銘

蛇毒有形觸之斯至鴆毒有名飲之斯斃弗觸弗飲
雖毒莫致人而不仁甚於茲類輕言托交蘊毒孔熾
妒婦是媒狡童是肆我心坦兮寧不斯畏戒之戒之
書紳以識

故保和通妙宗正真人徐公行述

公姓徐氏諱懋昭字德明世為饒之餘干州社林里人曾祖某祖某父某俱以儒名家積善所鍾至公而顯公生於宋淳祐庚子總角就學通經旨知古今事即喜讀道書訓以舉子業則曰是假聖人之言為干祿之舉非吾事也弱冠父命之娶輒不樂或數日不食乃從其志為老氏學今贈通真觀妙元應真人松隱張公時管轄信之龍虎山上清宮道愈著聞遂俾公從之游松隱公見公風骨不凡即命師今開府儀

同三司輔成贊化保運元教大宗師特進上卿志道宏教沖元仁靖大真人知集賢院事領諸路道教事張公數年學成著道士服寔宋之咸淳戊辰也既而遊衡廬名山遇真人授異書能役鬼神致雷雨祭星斗弭災疹所至人迎候之唯恐不及宋故相古心江公碧梧馬公尚書東澗湯公皆以道學名世少所許與公出入其門獨加禮異時人榮之至元丙子開府公從三十六代天師應詔入覲明年天師還山開府公留侍闕下又明年公遠來省侍留二歲亟請

歸且曰以清靜無為之道佐 聖天子致太平某不
如師棲遲林壑笑傲煙霞師當無以奪某志遂翩然
而返綸巾葛屨上下仙巖山水間搜奇抉勝將構別
館為報上計久之得仙源馮氏宅撤舊而新是圖越
□年落成棟宇翬飛金碧輝映象設精嚴鼓鐘森列
視龍虎諸別館為傑出名之曰仙源觀居無何又得
故里張氏宅易為觀亦如之名之曰神翁大殿之東
廡為祠堂歲時享祀其先世示不忘本也又以符水
濟人獲報禮則為觀置恒產積穀至數千萬斛人或

誚之恬不以為意值歲薦飢饒信之民無所得食公則出穀貸人或值以遺之全活者無慮數百千計未幾仙源神翁俱被璽書庇衛公乃分命其徒主之徃來徜徉其間以開府公所授宗旨覺悟後進參以儒術品節之故其徒皆穎異秀發卓為道門師範大德壬寅制授提點常州通真觀事錫號保和通妙崇正法師公陞坐演法常之人爭先快覩聞所未聞觀恒產不腆公均節委積權其贏為構玉皇閣皆前所未有也皇慶改元制加保和通妙崇正真人仍

主通真觀公拜命喟然歎曰大名之下不可久居况黃冠野服之人敢冒是以為榮乎是歲來歸惟以琴書花木自娛餘一無所問延祐丁巳開府公壽及希年公入侍逾月告别曰師好佳上國彌千二百壽某歸老故山不復闕人事矣至治改元春走介致書開府公中多微辭意復慷慨且囑元教嗣師吳公全節以報國事師為第一事大類訣別語夏五月庚寅居仙源丈室以微疾屏藥餌越三日癸巳脩然而化春秋八十有二遠近聞者悲愴曰是呪符水以衛

我者是儲穀以食我者今亡矣夫公天性孝友恭儉
事師如父待其徒猶子雖命為真人秩視二品以開
府公為之師其徒登金門綰銀章者層見疊出公恬
處其間草衣木食無異昔時戶庭授受語默以道森
乎其相承煥乎其相輝人莫能窺其際也不齷齪為
世俗小謹居鄉里未嘗乘馬齒益老步履如飛接姻
朋尤稱信厚人有急力振之或悖理傷道必奮怒揮
斥改而後止人亦憚之而不敢為也嗚呼古之君子
道德充於內仁義施於外致君澤民故天下後世聞

其風而景慕之今公寄迹老子法中道德備於身光
於山林仁義行於家化於鄉閭而不求知於當世豈
易之所謂肥遯者歟高第弟子法師雲石李公立本
嘗事開府公於京師徒孫今贈粹文冲正明教真人
秋岩陳公義高事 晉邸著名當時皆先公遺世為
徒孫而雲仍系之者某某以某年月日奉冠劍藏於
某鄉里將乞銘於世之大君子謂思本為開府公門
生且知公最詳俾述其行思本辭不獲已敢撫事實
次其顛末為之狀云謹狀至治元年七月九日成德

體元貞宏遠法師杭州路元妙觀住持提點朱思本
狀

祭元教大宗師張上卿文

同盧彥迪
趙嗣祺

呂震亨
李師周

唐桐雲
陳泰初

維年月日某等謹以清酌庶羞之奠再拜頓首敢昭
祭於故開府儀同三司上卿輔相贊化保運元教大
宗師張公之靈嗚呼我公生有異質道德昭融威儀
靜謐夙遇世皇訏謨密勿清靜無為民以寧壹歷
事五朝恩寵如一手提元綱措之安佚秩視台司
乾乾夕惕曰慈曰儉動罔不吉宜逸而勞匪作奚述

中歲投閑得請 武廟授大弟子俾嗣宗教濯濯其
英煜煜其耀道統有傳寧赫斯燭孰休而浮孰寐而
覺七十四年坐觀元鈔脫屣塵寰恭帝之召白雲在
天笙鶴長嘯哀哉斯人誰能不弔某等逃儒學道景
行真風拜公於堂寔開顓蒙晶熒秋高姁媿春融逾
三十年燕鵲蛇龍仰公之德如山之崇懷公之恩如
水之東今公往矣弟子曷從式瞻仙旂廣漠長空寄
哀斯文追慕何窮

送李士元秀才遊學序

士生乎今之世不汲汲於進取惟懼乎德之不脩學之不講者是可尚已至治三年有司遵舊制舉進士凡明經義工文辭者莫不奮迅鼓舞由里胥籍其姓名行業上於縣大夫縣大夫上于府州守府州守上于省 憲二府乃就試焉二府定其可舉者升于朝禮部總諸道之所升更考試之加察詳焉拔其尤者以貢於 天子中書定其差等而官之不十年服金紫者前後相望去賤貧而即貴富無先於此途者宜乎為士者遇斯時而奮迅鼓舞也盱江李生士元

挾策西遊訪思本於玉隆覩其貌粹然接其言溫然
得其所為文雄深閱大博雅奇正其辯明其旨遠非
潛心聖學未易到也以是而取高科不啻俯拾地芥
方且僕僕行後邈乎不以為意是豈異於人情哉生
之言曰昔者顏曾大賢得聖人而師之樂乎道不以
窮困嬰其心足乎已不以利祿移其志吾心誠慕之
吾將遍遊大人君子之門又惡知乎無進吾以道如
顏曾之遇者耶嗚呼生可謂志於道者矣方今
聖君賢相求賢如不及若生之才其不遺於山澤也

審矣於其行姑以是贈

星命者說

世有星命者流其法列十二宮定太陽躔次以人之
生時從太陽宮推知命緯之所在又推而知限之所
至其主則日月五星益以羅喉計都紫炁月孛曰十
一曜推其躔次喜怒命限值之而知窮通壽夭焉謂
之五星以人之生年月日時配以十幹十二枝由始
生之節序先後推而知運之所值五行生尅旺相死
絕而知吉凶禍福焉謂之三命挾斯術以遊於通都

大郡下至閭閻田里比比皆是也予客京師十有五
年所見名動公卿者數人自謂人之死生得失悉能
前知斷以年月無毫釐少差薦紳交相薦譽招致賂
遺殆無虛日輕裘肥馬光采照地由是而獲祿仕者
有之時予居道宮甚無事旦夕與之遊處因舉平昔
所記貧富貴賤存沒年命凡數十以質之十不一驗
焉予固疑之久而得其說焉其見過於公卿也推之
則曰某時遷某時相某時受上賞壽八十餘若干
或踰七十其見接於常人也推之則曰某時獲財某

時成名某時大顯壽如前所云聞者莫不欣慰歷歲
時間數十百人中幸而有驗者則奔走相告語曰某
術士神人也由是而名聲日彰遊從日廣其不驗者
問之則曰今雖未驗當在某時其人益信之日夕延
頸以俟至期復不驗問之則曰非吾術之疎也若生
時之誤也或語他人曰某之命貧且賤或不能至六
官問予以富貴何時予嗤其不自量也懼其怒且罵
也則姑應之曰某時富貴今而不驗乃求之於余余
豈司富貴者哉公卿歲有誅者死者謫者左遷者咸

未聞其前有言焉及是而問之則曰吾固知其然也
彼方赫赫有位吾其敢昌言以賈禍哉聽者不察遂
以為神嗚呼雖其挾詐規利亦患得患失者有以成
之也患得者惟恐其言之不吾與患失者惟恐其言
之不吾固遑遑焉汲汲焉惟命之推術者揣知其如
是則累千百言以諛之其既也驗者恒少誕者恒多
少者揚之多者藏之為之者則洋洋然自得而無愧
矣然則其何以矯之曰君子居易而已

荅族孫好謙書

來書云今秋又不復就試非有他見求異於人知命之窮而安之耳辭意詳雅勤勤懇懇惟以進德脩業為事此誠求益者非欲速成者求之於當世未易多得况吾宗乎數十年來吾宗衰微倒指男子不滿百人親筆硯者僅十數人陽初兄種學積文雄深博雅年踰七十其無意於人間事固所宜然雲章弟家學有傳聲華籍甚居貧不能自振年少而行純業精而質厚者惟好謙耳

仁宗皇帝即位之七年 詔天下舉進士好謙實與

是選明年戰藝於京屈於人而歸延祐七年 聖天子龍飛策進士如舊制予留京師意好謙必遂成名後聞好謙以星命者言運限未通不就試予甚疑之去年南歸相會時不復以往事為詢今詳來書所謂命者果性命之命歟抑星命之命歟若性命之命則遊於草廬先生之門十年講之熟矣若星命之命斯惑也已夫星命之說始於唐李淳風袁天綱言人休咎若合符契自是寥寥七百餘年豈天生二人亦猶麒麟鳳凰千百年乃一見耶今之星命徃徃揣度附

會以媚悅於人以圖利其身人所趨則譽之人所背則阻之所謂吉凶禍福如響者求十一於千萬吾未之見也昔柳渾童州時有神巫告之曰若命夭且賤爲釋可以逭死位祿非若事也渾父兄俾從巫言渾曰性命之理聖人罕言巫何盡之學益專卒爲唐名相終上壽世祿不絕此已然之事也好謙知足以明理學足以別僞於星命之說奚信之深守之篤耶今夫人有疾病必求醫藥設有星命者謂壽命不可延遂信之而屏藥餌坐待其斃耶將聽命於醫以全其

生耶此理昭然無足疑者雖庸人孺子皆能知之孰謂讀書學道者反泥於是乎哉且思本之所以相勉就試者非爲干祿以榮其身以及其親與宗族也誠以古之人學聖人之道非獨善其身而止耳將推而廣之以施於天下國家也好謙之爲學實專且久而就試又二科其終惑於星命之說而無意於是乎其務積之深且厚而後爲之姑以是爲說乎區區之心好謙亮之而已教門小厄重厘慰問學道者不以外物累其靈臺好謙知我必不爲是戚也夏秋來弱質

多病俗事滿前甚無聊賴得書黃昭然易齋說後一篇真起予者比去年所見盛製此作超詣矣入山以來詩文姑錄十篇同至幸相與講明之新涼宜向學勉旃毋怠

與歐陽南陽書

昨令姪來辱書知太夫人即世匆卒奉狀申唁不敢以他辭紊孝思相距無三百里甚欲一見開我茅塞奪於多事未能也孟子云勞心者役人勞力者役於人又曰無君子莫治野人無野人莫養君子兒童時

讀此書知勞心以治人者爲貴而勞力以養人者爲賤也僕客京師時抗塵走俗足下所見未嘗不以勞力爲愧恥嘗思高蹈遠引亦足下所知也然而心甚安閑冬春之夜必然燈讀書夜分乃寢率以爲常三年來眼漸眇昏此事始廢去年承 恩洒埽玉隆意謂晨鐘暮鼓之外無一事役心惟當讀書學道以自怡悅耳入山以來田園蕪穢倉廩空虛嗷嗷待哺者日數百人執事者類皆闡葺齷齪度歲月無毫髮公勤心一旦更張懼駭觀聽依違與處事事曠廢挾

隱別蠹事隨日生每撥冗開卷讀未竟一篇即俗子
滿前喧囂盈耳形勞神罷未有如斯之盛者曾不若
居京師時勞力而息心之爲愈也足下氣剛而行純
學博而才贍長篇短章浩若河漢鏗若金石僕素所
敬服異時常有所作詩文每欲舉似及見佳製輒羞
縮不敢出因又得發我蒙鄙信乎友直友諒友多聞
益矣遠離二年僻處邱壑既自遠於縉紳先生凡所
交遊未見如足下者疑義無所於析固陋無所於資
取之而莫予益也作之而莫予正也足下知予心樂

乎否也春中過我胡乃食言秋風蕭蕭益增企慕江
西大叅公邁先生提舉捐齋先生憲幕德機先生理
學精微作古文行古道追配古人者學者之宗師也
足下不爲思本來寧能不爲諸公一來乎來示云左
丞楊公參政佟公會間拳拳於僕自顧空疎何以得
此於二相豈足下平昔揄揚之至耶客秋道古洪二
相皆已去位今春得之傳聞相繼化爲異物矣可悼
可悼近會省憲諸公知 中朝名賢陞擢之詳成甫
太常同僉伯生翰待制可與中書檢校官漑之丞相

長史文苑監察御史凡此數公皆足下所厚善者聞之必爲之彈冠也壽體多疾謂已服雄附五十餘隻鹿茸一斤一見驚駭此二者性極燥烈固嘗與足下論之人之初生稟受元氣有强者弱者强者血氣盛壯弱者血氣衰微盛壯者少疾衰微者多疾理固宜然不幸而遭疾則必假藥石以療之疾退則已未聞藥石可以補益元氣如梁肉多食也大抵南方之人質弱者多僕素弱者多疾徃歲爲庸醫所誤服雄附二十餘隻初亦無他逾年疾作遍身疼痛溺赤如血

越十旬他醫進木香流氣飲百餘服乃療初無燥熱之劑皆平劑也前年冬有疾又爲庸醫所誤服雄附十餘隻疾益增天啓其衷悉屏去熱劑進木香流氣飲又百服乃療足下蓋親見之自是厥後燥熱如雄附之屬絕口不服二年中乃無疾此已試之效也足下理性甚明衛生之道胡爲迷復余懼子之服彌多其發也遲而害彌甚也今雖無他後將噬臍平生知已莫如足下故不敢不盡忠言惟高明其圖利之

聖治太平宮神龍記

至治三年冬十一月予被元檄至江州聖治太平宮
宮中人爲予言去年夏秋之交靈雨彌月弗解乃七
月十二日夜二鼓宮之東山相距可十里所有龍出
焉破仙公塘並北山緣澗而西過深秀堂歐陽道士
方寢覺山水驟至室中汨汨有聲撫床水已及席亟
攬衣起將呼同居人走辟忽覩窓外紅光絢爛如晝
流黃氣襲人歐陽心知其龍也即屏息立水中俄頃
光滅水退又西過雲無心堂堂之北疊石爲牆甚堅
壯至則徹底衝決又西壞牆壁經漆工萬榮甫兄弟

寢室中覺水及膺如溫湯方驚起有物若巨木拂床而過紅光閃爍奪人目睛瞬息間已在戶外異香芬馥良久又過齋堂後循簷而西簷十楹中一柱獨摧毀意其微轉身所觸也又過一室屋壞東西壁而出逾竹林則及澗中矣旁一室有鍛者胡道士奉母偕寢其中暴漲及席窓外紅光皆如歐陽所見又西至宮前過朝真橋澗南酒家篝燈未滅兒啼吶嗷遂違而北去經田中曲折復西乃入大溪明日視所經行草木咸無所傷惟流黃氣經日不散予師桂心淵棄

絕人事修道茲山二十年不他適主深秀歐陽師時
趺坐別室謂所見與歐陽同予師生平無妄語是可
信也吾聞龍必居深山大澤人迹罕至之地積數百
千年時至氣化乃乘風雲雷雨而徙居長江大海焉
然其名有二曰神龍曰應龍其應有二曰瑞曰妖其
居也休徵備至人和年豐其出也不犯人畜無損室
廬其在江海也歲爲霖雨以澤萬物斯神龍也瑞也
其居也沴氣所感菑害並臻其出也發屋拔木傷人
害稼其在江海也歲大旱若罔聞知日以覆舟殺人

磨牙吮血爲事斯應龍也妖也今是龍之出恂恂若
畏辟然其爲神龍瑞應也審矣易不云乎見龍在田
利見大人傳曰二與五應大人者君德也飛龍在天
同聲相應同氣相求之謂也方今

天子龍飛異人間出吾知夫是龍之瑞之應賢主人
宜當之見 宣室承龍光不遠矣是爲之記

送數學柳茂林序

數學之行于世尚矣自羲文設卦觀象聖賢間作演
以十翼至宋布麻衣希夷堯夫探頤索隱發揮盡矣

異時予客京師公卿間言數學必以長沙魯叔寧爲
稱首予不及知也薄遊廬山解后清江柳茂林實爲
叔寧高第弟子推人窮通言輒奇中予於豫章天慵
熊先生贈行詩序知之大慵爲江右儒宗重與許其
言信而有徵然則茂林雖未得比肩麻衣輩亦見叔
寧家學有傳矣吾聞元會運世之說包羅天地洞測
古今安樂窩廢寥寥且二百年茂林嘗有得於是否
行役匆匆未暇請教過我錦帷尚當與子論之

送族孫文中攜墨遊江湖詩序

墨之爲用大矣結繩始遠墳典聿興上而史館纂修
下而文房賦詠以至閭閻市井紀錄瑣碎靡不資之
然而世降俗薄苦良雜出隄靡之法不傳上下千數
百年作者雖多惟韋仲將李廷珪擅名耳族孫文中
往歲遇異人得祕法製墨頗極精妙予客京師久聞
之而未見也去年南歸文中遠遊未返至治三年冬
十二月拜予于玉隆出囊中墨試一用之輕清芬馥
元光照人實佳製也質諸羣公之格物者咸謂信然
且相率爲歌詩以美之嗟夫千里馬常有伯樂不常

有佳墨可得蕭子良潘谷不可得斯今爾來乃遇賞
音所得不既多矣乎雖然吾猶有說惟至誠而無息
守是道而不變將見韋李不得專美于前矣文中其
勉之文中字元吉爲濠州史君九世孫自幼好學頗
能詩詞亦吾宗之可進於道者必有感於斯言也

謝東碧哀詞

故玉隆提點宮事教門高士東碧先生謝公洪之新
建縣西山古源人也世爲儒家厥祖父俱有時名公
自幼穎異未弱冠從父命爲老氏學於玉隆宮師碧

潭劉先生經史百家之書靡不該綜性命之學尤所
明達善爲文章自娛詩律清新文法條暢而已不爲
刻深險怪語本乎天性冲澹發於篇翰理則然也貌
莊而氣和詞婉而理勝其事上也順而不諂其接下
也肅而不威信於朋友仁於僕隸蓋有道君子也由
掌書記元學講師提舉知宮累遷至提點職是宮凡
三十年人雖甚安於公而公之志未常一日不在投
閑至治二年夏六月得請歸所居景福堂日與琴書
爲友晨香夕燈之外無一毫役心事余聞公名久南

北驅馳暨來主玉隆始識面談笑如平生懽益信公
名不虛得也泰定元年春正月丙申以微疾脩然而
化春秋六十有一其徒熊君通復某某如喪父母哀
動人人將葬遠近之人能文辭者皆代挽者作歌予
識公雖未久而知公則深故作哀辭以誄公德以遺
熊君以解其悲哀云其辭曰

墨名儒行兮自古所推公生儒門兮黃老是師惟經
惟史兮造次弗違貫通古今兮何有羣疑詩詞洵美
兮文采陸離幽居元默兮厥聞四馳執經論道兮妙

析精微鬼神奔走兮恒擁衛乎臯比仁以爲居兮弗
崇以卑義以爲路兮弗峻以夷春蘭秋菊兮郁郁菲
菲卿齋雲朗月兮霽霽輝輝仁者必壽兮胡然我欺
甲子甫周兮溘埃風其遄歸厥徒蒸蒸兮惟慕師其
以悲聲嗚悵烏含反以拂鬱兮涕泗漣漣識與不識兮
累扼腕而歎歎夫身爲大患兮患將何施悟浮休之
妙旨兮詎終然其肯迷嗟今之人兮識者爲誰紓悲
哀兮作哀詞以道抑悲兮夫何思

送相師沈無庵詩序

世稱善相者自謂閱人貧富貴賤言無不中雖唐舉
許負復生不吾若也僕南轅北轍所見殆數十百人
率皆如是然徐察之則往往以人之禮遇厚薄爲譽
毀久而驗其說未始不繆也因疑傳記不可盡信所
謂唐舉許負亦若人之儔耳至大辛亥僕奉

詔代祀海岳承傳道劍江解后相師沈無庵年九十
有八出示前朝夫士當世名賢贈行詩卷心固竒之
言予平生得失無毫髮異臨分又謂予自此十年當
驅馳不息一再承

恩時行李蕭然盃酒之外咸無所贈意謂已往之說
適幸而中初不知其神也泰定改元春暮訪余玉隆
猛憶前言若合符契噫吾今乃知唐許之術世所必
有時以偽亂真滔滔者皆是不可多見耳翁之壽考
甲子行且再周方將縱遊名山閱世觀象非有道之
士能至是耶此又唐許之所未聞者再見何時尚當
驗今日所言爲翁大序之

壽杉賦

有序

洪之丹陵觀晉寧康間神仙普惠真人鍾離

嘉故宅也仙手植二杉老幹蒼古中空外榮
綿歷千載陵谷凡幾遷變而二杉閱世如朝
暮豈與仙俱得道者耶遂爲之賦賦曰

繫晉代之靈迹兮彌千歲而不泯民屹鍾仙之攸宅

兮帶長江之翰因沅山莽蒼愴而糾紛兮羅萬木之

隣鄰瑋夫何二杉之神怪兮異冥靈與大椿嘉普

惠之手植兮狀亭亭以肺肺沛雲決烏朗切鬱以垂覆

兮爰中天之華蓋罹灰劫而益茂兮匪甘棠之能配

摧枯朽以換骨兮閱桑田之橫潰嵌空畏烏朗切佳租璫切

神龍所蟄兮感震電之陸離崇外飾而驚世兮被綠
毛之縻參纚西憑后土以旁礴兮蟠鐵石之委透蛇

移載蚩尤之容裔兮仰三光而蔽虧登高邱而遠望

兮聳金莖之露盤排雲氣而俯視兮眴眩龍鱗之瀾

斑巢丹鳳於赤霄兮聲噦噦烏誨切而往還鬼神崩奔

而呵護兮何斧斤之能干沐膏澤以繁露兮恒披拂

於元風耿青瑩以燭天兮含夜氣之鴻濛晞扶桑之

拂日兮越滄海而來求嗟孔明之老柏兮終煨燼而

莫留惟茲杉之得地兮仍羽人於丹邱彼菊水能益

壽兮豈金丹之不侔望夫君兮歸來吹參差兮永懷
永懷兮天表弄明月兮紛窈窕山峙兮川流勗貞固
兮奚修天長兮地久期浩劫兮同休

真拙齋銘

聖門之學六藝爲先良工教子箕裘是傳爲學爲工
維巧斯得繫厥拙人其能格用拙存道拙非其真
用長用大先哲攸陳莊生寓言方叔玩世苟以爲真
亦維斯戾惟巧爲詐薄俗日滋不有真拙孰矯其非
余子名齋真拙是扁予以銘之勗哉無覲

贈陳明元數學說

金川陳明元得堯夫數學遊江湖訪余豫章客舍議
論英發顛倒坎離衡從古今疊疊可聽余曰元未易
明也子能明元斯元矣且夫數之爲學本於易元之
爲說出於老聃易與老皆聖經也而其說則異今子
言數而徵諸元得無戾乎曰參伍錯綜通其變極其
數齊小大辨吉凶非易傳所云乎無名天地之始有
名萬物之母無以觀妙有以觀徼同出異名同謂之
元非老氏所云乎用有萬變其體則同言有萬殊其

至則一余極元以明夫道窮理以衍夫數何戾之有
噫子之說誠是矣雖然吾聞數之爲道範圍天地曲
成萬物成變化行鬼神舒之則周流六虛卷之則洗
心退藏非若今之言數者拘拘於吉凶禍福逐逐於
聲利得喪也以是爲元惡得不戾夜氣寥閒月影在
窓味羲易之微言參老氏之元旨當有悟入堯夫之
學庶乎其有傳矣子勉旃

儼齋箴

行中書省都司張君資深甫扁燕居之所曰儼哉清

江范德機爲篆二大字眉山劉損齋記之廣信彭幼
元爲之銘資深不鄙徵予言遂作箴以獻亦古者朋
友切切惓惓之義云

古之君子有德有言威而不猛望之儼然吾友張君
師必先賢視聽言動無黨無偏以儼名齋肅恭是臨
外雖儼然溫其無暴苟失厥中不幾乎傲雖有昌言
人孰吾告正襟危坐惟儼若思所思伊何政化是裨
張而不弛文武不爲操之有道實儼之宜肅肅張君
保茲令德匪惟色莊必正必直受命咸宜匡此

王國野人獻箴敢造三益

衡岳賦

五岳於中州衡山最遠而其神最靈有國家
者歲一致祀昭彝典也

仁宗皇帝踐祚之初元思本以外史承應 中朝奉
詔代祀夏六月乙丑至祠下瞻喬嶽之巖巖睹威儀
之赫赫穹窿炳耀動心駭目猗歎盛哉既齋
沐越二日丁卯行事禮成登祝融絕頂天宇
廓清南眺九嶷北瞰洞庭嵒岨泓沍若几席

間物亦天下之奇觀也環山東西佛刹道宮
凡數十百區往往擅泉石之勝極金碧之麗
周覽以還賦詩三十韻留獄祠越十有五年
重祠庭主人既不復見留題亦罔知所在矣
因閱石碣所紀內翰疎齋盧公集賢員嶠李
公秘書伯雍馬公奉常亨之元公平章迂軒
趙公俱以代祀託諸詩文用彰盛美思本所
著獨無傳焉雖才名不逮諸賢而

國之明禋神之靈貺其可無述追憶舊遊遂爲之賦

云

昔在帝姚允協重華秩四岳以作鎮視羣望而有加
惟祝融之奧區距中州而孔遐跨洞庭之浩瀚俯蠻
貊之鬱鬱南通五嶺北控三巴石廩岌業寶洞砢砢
啓朱陵之秘府實炎帝之攸家鴻洞翕忽含元化以
長養兮極蠻陬之瑰詭卓犖恢廓統地靈以磅礴兮
匪瀟霍之能比日月肩摩以旋轉兮望不周而對峙
雲雷噴薄於山麓兮沛沅湘之溶滴空瘴癘兮海濱
絕妖氛兮四裔伊

聖皇之御極播聲教於窮荒揆前王之踵武歲有事於南邦重廷臣之妙選發金碧於天藏於鑠

王命遵彼周行載馳載驅莫敢或遑南伯攬以承

詔察案奔而肅迎振羽衛以首路紛總總其靡寧戒飛廉使先驅兮班陸離而啓行搏夔魑以遠屏兮忽揮霍而宵征拖虹霓於青霄兮何旃旒之從衡也磕雷霆以晝晦兮何鐘鼓之鏗鎬也爾乃協靈辰考恒度脩羣僚列鹵簿執豆籩陳簋簋牲牢豐禮樂具陟降在庭賓贊有叙乾清坤夷陰闔陽煦風澁澁兮欸

來靈煌煌兮在御鑑 皇明之至仁錫繁釐於黎庶
斯 有元之盛典宜享祀乎中古至若窮山水之奇
觀訪仙釋之遺蹤幡幢杳靄以無際金碧璀璨而爭
雄搜靈怪之惚恍稽象罔之鴻濛達性命之元理非
世教之攸崇豈斯文之或缺亦空言其奚庸辭曰
祝融戕戕殿南荒只興雲致雨昭靈光只在昔巡守
今則亡只歲修明祀開前王只輶車萬里馳康莊只
金繒赫戲粲輝煌只斂時五福彰吾 皇只南伯祗
若羅椒漿只牲璧既潔明德香只撞鐘考鼓聲喤喤

只人和禮備神具享只雲車風馬去復翔只眷眷南
土垂休祥只蠻夷率服斯民康只吾

皇萬壽思無疆只祝融享祀彌天長只

弔杜子美文

逾衡湘以南邁溯耒水之龠沅訪先喆之陳迹得子
美之孤墳古木鬱以交錯穹碑摧而未泯敬祠堂於
中野置遺像於遊塵朱子愀然作而歎曰鴻荒汗漫
古往今來聖賢間作邈矣遼哉或興文化或樹武功
其人雖遠聲耀無窮惟風雅之既變實王道之始衰

逮平誼之耿耿繼植粲之恢恢梁陳靡而不振隋唐
趨而莫回振大雅於流俗必天挺之英才在彼杜陵
密依闕輔有開必先流芳恕預維嶽降神揆于初度
篤生大賢厥聲載路繫先生之妙齡實開元之盛世
究墳典之精微集百家之同異倡渢宏之大音偉經
緯之奇器土苴以爲功名浮雲視其富貴登吹臺以
結交極酣歌而肆志高稷契以自期陋雄臯而遠致
何歲月之道忽驚素絲之爛斑竟護落以無適抱荆
璞而長歎斯獻賦於蓬萊錫胄曹之微官屬蕙運之

中否慘氛侵於長安委妻孥以奔竄脫虎口而生還
聆清蹕以慷慨覩漢官而沈瀾拜拾遺於倉猝補哀
職於艱難當陳陶之喪師明相臣之無臯嬰逆鱗於
九重斥司功於畿外徒四壁而無歸遽倉皇而顛沛
履蜀道之險艱匪故人其誰賴將時危而事異位公
卿而獨驕諒草堂之難久乃出峽而逍遙下荆門以
北望慨京闕之迢迢悲湘纍之孤墳絕洞庭而遐招
謂湖南之可依忽臯獍之羣起幸脫身而宵征復掛
帆於湘水望九疑之嵯峨叫重華而陳理干聶令於

朱瀨饋牛酒之豐美天將喪於斯文厄先生而遂已
伊文章之得失與世運而推移耿精誠於日月貫忠
義於虹霓豈太白之詩名敢先生而並躋斯名教之
攸係亘萬古而相維何世儒之齷齪辨斯墳之是非
酌清樽以長嘯與天地其無虧

遊廬山記

延祐三年冬余行役江淮舟過潯陽南望廬山煙雲
卷舒積雪如畫釋舟至太平宮因訪董仙種杏壇拜
有道心淵師游東西林寺問惠遠樂天陳迹過虎溪

星渚問舟南歸矣廬山勝遊僅得其半不見五老峯
是猶未識此山真面目也泰定二年春三月奉

詔芑衛元教思本乘傳播告江南秋八月甲辰次德
安縣乙巳東行入廬山約驛人毋馳驅逢佳山水必
解鞍登臨乃經柴桑栗里到醉石溫泉靈溪歸宗宿
簡寂方丈丁未晦次南康驛郡守汪國良謂余明日
過五老峰下當見尋真三疊泉而棲賢三峽橋亦茲
山奇觀恨背馳耳余問故曰郡城西北距棲賢十里
驛道當正北行不敢迂也九月戊申朔至五老峰下

入白鹿洞拜文公遺像已酉登尋真觀五老巖巖直
觀之西矗立萬仞雙劍諸峰環拱于右彭蠡三江交
會於左跂若鷹揚踞若虎視丈人之俯東溟仙掌之
薄洪河殆不是過也由觀之北五峯之東披荆榛沿
溪行可五里得龍湫石壁嵌空洞戶深黑飛泉激射
寒氣襲人又東北窮水源轉山麓躡巨石攀危藤彌
高深益峻險曲折屢渡戰棹却立架木爲梁以度陟
絕者三又十里見石崖高可百丈餘東西北峭拔無
梯惟南通磽路仰望一水東出宛若天潢導者云自

古未有能至其顛者莫知水之所從來也經石梁下
流如煙如雲如縠如布可數十丈又經石梁變態萬
狀日色晃曜如瀉明珠嵐光映帶如張貝錦又數十
丈經日梁愈近愈明珠簾乍開銖衣縹眇鮫綃復合
玉珮璫琤微風動搖飛霧噴薄百步內草木皆綴金
璫又數十丈乃赴澗中澎湃洶湧奔雷戰馬不足以
喻其勢矣正東一石平廣高及下石梁之半遊者皆
憩于此注目凝想澹然忘歸廬山秀甲天下而此泉
甲於廬山信非虛語日轉山陰凜乎不可久留道人

王一山候山下具午食食已過吳章山昭德觀夜宿
寶嚴上方庚戌復到太平會道人熊觀靜涂洞觀符
鶴臯抵掌話舊自謂廬山佳處已得十八九三子則
曰未見康王谷水簾棲賢三峽橋終未識廬山全體
也噫予嘗觀古之人擅一邱一壑之勝者黃綺之於
商山晨肇之於天台句曲之陶華山之陳皆終其身
而弗去蓋心與道俱境與神會雖被之以黻冕享之
以鍾鼎有不屑顧焉者矣予何人斯膠轕世故三入
廬山幽深竒詭之邁冥搜遠覽之娛且未之既尚何

古人之敢望哉王事靡盬明發遂行姑記此以贈太
平三子無亦使廬山之佳勝無傳焉

榕說

百粵之地有木焉魁梧偃蹇蓊鬱霽霽大或十數圍
高百餘尺始見以爲荆揚之豫樟也迫而視之橫柯
曲幹膠斛求乙取屹枝間垂絲至地輒復爲根久益
長大根幹連絡至有一本數十株大蔽十畝者問諸
其人曰榕木也冬夏恒青地煖所宜若嶺北繁霜雪
則不能植矣予心異之曰是大可爲梁棟小可爲櫨

櫺構大廈需良材中州未之有也行昭梧間有根株
摧仆枝葉委積者泥沙汨其外螻蟻坐其中匠者莫
之顧樵者莫之取也私怪而問之則曰是木也其大
蔽天鳳凰不棲焉其深徹泉虯龍不親焉妖狐鬼魅
之所憑依毒虺之所穴藏人莫敢睥睨者今也幸而
爲雷所震爲材則脆癭而速撓爲薪則渚洽而含洳
無適可用斯亦控於地與糞土俱腐而已耳予於是
有感焉不仁而在高位豪猾與游逋逃與歸上以罔
其君下以賊夫民神怒而不知人怨而不恤其不爲

百粵之榕木而踣於震雷者幾希吁

廣海選論

五嶺之南列郡數十縣百有一十統於廣桂雷三大府自守令至簿尉廟堂歲遣郎官御史與行省考其歲月第其高下而遷之謂之調廣海選仕於是者政甚善不得遷中州江淮而中州江淮夫士一或貪縱不法則左遷而歸之是選焉終身不得與朝士齒雖良心善性油然復生悔艾自新不可得已夫如是則孜孜爲利旦旦而求仇賊其民而魚肉之其志則曰

吾知豐吾財利吾子孫而已撫字非吾事也吾身之不能恤庸詎知夫吾子若孫不資是而獲仕於中州乎部使者每至必相語曰某郡瘴癘甚業邑獠獠殺人某使者行部幾不免焉則巧計而趨避之民之冤痛號呼者終於無所愬而止故地益遠而吏益暴法益墜而民益偷甚則疾視其上構結徼外蠻夷憑陵郡邑賊殺長吏之禍成矣是法也行之且五十年大府知之而莫之言也言之而莫能變也今之論者必

曰

世皇混一區宇法制具興遠邇無廢小大不遺後之人循守猶恐弗及敢輕議乎嗚呼

世皇之制豈端使然哉法無不弊弊則必更明王治天下之要道也夫以海隅之於天下猶爪髮之於人身也雖微且末或拔焉或折焉則舉體爲之不安遐陬僻壤一夫不獲其所撞搪叫呼扇動遠近中州江淮之氓庸獨安乎昔者李唐之制重內輕外班生入朝以爲登仙趙宋之法遠近適均偏方一隅無足多論然則今日之事將奚師曰聖人一規而仁焉近

而舉遠

開府大宗師張公誄

維至治元年十二月壬子開府儀同三司上卿輔成
贊化保運元教大宗師知集賢院事領諸路道教事
張公薨於大都崇真宮明年二月庚申嗣宗師元德
真人吳公奉

勅戒其徒真人陳君提點薛君以喪歸于故里今
天子即位嘉念舊臣

勅有司具葬事泰定三年冬十二月甲申葬公于南

山公官第一品宜得謚于太常元德公以公未葬弗
敢請也門生朱思本感公既厚知公亦深懼盛德之
或泯音民敢斯文之有缺乃作誄曰

在昔炎漢天作元輔功成不居颯翮遐舉追彼赤松
保厥宗祀枝庶分流益大以固自河徂江乃樂茲土
戢戢象麓清淑攸貯篤生安惠實纂洪緒康穆克紹
奕奕侯侯禮義舟輿詩書干櫓無競於時德施斯溥
爰暨文簡其大有容內韞修能外示樸恭既積既厚
乃啓乃崇粵有仲子實惟我公圓精輝降方砥秀融

孝友天至允執厥中韜光隱德伯父是從眷此龍虎
實爲公宮

世祖文武車書混同乘時奮發上下雲龍密勿對揚
曰惟清淨

帝曰俞哉克底文定遂藏竹宮式彰神應昭事上元
期集于正曰雨曰暘無爽惟令肇錫嘉名上卿定命
銀章錦衣以表德行安車朝夕禮異朝請僉曰休哉
公亟音衰推屏勞謙自持昭合前聖乃眷文簡試郡
允臧于蕃于宣于浙于江赫赫厥聲煜煜其光實啓

信封俾熾俾昌伯既純雅季亦溫良晦迹彌固宜壽
而康猶子令器聯璧爲郎剔歷中外玉振金聲曰族
曰姻必取其長由公筮仕朱紫輝煌逮事

成廟寵錫益稠玉冠大圭周爰咨諏匪伊祀事惟道
是求公益冲退密贊 皇猷

武皇御極無德不酬謂公元老鮮克與儔秩以特進
位冠列侯公則引年願返丹邱

武皇曰吁卿爲

朕留勿煩以事慎爾優游授大弟子事我

明辟人亦有言弗慮胡獲其獲維何

帝命元德維此元德孝思維則實總元綱小心翼翼
敬恭明神以佐

王國克長克承載振載奭于公有光四方是式煌煌
仁宗恩數彌極秩亞台司賜逾萬億上逮祖考卹典
大行遷國於魏潛德昭明八世惟師徽號誕膺厥徒
錫類濯濯其英或秉懿德或負才名維公之故均被
寵榮或佩銀章或錫珠璣或栖巖谷或侍

闕廷克繩祖武靡驕靡矜公則乾乾大懼滿盈祐治

之間歷事

五帝眷遇弗衰公實厭世辛酉維夏灤京告瘁元德
克孝顓受帝祉返我神都遽絕人事維莫之冬脩然
永逝

帝命元宰率爾多士祖道於郊哀榮亦備白雲悠悠
元景翳翳飛雲散花縞素孔異元德攀號將奉與俱
皇帝曰嘻爾其輔予往送於南申飭爾徒英英冠劍
在彼中塗靡聞不駭靡見不趨式遄其歸乃返故廬
人亦有言曠世所無元堂未掩日居月諸王事鞅掌

朔南其居元德純孝痛甚刺膚歲在丙寅得請於

上爰

勅外廷俾以禮葬羽褒崢嶸鳳軼

音叩

宏敞白驥連

山素車彌望南山崔嵬既叶著龜靈風振音皓月流
輝白鶴朝唳元猿夜啼我公永歸無復還期思本於
公信撫壤接亦惟世姻幼慕明喆庚辰拜公公歸自
北時方齟齬諸父是挈長生撫頂實懷舊恩少長學
道素志獲伸聿來京國幸奉晨昏溫溫我公厚德深
仁約我以禮博我以文出入

禁閨惟公所援使於四方訓辭是遵再膺

明命薦剡攸陳義則師友恩猶至親吁嗟我公胡遽而仙惟公之精兮揭日月而麗之惟公之靈兮峙山嶽而萃之惟公之道兮超元氣而出陰陽其莫追惟公之德兮蓋昭代而舉流俗其弗違蓬瀛返乎故居兮詎塵世之可縻榮華溘其朝露兮公含笑而奮飛悟莊生之微言兮齊死生於無涯苟予懷之既達兮奚惆悵而共悲酌清尊以長嘯兮誄盛德於旒旗破羣迷於當世兮曠恨恨而不疑

貞一齋文終

貞一齋詩稿

臨川朱思本本初父

水龍吟 送閔道錄醮玉隆竣事歸東湖

幾年南北聲名有純孝子騫苗裔逃儒自愛脩閒天
賦神仙標致歸隱東湖醉遊南浦滿襟清氣想當時
宦海風波浩蕩從前錯如今是 追念父師恩重恨
年華暗隨流水錦帷夜醮黃壇春靜綠章封事香霧
空濛步虛嘹唳孝通天地玉皇優詔答功勤壽甲子
三千歲

千秋歲 壽程竹逸六十

虎溪清旭瑞氣生華屋無量壽如川福簪纓門閥好
詩禮家聲肅真樂處庭階侃侃森蘭玉 問訊溪邊
竹色與靈椿綠多積善貞祥熟皇天私有許甲子從
新讀千二百崆峒不待仙人祝

遊仙詩四章 爲祖紫雲作

五陵有佳士乃在西山顛晝餐金光草夜讀青苔篇
頻視世間榮於我若浮烟野鶴出雲表潛魚媚深淵
至性不可羈誰能識其全惟應羨門子相與長周旋

西山多靈藥服食顏色好在昔有洪厓高舉云得道
曹盧繼芳躅天地長不老後來紫雲翁辟世一何早
連雲種葳杞帶月拾瑤草貴賤俱營營終然恨枯槁
棲遲匪迷塗被褐自懷寶去去不可留期之在蓬島
韓康入都市賣藥不二賈女子知其名翩然事回駕
山中富泉石至樂窮晝夜養生極元理抱道合元化
邇來八十年閱世知代謝一朝返其真適去勿悲叱
長休得素書字古不能識叔夜非仙才石室那可即
夫君獨元詣幽討窮足迹蛟湖極元首元都洪厓脊

羣仙日追隨
酬唱良自適
篇章久零落
慨嘆尚誰惜
太元在侯芭
千古聲烜赫
撥棄勿復言
南山對松栢
燭影搖紅壽鄭梅菴

春到梅邊瑞光浮
動香山裏雲端微見老人星
嘹嘒觀聲起
灩灩尊浮綠
螳對紅粧
高歌盡醉彩衣錯落
玉樹瓏璁人生難比
谷口家聲
戶庭藹藹傳詩禮
天教餘慶屬伊人
爭看南山梓
那羨東風桃李向蟾
宮早攀仙桂
賃時須記老子婆娑
一盃千歲

戊辰年臘月大雪彌旬古樟黃竹皆凍死百歲

翁云有生以來所未見者追憶兒時樂事賦詩
三十二韻寄呈仁叔兄併示雲章弟立竹姪

憶昔童丱時見雪喜無寐清晨走相喚兄弟劇嬉戲
擊竹墜瓊玖攀簷瀉饋饒模形常透懷印跡屢亡屣
玉虬巧追琢龜手那肯置冰盆脫明鏡密密空美餌
盟櫛固已忘筆硯亦胥棄父師恒檢責掩耳寧畏避
充然有餘樂豈惜歲月駛中年客京華飛雪大如翅
天街跨鞍馬頃刻鬚鬢異歸來擁貂裘酒炙交餉饋
公卿共談笑盈尺詫奇瑞雖無少年歡頗愜四方志

竭來五十六老態日夕至憑陵怯隆冬踈懶便平聲
午睡彌旬值凍雪盡日響寒吹虛明眩窻戶凜冽逼
衣被熾炭曾不溫醇醪漠難醉萬室被紉素千山失
蒼翠狡兔方迷離飢鳥亦憔悴豫樟變枯槎黃竹絕
生意適聞百歲翁咄咄書恠事荆揚古炎州殺氣何
以致或言兆豐稔螽蟥深入地又云弭殘瘴自此蕃
庶類胡爲鮮歡笑孤坐成嘆喟翻思同隊時此樂詎
可覲朱顏與綠髮去去不再值深心幸聞道俯仰復
無愧縱浪圓元化浮生眇如寄聊爲凍雪吟庶用最

賢知

道傳先生才學重當世與予遊將二十年往歲
別於都中思慕良切比提學江西復時得聚首
殆將滿考乃訪予玉隆宿留數日臨別賦長句
見贈次韻奉酬聊敘今昔以寫懷耳

憶昔事北游山川飽經行揮鞭過河朔振袂趨神京
維時柳夫子傾蓋相逢迎成均有鴻儒安能復遐征
歲規靡晨夕孔道日以明義勝塵慮遣理融心神清
粵從分別來耿耿馳中誠易水霜月白燕山雲樹清

竭來振鳴鐸坐使聾瞶驚翼軫吳楚交秀氣鍾元精
自古足文獻化機浩無停歐曾出奇正王晏何縱橫
往者不可作汗漫騎長鯨予生百年後企望心靡寧
公來實增重未俗儒化成貪汙變廉耻諛諛還忠貞
信知德有徵孰謂風無形聖皇急求賢爲霖洗炎蒸
召還匪朝夕羽翮橫青冥揮手提天綱舉足頓地紘
吾聞柳柳州千古更炳靈抵掌載言笑吾孫得吾駟
家聲亦烜赫何心尚怍怍夫子不自滿猶言有常經
用舍非所牽澹然自和平俯仰無愧怍在已無德馨

再拜服斯訓文華願收聲當爲松柏姿勿作桃李英
眷言從茲游蔬筍供南烹歎忘鴛鴻侶乃與鷗鷺盟
臨期重攜手欲別終含情高歌伐木詩側耳嚶其鳴

莫春感興

推枕芸窗睡未厭春衫亭午試相縑雨淫荒蘚蝸黏
壁風颭遊絲燕入簾靜得天機明損益閒觀物理適
洪纖一心亨處潛真樂明鏡從教白髮添

放鯪鯉

大鈞播萬物賦形有媿妍羽毛族林藪鱗介繁江川

嗟爾穴居類蓄縮如鰻蜃修鱗與利背觸地無剛堅
壑飲混泥滓蟻食多腥羶於人既無害在物苟自全
鹿豕每犯稼虞羅所宜先蛇虺恒傷人掊擊理則然
爾肉不登俎爾名古無傳野人亦何爲畚鍤必及泉
得之詫珍異籠檻置我前且言芼薑桂甘美逾割鮮
性復去風濕力能已拘攣感子獻芹意肉食吾無偏
風痺非所患平聲藜藿良獨便南烹已云惡韓蘇著
詩篇蜜唧常嘔吐鼃黽曾棄捐河豚美而毒智者寧
垂涎況此更微賤忍以湯火煎逍遙古名山土壤大

且卷使爾遂生成族類當綿延長者活魚報還生切
利天放爾匪繳福天闕誠吾憐

招賢觀

古觀少鄰家招賢名獨嘉穉松紛側塞老屋半欹斜
野鶴驚春夢山蜂報晚衙道人華念絕行住養丹砂
贈魏道士

爾祖伯陽翁叅同契聖功丹經明媾復火候識屯蒙
車馬今誰到簞瓢亦屢空家聲須自振千古有宗風
景福觀

真館留芳躅陶仙豈隱君松篁深蔽日苔蘚濕生雲
訪古無碑誌題詩紀見聞山人有天趣清坐對爐熏

陶仙觀

安公姓陶逸其名列仙有傳垂英聲時丁典午政衰
亂辟世甘與樵牧并新吳山水最佳處讀書種樹蠶
且耕賢人在野時所慕正恐徵辟過柴荆託言鑄劍
感天帝赤龍擁駕來相迎翩然一去不復返世俗共
說歸蓬瀛大唐天子好神異倅圖相地初經營槎牙
老柏云手植樓觀倚薄何崢嶸邦家自此著祀典水

早必禱奔黎氓學徒混混拜遺像撞鍾擊鼓希長生
神仙有道豈易得手溺烏兔餐元精但聞采藥鍊金
石蒸砂作飯終無成安公聞此必首肯神交千載知
吾情天風兩岫出山去杲杲紅日開清明

新吳昭德觀道士閔蟾溪以厥師張玉澗所得
吾師月池翁書翰見示辭意篤實契意高古藏
之四十五年矣感今懷昔爲賦四韻蟾溪深得
金丹之妙故末句及之

白頭道士說當時故老遺編手共披澗底雲深龍睡

穩池邊月冷鶴歸遲墨光珍重存金石丹訣親傳在
坎離若問箇中元妙處祇應無跡是吾師

青霞觀

故老相傳赤松子修鍊之所今專祀焉

天開圖畫越王山山上樓居更好看仙子昔曾餐水
玉道人元自鍊金丹平鋪竹樹青霞出點綴松花白
露溥欲問羲農千古事洞簫吹徹曙光寒

真常觀文蕭吳彩鸞跨虎上征之地石壁虎迹
猶存

越王山上力躋攀瑤草葳蕤覆石壇絕壁無梯人跨

虎層霄有路女乘鸞千年鼎竈苔花濕午夜樓臺桂
影寒世外瑤京元不遠鳳簫時在白雲端

仙遊觀訪羅南溪山房時南溪遠游未歸賦四
十字以贈其徒孫金存吾

羅公深隱處帶雨得重尋老樹凌霄合空墻薜荔深
風雲千里翺宇宙百年心更喜孫枝秀流芳見桂林
上全陽師

好道求先覺專門見此翁中年出塵網昭代振元宗
仙鑑多稽古丹經獨發蒙斗杓明建始卦象契叅同

送蔡體仁 三首

秋高萬木落夜永候蟲鳴披衣待明發騁望空前庭
悠然感所思乃在天北溟一別四五載關山何崢嶸
綠酒薄清賞素琴歇芳聲忽有佳客至聊足慰吾情
佳客江海士儒衣章甫冠文工畫更精風雨生毫端
不作脂粉媚不爲儒生酸孤騫出雲表遠訪千年丹
丹成井不改仙去隨飛翰握手叙契濶碧樹生初寒
君家宜春郡春臺在其顛我屋仙巖下桂吐秋風前
朝尋黃精苗莫飲碧澗泉相逢不忍別重是三生緣

扶桑送白日浩浩如逝川勗哉保明德勿作丹青傳
丹陵道士胡天牖禱雨有應賦詩志喜次韻

見說蜚符起卧病又聞驅雨潤嘉禾昔時方士聲名
舊今日長仙惠澤多鐵札投龍通水府金鉶躍馬倒
天河功成小住崆峒上一任桑田有白波

唐天師胡惠超身長

七尺時人
呼為長仙

送羅道士歸九江

老桂吹香萬里秋折枝爲別意綢繆廬山有鶴迎歸
佩章水無風送客舟松菊故園陶令宅江山陳跡庾

公樓何時與子同清賞却憶西林話舊遊

宰屬顧淵白馮介軒江西提學柳道傳高灝雪
諸名公以初夏燕集輝山熊鍊師雲徑酒酣賦
詩爲樂唱酬甚多秋中輝山緘以示予次韻

桂香涼入錦帷初誰遣詩筒一起予清節百年高士
傳好風千里故人書斑斑文會光聯壁浩浩詞源盛
決渠應念山中未歸客荆薪鬻石計全疎

西竹引

劉俊卿淮南王幾世孫自別淮南來百年此邱園環

居種竹千萬个霜枝露葉埋雲根鳳凰飛下天風寒
食實欲去猶翩翩西山蒼翠常在眼爽氣正挾搏桑
曦朝來斲取蒼玉幹持作洞簫吹不斷西山高處鳳
和鳴雲間雞犬聲嘹亂空聞雲外有神仙不見淮王
只見天烟霧空濛羽衣濕天低月落心茫然心茫然
撫西竹風波浩浩隔蓬萊與爾飛龍兩相逐

題宋太祖趙普堯進石守信楚昭輔楚蹈圖

五季肆淫虐極力相吞噬頤洞五十年神州開如沸
大德方淵龍厭亂實天意數子盡王佐雲從尚嬉戲

楚蹕軍中樂雍容有餘地揮手決浮雲舉足奠坤勢
休明啓三百烈烈光漢魏誰謂其人亡千載凜英氣
寄題李氏雙桂堂

何人種德劍江陰幾世流芳見桂林冷沁瓊枝雙白
璧光搖珠粟萬黃金才名吹起風雲闊花萼輝承雨
露深待爾天香携滿袖華堂更擬一登臨

葛雲岫判南豐時予乘傳至郡一見半度真前
修也別去五年重會其家葛惠詩次韻

疇昔使南州解后無心雲別來忽五載清夢時見君

今登君子堂足以慰所聞官情淡如水義利於焉分
冰檠固清節波濤出雄文自言佐郡時有如負山蚊
歸來撫松菊甘與鹿豕群慨嘆持斧翁寧知猶與薰
次韻奉酬心淵師見寄

楚水吳雲道路長連環清夢耿難忘若爲化作遼東
鶴回首琵琶是故鄉

百行人推孝行高虧成終始在秋毫應憐八十慈親
在滯穗柔桑尚作勞

曾君靜訪予小隱園飲酒賦詩爲樂次韻

之子南豐後才名起妙年玉壺清曉出金榜赤霄縣
滄海思鯨奮晴空佇鳳騫氣吞三峽水興逐五湖船
耿耿葵傾日區區石補天推賢惟爾最序齒愧吾先
莫作龜逃楚終朝駿在燕幾年文會隔今日酒盃傳
脫粟諧真率誅茅得靜便林塘堪小駐共釣錦鱗鮮
雲章弟次韻見教既工且敏再用韻以美之

令弟良師範詞華見盛年包蒙鳴鐸舉待問應鍾縣
風采真殊絕家聲定不騫腹饒邊氏笥目短米生船
道學還希聖行藏祇任天應門今有託入室更誰先

義重嗤秦越才高慕許燕文章千古在經術幾人傳
老大予將嬾精靈爾尚便青雲如得路爲政慎烹鮮
諸昆弟友朋屬和者疊出追憶舊遊依韻再賦
憶昔游京國驅馳屬壯年致君心炯炯戀闕思縣縣
桂館恩重被楓宸禮未騫屢騎沙苑馬幾泛御河船
鰲極三千界龍光尺五天奉祠曾詔許歸隱孰吾先
倦翮南依越深衷北慕燕親朋良有助風雅不虛傳
世味今逾淡山棲老漸便詩筒來往罷清賞對蕃鮮

發山中

穀旦發名山駕言趨上京車馬如雲集把酒送我行
須臾陟東嶺回盼仙人城晚圃秋正濃露華綴金英
胡爲舍此去乃與塵俗縈人生有行役豈必皆蠅營
威鳳高其翔千載相和鳴勿作兒女別慨慷舒長纓

薌溪卧病

辭家至薌溪信宿不能去六氣馮吾軀右足重如注
醫師試鍼砭轉覺氣血聚呻吟數更漏永夜杳難曙
令佐賢主人情親靡新故盤餐交饋餉藥石云致助
懷土非吾心豈爲桑下顧安得乘飛車一去千里路

自弋縣過了頭巖夜行至信州

葛溪道士嘗新酒明月巖前憶舊遊
驛舍荒涼秋欲老筍輿登頓莫生愁
長風列炬棲鴉散淡月流鈴吠犬稠
假寐醒來過夜半城頭擊柝是吾州

玉山縣

肩輿出城闌初日半天赤莫宿玉山縣
風雨秋寂歷連葦結長陰一水界空碧
翻思壯游地白髮非宿昔去去欲何爲
感歎不能息何當營丹砂吾師契金石

常山登舟

東浙三年別重來異故吾負病便坐卧投老倦馳驅
藥裹憑誰檢詩囊祇自娛江山如有意雨後獻新圖

浙江

吳越山連海岸頭兩山迎送意綢繆秋深水落人家
出日暮潮生釣艇收滿眼流亡何日復傷心凋瘵幾
時瘳東南自古繁華地底事于今異昔游

廟山九日

疇昔使錢塘夜宿廟山驛維時九日至豐年盡歡懌
亭長醉如泥推情靡呵責邇來二十年駐此感今昔

黃花復重九采采耀顏色良由沒巨浸魚鱉爲鮮食
壯健多流亡老羸轉溝洫厨傳恒蕭然酒炙那復得
清晨驅車去城墜更寥閴當道多相知欲語淚沾臆
東南千萬斛歲漕輸上國今茲民力竭何以繼供億
聖明仁如天聞此應愴惻誰當繪爲圖獻納通宸極

寒疾

足疾良未愈又與寒疾嬰黃昏抱冰雪二氣疑交兵
齒牙自相擊顫棹兒童驚須臾內熱攻衽席風火生
汗流甚出浴渴飲如長鯨嘔泄加痛楚永夜聽嚴更

投老復行役何以舒吾情寄語故山友慎勿辭力耕
東吳行

君不見浙右良田千萬頃陳陳積粟深於井又不見
東南漕運輸上京舳艫千里浮滄溟去歲江淮丁旱
曠黎民餓死殆將半米舟來者皆東吳處處延頸爭
歡呼今歲東吳遭海溢太湖湧波高百尺夏秋之間
陰氣凝十旬風雨鞫陽精吳江浙水不復辨髣髴蓬
萊眼中見稽天巨浸十六州良田泮泮蟠蛟蚪豪家
發粟賑貧乏室如垂罄無餘留飢民即死不能舍聚

爲盜賊橫戈矛此邦祖賦半天下安得不貽黃屋憂
明年海運何自出必藉隣境交相求江閩湖廣迭兵
旱比歲瘡痍殊未瘳救荒有術在青史河東河內非
良謀太平天子至神聖億萬蒼生仰司命一念通天
天必從普天願見年年豐

金山歌

金山上江流觸石掀白浪金山下江水朝宗疾如馬
長風萬里爭喧喧晦明兩岸聽奔雷樓船一日知幾
度北去南來風火催金山解語應喚客前時綠鬢今

華髮去來袞袞爲誰忙坐見蟾烏遞明滅周公大聖
去不回盜跖凶頑安在哉銅山餓死等陳迹珊瑚金
谷俱寒灰賢愚貴賤盡如此自古年華逐水流高奔
日月駐朱顏惟有松喬羨門子祈孔賓心已詣金山
歌歸去來

廣陵行

廣陵城外秋草肥廣陵城中車馬稀鬪雞蹴鞠不復
見朱箔青樓塵掩扉聖世承平六十載何事繁華一
朝改長老未說淚先垂聽我長歌爾應駭去年春旱

天無雷種不入土心已摧夏秋日色烈如火萬里良
 田俱草萊三冬殺氣更嚴酷運河凍合光如玉十室
 八九無炊烟父兄愁嘆妻孥哭今春雨滑動犁鋤忍
 饑力作交相呼奈何螟蠃蔽天起所至草木無遺餘
 捕蝗作食已云惡疫癘無端扇餘虐死亡枕籍無人
 收賴有王官爲掩骼廣陵城中十二門抱關老卒記
 甚勤輿尸一門日百數兩月漸見無行人廟堂賑濟
 頒良策宣聞愛民心甚力縣胥里正肆姦欺遠者那
 能沾帝澤十人今有幾人留况值秋田又半收只今

痛定更思痛轉覺涕泗縱橫流人生有情須愴惻惆
悵龔黃難再得大書傳作廣陵行持斧何人應動色

高郵驛阻風

鞍馬驅馳未得閒不緣衰疾敢求安長湖三日波濤
惡孤館五更風雨寒青囊束薪無煖席紅炊脫粟愧
加餐驛程牢落今如此信有人生行路難

題柴南山雲島隱居圖

北山藹晴雲南山挹清灝中有仙人廬荆扉迹如掃
尋源種桃花帶月拾瑤草風帆自去來咫尺迷烟島

淮河曲

淮水清河水濁二水交流風更惡誰云鞭石役神人不信填河有烏鵲我欲馮河黿鼉縱橫曷梁不爲我作但願皇帝陛下萬萬歲常居紫宮臣無營住崆峒年年獻壽騎飛龍黃河水流與天通臣心如水平將焉窮

盜發亞父塚

戲馬臺前范增塚英風千載行人竦塚中寶氣騰光芒識寶賈胡心爲動築室潛謀二十年一朝鑿井穿

其壘畚鍤纔深四丈餘乃有石磐青巖崕四旁狀杙
大十圍各施九木森環拱石穿棺翼更分明漆光可
鑑剛而鞏斲之不用揮金椎白骨儼然全頂踵寶劍
未化橫蒼蚪金玉輝煌氣交擁賈胡致富須臾間棄
骨溝中寧愧恐平原無色鼓角悲山鬼夜號川澤涌
太守陳公英俊才慨嘆姦偷吾所統亟呼五伯取群
盜械置狴犴見仁勇傷哉亞父天下奇鴻門高會真
危機火龍飛起實天意拔劍起舞空爾爲風雲變化
失隆準玉斗一碎山河非如公明義古亦少發憤乃

作彭城歸六合茫茫漢疆土厚葬何人誠可嗤君不見驪山牧豎遺燼酷不如王孫裸葬良亦足

觀獵

青徐十月天色黃欲雪未雪雲茫茫將軍馬肥鷹隼疾草枯狐兔那能藏良家子弟盡驕悍彎弓大叫隨跳梁停鞭借問誰氏子虎符世世綰銀章或在鷹房久通籍或屬愛馬從藩王生來一字都不識割鮮豪飲鬚眉張夜歸酣笑詫妻妾鞍馬累垂縣兩狼古今治亂殊未省豈有謀策輸忠良一朝親故相薦拔起

家執戟齊駕行剖符作郡擁旌節炙手可熱勢莫當
儒生心事良獨苦皓首窮經何所補胸中經國皆遠
謀獻納何由達明主獵徒一出專城居慎勿平原輕
獵徒

次韻酬盧道士

玉川有能孫濯濯看字秀義方飽嚴訓豈獨燕山竇
經史俱涉獵百氏頗搜究束髮入龍虎辭家別清漚
壯游閱山川浩氣彌宇宙颺車予北上短轅爾東走
相逢豐沛間振袂拂長袖任城枉新詩字字相勉懋

聯翩風雨快磊落金石奏精靈信方剛稱賞寧敢繆
吾聞青牛車疇昔出關右著書傳尹氏良遇非邂逅
憐君好道篤有志功竟就當爲君子儒必變九夷陋
吾言倘未孚行哉豈求售

藝文監丞高堯臣夢元冥子偕游瑤圃賦游仙
詩一首次韻

至人合元化燕處形神清天風西北來羽駕秋雲輕
自道元冥子意適東南行東南絕遼海玉樹多奇英
崑崙隔其西况與弱水并宮闕皆黃金五洲峙元瀛

誰能造其間擾擾徒心兵幻化了不悟終始尋虧盈
狂馳百年內豈識仙人城於焉有真樂求我非色聲
夜月輝碧草晨霞散朱櫻太賓鼓瑤琴子晉吹鸞笙
上有飛龍吟下有白鶴鳴以爾絕華念領首相逢迎
但見虎豹關神官結長纓鈞天逸餘響曲終復誰賡
頻視大瀛海萬里搖空明元冥載言笑此路當重經
假爾赤鯉歸遠逐琴高生夢回北窗下慨嘆薄世榮
披衣望霄漢耿耿空含情

玉堂諸老賞梅花於唯貫精舍伯生先生即席

賦詩和者成軸明日僕始知之次韻聊發唯貫
主人一笑

江南臘盡梅殘後冀北春深花正開窈窕綠花天上
見聯翩青鳥海邊來西湖夢斷迷烟雨東閣詩成費
酒醅文會我遺應自笑好耕耘處久汙萊

夜坐次韻于仲元

踵息方鴻濛深心了無着天街鬧燈火車馬紛倚薄
喧靜理固殊趨舍由所學置此兩忘言風簷自鳴鐸
代嗣天師題所翁九龍圖

滕中但愁辟歷隨昏濛一旦飛去蒼旻空

次韻題墨竹

黃景高所蓄墨竹凡四軸其一子昂趙公所
作伯生虞公題之其一息齋李公所作復初
元公題之其一員嶠李公所作本心周公題
之其一嗣天師太元所作思本題之俱用伯
生韻

我屋琵琶東清溪轉山曲天風度林梢泠泠韻蒼玉
金鋪颺庭戶絕勝簷簷谷失脚京華塵慰眼見疎竹

天人有天趣寫作淇園綠誰夸千畝多意足寧半幅
故山春雨深濕翠峯六六對此意茫然南飛愧黃鵠
寄玉隆宮道士秦古閒喻山雨

南州高士在西林萬里相思去夢尋生米渡頭春浪
闊采鸞岡上暮雲深丹藏石鼎溫溫透酒熟山瓢款
款斟應笑天邊未歸客蕭疎華髮不勝簪

春日書懷呈主教大元閒閒二真人

雲邊候鴈感征夫老去悲歡覺倍殊春入故園催筍
蕨雨荒南土張蘂蕪無心戀闕緣多病有夢還家喜

載驅早晚皇恩下元省歸舟隨處是蓬壺

寄猶子世權

倦遊何處不思家問信空傳海上查遲莫不妨梅有
實平安尤喜竹無花高車駟馬非吾事剝水殘山玩
歲華卜築可能勝舊業詩書勤苦是生涯

訪李漑之學士不遇

山人帶雨來相訪學士朝天去未歸乾鵲遶簷通喜
氣遊絲入戶靄春暉光聯卿月唐黃道瑞應文星在
紫微聖德惟新無闕事知君補袞用工希

記夢

憶昔慈親屬莫年
明璫翠柏插華顛
燕山夢裏從容見
忍向東風聽杜鵑

代嗣天師送陳莘隱歸閩中歌

有叙

陳莘隱志于道者也
自閩中來京師凡二十餘年
公卿大夫與之游靡不加敬
而卒莫有能羈之以名汙
之以利者
非有得夫道而能至焉者否也
一日告別
謂將歸其鄉而終老焉
予嘉其爲人乃爲之歌以贈
之其詞曰

伊閩山之大兮既峻深而益奇閩之水兮清且漣漪
隱居而得其趣兮何羨乎太華之巍巍彼希夷之高
卧而有待兮要終歸于道而無爲爾泛覽而遐觀于
兩都兮當聖明之盛時羌被褐而懷寶兮望閩山而
言歸薄流俗之詭激而競進兮獨撰轡而南馳食其
土而韜其光兮與松喬偕仝而相追道吾道而問訊
兮質吾言之希微觴流霞而擘麟脯兮指五洲以爲
期昔宣尼之浮海而求從兮登仲由而進之爲吾徒
而得吾志兮舍斯人其焉推

寄贈藏六處士林恬齋

見說閩山八十翁蕭蕭綠髮更方瞳一從起處先天
見六到藏時妙理窮胎化鶴飛空掩冉踵深龜息正
鴻濛知君不羨莊椿壽道在崆峒石室中

先天乾居正南其數爲一天地定位也後天乾
居西北其數爲六父母退藏也

題雪洲

空明萬頃絕纖埃惟見飛鴻去復回沙上黃蘆欹玉
樹磯頭蒼石見瑤臺銖衣縹緲江妃下寶藏輪囷海

若來此地竟無車馬到人間誰信有蓬萊

代嗣天師題雪舟

海上仙家有鳳麟琪花瑤草四時春尚嫌碧色浮黎
土故把天瓢瀉玉塵

清明日感興呈元德真人

天邊爲客遇清明慙愧壺觴不用傾午夜松楸頻入
夢舊時桑梓更關情青春慰眼駸駸過白髮欺人故
故生何日歸來重侍席看雲亭上話京城

元德真人連枉二詩下教且分上尊見餉其二

章有山閣看雲之約再用韻以謝

蕩漾春光照眼明感時懷抱向誰傾
黃封遠餉憐羈思青眼相看薄世情
曾事金丹聞至道更求鴻寶學長生
懸知山閣看雲處不羨樓居在五城

元德真人三和清明詩韻歸興浩然復用元韻
賦兩章以勗桂冠之志

軟紅塵土暗春明遊子紛紛意氣傾
塚上麒麟勞遠夢山中猿鶴愧深情
著書長羨東臯子攜手寧忘北郭生
雅量定應同此樂歸心日夜遶江城

皇都霽色映空明却憶江南積雨傾羈旅了無行樂
興家人應悉未歸情天邊雨露兼榮辱海上風濤寄
死生杜宇不啼須有待佇聽環珮出灤城

紫清真人薄暮見過凡再跋燭語未休深謂予
苦吟五用韻解嘲

篝燈相對夜深明話到參橫斗半傾鉛汞工夫端有
術詩書事業未忘情鑑湖已作真狂客飯顆還譏太
瘦生若向豐年求至道夫容何處有仙城

伯生學士見和僕與李學士詩紙尾批云已與

漑之約紅梨花開當往訪也卧病不知春事淺
深清明後四日聞紅梨花盛開復用清明詩韻
呈元德真人伯生漑之二學士

紅入梨花媚更明黃鶯飛下眼頻傾玉容帶酒含春
色絳袂迎風感物情幻化可能窮妙理追歡聊復得
浮生開尊爲報虞夫子莫待繽紛雪滿城

送真主簿歸閩中十韻

西山叅政之五世孫

四海真夫子能孫見老成席珍曾待聘經術早知名
意氣追前哲辭華啓後生一朝新渥重萬里故鄉榮

芳草勤鞍馬光風卷旆旌卑棲無俗態凌厲有家聲
報國心須切居官志在行豈能淹驥足必竟展鵬程
健翩翩起倚蘭葉葉明求賢當此日早晚看登瀛

次韻答趙同知魯詹二首

相逢玉樹照人明幾見金盆落月傾冀北春天長作
客湘西夜雨若爲情風雲變化真餘事湖海棲遲寄
此生詩酒可能道遣得又隨車馬出都城

萬里思家共月明知君心逐水東傾雲邊候鴈驚春
事馬上朝鷄感宦情莫作脂韋終玩世寧從麴蘖自

全生何時擺落功名念歸釣湘江綠遶城

清明後四日紅梨花開用明字韻賦詩一章奉
邀虞李二學士以踐看花之約元德真人且屬
和矣學士竟不至又六日風雨大作花已委地
依韻再賦一章呈元德真人并簡二學士

霞卷雲舒映樹明花如嫵媚向人傾仙翁染翰饒詩
興學士停驂傲物情有限光陰春事老無端風雨莫
愁生明朝掃地紅英遍却待尋芳出鳳城

都中春莫次韻酬丁元善

燕山穀雨全無雨遊子紛紛載酒過輦路塵飛芳潤
少官河水滿綠陰多墻頭厭見千秋影馬上時聞敕
勒歌歸興已隨春事去嬾吟猶自和羊何

秦翁壽詩

監察御史元卿之父

太行之東有洺水恒潭閒氣鍾清美系傳秦仲著名
門積善固應生令子乃翁八十更康強炯如巖電雙
瞳方三壽作朋稱古昔龐眉昆弟羅中堂兒歸上國
拜家慶斑衣晝繡交相映滿床簪笏耀鄉閭俯僂踰
垣畏明命如翁盛德那可知天開壽域增期頤兒當

勲業滿天下榮封大國長熙熙

擢歌

友人于仲元詩仙也居崇文宮檀雲錦溪之
勝命工繪爲圖携至京師翰苑諸公皆爲擢
歌以美之仲元徵予同賦爲作十首

雲錦溪頭春水渾桃花泛泛出前村維舟便欲尋源
去怕有秦人百世孫

雲錦溪頭烟樹多隔溪時聽采蓮歌調冰雪藕正行
樂急雨翻蓬奈若何

雲錦溪頭秋月明芙蓉兩岸擁霓旌一聲白鶴來何處縹緲群仙下玉京

雲錦溪頭釣艇收雪花搖蕩玉光浮來來去去亦何事莫是山陰訪戴舟

雲錦溪頭遊冶郎雙雙馬上折垂楊鳴鞭忽去不可執酒旗高處吹笙簧

雲錦溪頭翠靄空垂綸嫋嫋弄秋風水光山色日夜好髣髴吳歌在剡中

雲錦溪頭山色佳東南遙指是琵琶灘高水急不易

到上有仙子餐晨霞

雲錦溪頭水拍津釣竿隨意掣金鱗吳江不羨尊鱸
美得似吾儂有幾人

雲錦溪頭宮殿開五雲深處是蓬萊群仙不限風濤
險一日應來一百回

雲錦溪頭風露清看雲亭上月三更仙翁却在天高
處萬里相思共月明

發都中

疇昔居上京結交翰墨場壯志日以舒歸心已遺忘

重來感斑鬢故舊半存亡但見浮雲馳終風自飄揚
登高縱遐觀到景垂精光神州擁元氣瀛海翻微芒
浩然發幽興駕言還舊鄉回首金臺巔耿耿遙相望

通州

王畿昔全燕東郊控遼海巖巖左馮翊并邑故莫改
白河繞城東榆關阨其背舟車沸崩騰倉庾高嵒崑
朝聘通九夷制度垂萬代沈思明良會神功耿猶在
伐石著銘辭清時尚誰待停舟獨悵望過雨聊一快

直沽口

直沽海水白黃流汨其涯斥鹵滋蔓草腥氣襲流聚
蚊蟲感陰氣育此固所宜喧囂集群醜落日常蔽虧
利觜甚蜂蠆馬牛苦瘡庾居人不安寢耿耿思晨曦
叩頭問天公善惡豈不知善類世恒少惡物繁更滋
天公竟無言去去良獨悲

觀海船

大舶乘天風蓬蓬轉溟渤歲遭千萬斛彌旬徑燕越
歸虛浩無底九首爭閃舌操舟失常度千夫共淪沒
盧溝道金水太滄云帶金闕直沽環海澨地利殊未發

屯田信良謀經國在明詒王畿苟殷富飛輓誠可輟
聖明仁如天忍使民力竭鄭白亦何人誰當繼遺烈

長蘆鎮

長蘆際東海海水日夜盈斥鹵白皓皓窮年事煎烹
舟車徧燕趙射利俱營營官鹽苦高價私粥禍所嬰
里胥肆姦販均輸及編氓食貨實邦本損益偕時行
竭澤匪中道無乃傷其生丙魏垂休光宏羊竟何成
至順二年夏五月二十八日自通州登舟南歸
連日陰晦涼如深秋六月八日過陵州風雨寒

甚清晨可以挾纊

陰陽失調燮寒暑不復常時當三伏中詰旦如秋霜
浮雲蔽白日錯莫無精光鶉火慘不舒祝融竄遐方
颯颯風雨至海氣侵肌涼蒿師向我言怯此單衣裳
盛夏資長養反常即爲殃平心憂國心願覩斯民康
天公果無私曷以贊我皇安得生羽翮上訴摩穹蒼

御河

御河注東北汨汨如濁涇流屍日夜下水氣爲之腥
飲食常嘔吐欲住不可停舟子向我言此輩皆天刑

東吳沒巨浸食及蒿與萍死者十七八存者多飄零
爲奴逐商賈疫癘剝其齡脂膏飼魚鼈魂魄遊滄溟
守令肆豺虎里胥劇蝗螟廟堂列臯夔直以遠莫聆
繡衣自天來號令驅雷霆遺民願綏輯庶用荅皇靈
舟中讀書懷趙全陽

舟中了無事時讀古人書眼暗苦字細置之復躊躇
憶昔自北歸目力尚有餘望雲數飛鳥臨水閱遊魚
俯仰七八年氣血日不如裁和鞭六龍歲月猶驅車
學道事已晚胡爲昧其初懷哉全陽翁所寶真璠璣

臨清會通鎮

世皇一文軌強幹隆中都鑿渠枝汶河畚鍤勞萬夫
北流過大野鄆博咸歸輸浩浩六百里遠近牽軸轆
南金出楚越玉帛來東吳梯航畢山海異狀爭睚眦
天府日以盈九州靜無虞神功絕今古聖德不可模
此地實衝要晝夜聞歌呼會通錫鴻名萬代稽典謨
穹碑照闐闐列肆吹笙竽過客立亭下行行復踟蹰

臨清水滿草萋萋龜鼉紛紜白鳥飛七澤魚肥鷹隼

少多應相逐向南飛

黃鶯

楊柳陰陰兩岸齊
斜牽百丈過莎堤
方舟野渡喧爭處
午夢醒來鶯正啼

驟雨

疾雷驅雨過東昌
柳下維舟喜暫涼
市散人稀風寂歷
獨餘雌霓伴斜陽

聞蟬

綠槐高柳護溪陰
盡日新蟬嘒嘒吟
却憶靖通深竹

裏薰風時復聽瑤琴

梁山泊

大野傳禹功厥浸連魯衛翳蒼涵虛休蒼茫溶漚
濟陰極東原連雲浩無際昔爲大盜區過者常裂眚
今爲堯舜民共樂太平世運河經其中盡日聞榜杙
憶昔淮逝遊潏潏環水蒞園田千萬頃蓄泄時啓閉
比屋皆陶朱紅陳溢租稅於焉有明鑑不必勞智慧
苟能用斯術富庶良可繼吾言匪迂疎安得躬獻替

木筏

梗楠出楚蜀材性堅且良都邑營塔廟致之極遐方
一筏貫十木十筏爲一航疊鼓促牽挽聯綿百夫行
其北及淮泗其南過山陽令佐迭迎送崩迫如驅羊
候望久不至彌旬裹餽糧旣至斯服役揮汗猶翻漿
孰敢問農圃饑羸固其常舟楫或相遇剽掠無餘囊
商賈俱遠遯騷然日搶攘聖明憂黎元事佛微福祥
奉命失厥度所至罹禍殃吾聞佛慈悲必以報我皇
自茲絕水旱歲歲成豐穰大哉堯舜君允矣斯民康

秦郵道中

客行秦郵道觸目增慘悽死人亂如麻肝腦傾塗泥
草屋半頽壓牢落如雞棲一室四五人骨肉同顛擠
狗彘既厭餒烏鳶亦悲啼腥風徹雲漢沴氣干虹霓
問之何爲爾苦饑食蒿藜春夏生疾疫累累委溝谿
親戚俱已沒他人各東西過者皆擁鼻我何獨酸嘶
掩骼著經訓仁人詎終迷安得元結輩惠化周群黎

孤兒篇

孤兒可六歲赤立古道邊逢人即下拜哽哽聲淚連
父母俱疫死閭里相棄捐兒生不自保旦夕歸黃泉

爺孃救兒命感戴期終天下馬一撫之中腸爲憂煎
裹飯旣莫及揮金諒無全我欲以爾歸翻恐成禍愆
疫癘有薰染世俗交相傳去去復回顧涕泗俱潺湲
夜宿邵伯驛展轉不得眠中宵急雨至殺氣風雷先
念彼曠野中孤兒死誰憐守令美輿服日事扑與鞭
妻孥自殉殮撫字心茫然采詩俟王命聊著孤兒篇
棄親行

金陵城東八十里龍潭江上南山趾積樞從衡滿道
旁不封不樹惟荆杞朽者暴骨沾泥沙近者尸蟲出

棺底天陰雨濕狐狸嗥炎赫煖蒸蠅蚋起問之耆老
此何爲具道東南風俗鄙貧家死喪無餘地火葬不
如風葬美置之原野任飄揚子子孫孫那復視月深
歲久爲黃土安在烏鳶與螻蟻北盡淮南南及越習
尚猶來斯久矣官今乍見爲驚嗟終返空無非恠傀
聞之心動毛髮寒異俗居然無顙泚此地昔爲吳越
區系傳古聖宗姬似五馬渡江文物盛中華士族多
南徙養生送死禮猶存作俑何人胡乃爾昔聞海上
有茶哇歌舞送尸云祭鬼鬼享即爲禽獸食親與鬼

諧心則喜尸完不食翻悲泣王化不漸何足齒吳兒
甘分習茶哇仁者固應知愧恥長民自古需賢才易
俗移風著青史誰當傳此棄親詩願與斯民振頽靡
李冬雷雨彌月暖如春中

至順二年冬陰陽益驕寒時當復爲臨已覺寒氣淺
威發無希聲泉源有餘泣崇朝急雨至永夜奔雷轉
翳翳逾兩旬濛濛失蒼巘溪流與平陸咫尺不復辨
田家最愁思歲莫饑凍剝頻年苦饑旱租稅詎能免
方春待于耜所望心力展胡爲甘澤旱常恐未夏鮮

舉頭見浮雲浩浩那可寡貴賤永相望華筵正沈湎
至大四年辛亥予年卅九承應中朝奉詔代祀
海嶽冬十二月還京師與歐陽翰林同舍守歲
賦詩和東坡龍鍾卅九勞生已強半韻至治元
年辛酉又與歐陽偕留京師除夕用韻述懷邇
來十年春秋五十有九矣感今懷昔追和前韻
呈秦古閒喻山雨諸友

人生百年中哀樂每相半誰云學道者亦作逝川歎
翻思昔所經顛倒供戲玩過眼如春華旋空逐雲散

浩然賦歸來甘與麋鹿伴情親獲益友啓沃資月旦
通來十餘年篇章已堆案去歲復北轅心緒苦紛亂
今茲遂初志如熱得清盥白駒駛流光羲和敢稽緩
明朝盈六十甲子若魚貫怯夫不知奮勇士寧肯懦
一氣存吾中丹爐擁紅炭諸君文字飲亦足張真館
從渠北風勁共愛南枝暖添年有青精保此三英粲
辛亥歲所作

七十古所稀四十過太半蘇公已聞道尚作龍鍾歎
吾生亦有涯胡乃爲物玩京國何淹留萍蓬悲聚散

海嶽崇明祀久失樵牧伴驛騶駛康莊不寐幾昏旦
歸來見天子紅雲擁香案觀風使臣職詎敢陳理亂
栖栖分幽屏耿耿忘梳盥歲事忽崢嶸坐使衣帶緩
起予得良朋剖析精唯貫長才發英華高節振孱懦
更闌語未休豈復計薪炭守歲亦云樂椒觴開孤館
頓消殘臘凍行迓春陽暖霜鍾萬戶動一笑三星粲

辛酉歲所作

買臣負薪時百歲殆將半富貴需何時行歌匪長歎
太白真仙才風月飽清玩行年四十九往事逐烟散

知非不可復乃結雲水伴念念營丹砂吸景在清旦
二賢餘事業史傳列公案修名蓋今古景行照衰亂
吾言適爾同上國屢觀盥舉首遙相望鞭策寧敢緩
丹心日星麗精義金石貫斯人亦何人自奮豈頑懦
況逢聖明時清夷異塗炭致君非吾事探賸志元館
共茲松柏寒勿羨桑榆暖斐然賦新詩發子一笑粲
賦詩之餘見者咸謂僕殊無白鬚不類六十歲
人明日元旦遲明山雨和韻已至清麗可愛用
韻再賦一章呈諸友

常時六十翁鬚髮白居半攬鏡尚黑髯堪憐復堪嘆
平生四方志豈爲兒女玩龍門見河清衡嶽企雲散
邇來三十年多病惟老伴曙鼓啓重門陽和又元旦
火城列銀花投刺紛几案遙知闥闥中雜踏車馬亂
吾儕分幽棲何事躬薦盥雲霞映鳴珂頗勝佩韋緩
竹宮叅祠官盼蠻義同貫却憶少年時剛腸嫉柔懦
於今定何似落落灰中炭可人數君子講肆同茲館
吾衰任自然豈復計黔暖起予得清詩玉齒爲君粲

次韻答程竹逸

勞生閱百州，轍迹天下半。過眼秋空雲，徂年復何歎。
結交空四海，敢以人物玩。相知恨遲莫，每聚隨復散。
豈忘鷗鷺盟，寧逐鵷鴻伴。夫君河南裔，信哲明旦旦。
諸郎盡瑰偉，湖連紛在案。邱園有遺逸，砥柱俯零亂。
義勝忘邊幅，神清聳巾盥。扣門蹴春雪，頗恠馬蹄緩。
論文見雄深，於道實同貫。大音振希聲，感發存勇懦。
灑灑聆霏屑，溫溫擁爐炭。明朝寄新詩，翠墨照瓊館。
落月屋梁間，光風散餘煖。欲和不成吟，寒燈翳復粲。

次韻答程從禮

竹逸令子

汗牛五車書讀者誰能半才難古云然於今復何歎
晚歲得程生桓圭屏珍玩既見心則降忡忡百憂散
歲寒松柏凋投老資爾伴別來心炯炯命駕常待旦
遺我英瓊瑤報之青玉案高堂聳靈樁風葉森不亂
連篇枉佳句每讀必先盥君今醫國手千古躡和緩
雄文大江流浩氣長虹貫友道知損益儒風振庸懦
戰藝期高秋鋒鋩出爐炭從來廊廟器亦自諸生館
行看步青雲德布陽春煖故交諒無忘方外師可聚
從禮一和三章字字精粹鈍根纔答三章復至

愈出愈奇其一論文敢不退避三舍其一論道
因據所得答之其一詫僕遠遊輒序出處述懷
共成三章奉謝

聖人自生知尚著數學半況我昏愚人臨文漫嗟嘆
來詩語絕妙字字足奇玩雲霞乍舒卷風雨歛飄散
鮑謝難爲工陰何敢求伴藻麗彌春空清明旭秋旦
鈍根尚遲回敏手分滿案所愧非錦心搜枯轉煩亂
譬如汲甕井汙濁那可盥應鱗巨源踈勿恠安石緩
文章雖小伎於道同一貫羨君正而葩發我庸且懦

孤坐挑寒燈長吟續銖炭老柏隣虎溪元關隔儒館
東風忽回春一夜衾裯暖相思如見君梅花耿孤粲
憶昔年少時醉遊日叅半忽忽思娛嬉何曾識悲歎
行行遠求友河山飽經玩鵬南風翮舉馬北霜蹄散
五十纔知非羈孤復誰伴畏塗久冥行旭日喜方旦
精微得心傳糟粕笑書案已知泥絮定肯逐風花亂
無營復何思不垢焉用盥憐君多道氣此志那可緩
孔李昔通家宗乘本相貫來詩見深情砥礪匪頑懦
在宥觀其生陰陽日爲炭翻然真我從崆峒有珍館

蕩蕩天風寒溫溫日華暖吾師豈吾欺丹光已於繁
中年客京華讀書至夜半每觀聖人心掩卷自三歎
予時正求友珍寶非所玩翰苑多名公車馬紛聚散
暫違巢許鄰頗愜夔龍伴匪伊聲利求造請尚昏旦
有時直承明咫尺御爐案年華迫衰鬢坐見秋蓬亂
乞歸叅祠官征塵喜新盥傾蓋欣相知掃門敢迂緩
聖學尊程朱萬殊理融貫吾衰尚能勇爾壯夫豈懦
出處雖不同論心豈冰炭賓王昔天衢樂道今元館
九霄風露寒斗室烟霞暖得失勿復言簷花一燈繁

早春水漲寒甚

三年建寅月沴氣常鬱蒸十日九雷雨泉源盡奔騰
夜月纔舒光朝簷復如繩朋儔絕來往車馬憂凌兢
滔滔覆江海浩浩迷邱陵未聞驚蟄先有此巨浸乘
北風間號寒泥濘兼輕冰疫癘逾二載凶荒苦相仍
冬春反常令經訓良可徵坐令憂國心耿耿忘寢興
燮理在元宰臯夔已同升凝情望天北回斡期三登

崇仙觀

神仙出東晉靈迹遍荆揚太史開錦帷老柏何蒼蒼

弟子餘十人英聲各輝煌烈烈神惠君炳靈見真陽
松篁擁樓觀烟霧披巖廊丹成井竈在零落栖餘香
千載如一朝福被斯民康所以恢學徒精修道彌光
今辰拜遺像感此日月忙刀圭儻可求稅駕終徜徉

崇仙觀次韻壁間留題

真人化去幾時歸吊古休彈獨掩微任法至今悲衛
鞅說難終古薄韓非應知筮仕多零落爭似求仙自
奮飛千載神交惟此道從教世上有危機

遊真陽山得聶鏞得一二生妙齡知學以詩來

見辭意勤至非欲速成者賦十一韻以答之

昔有皇初平學道弟兄偕道成摠仙去金華薈崔嵬
真陽名古山人物多瓊瑰二聶方秀發烟霞滿襟懷
新詩力追古字字勤敲推嗟予忝先覺稟性寡所諧
以爾道心固嘉言勿嫌猜精心去蠱賊勵志除蒿萊
嘉穀日以滋天光豁然開換骨知尚時仙凡信遼哉
雲端謝平起今古皆奇才

寶豐山

道書華蓋三仙君所治

走謁華蓋君迢迢萬松嶺雲霞散朝輝霧雨翳陽景

猿啼山更幽鳥哢日初永躋攀足彌倦接遘心已領
樓觀空崢嶸嵐光襲衣冷入門何所見綠草聚鼃黽
藩籬藉荆榛夜宿抱虛警晨炊拾墮樵清絕異塵境
紫筍供長劉甘泉出修鯁野人尚營營我意獨便靜
黃房息深深虛室光耿耿亦欲從茲遊悠然視其頽
贈始豐山道士陳此元道書始豐山第三十七
福地文始真人尹喜所治唐神仙文蕭吳采鸞
於此修煉今爲仙林觀云

十里幽尋到洞門藤蘿竹樹費攀援長雲杳靄鸞駢

遠瘦石嶙峋虎跡存共愛文蕭成妙合誰從尹喜問
真源高人又見希夷子一笑無言道更尊

遊始豐山道士陳此元出示往昔於閣阜山所
得元德真人妙墨珍藏二十有三年矣自謂傳
家之寶賦五十六字以歸之

當年仙馭下凌雲落紙雲烟妙入神弟子尚留真蹟
在山靈長護墨光新淵珠借媚榮丹室石玉含輝照
翠筠早晚六丁還取去赤書元自屬天人

奉和留題閣阜山詩韻寄呈太宗師元德真人

憶昔從師似夢中，明禋盛典已無同。
棲遲霧豹真吾事，上下雲龍賴此翁。
金薤琳琅清曉露，玉階環珮紫宸風。
留侯早棄人間事，回首神山是故宮。

遊沖元觀道士孫元元出示吾友薛元卿所賦
絕句清麗可愛，依韻輒賦三章，時璽書范衛元
教蠲徭役，故首章及之。

零露瀼瀼被蓼蕭，山林無復苦風飄。
道人細讀黃庭罷，擊壤長歌答聖朝。

飛空何處覓文蕭，嶺上松花只自飄。
風靜月明笙鶴

過恍疑仙子夜歸朝

溪女簪花只艾蕭
山翁吹帽雪飄飄
分明自得漁樵樂
不識人間有市朝

贈墨客孫心淵

子荆有雲孫
隱處異流俗
山連姑豐青
池分劍江綠
雲來幽興長
水漲春意足
元元守家學
不受塵事感
遠致徂徠松
霏烟翳清旭
元霜出杵臼
翠餅照華屋
揭侯吾畏友
稱賞惟爾獨
韋李雖擅場
於今定臣僕
奎章啓文運
一藝必甄錄
萬里行奮飛
無爲守空谷

寄黃中菴

寶豐山下黃君則句曲峯頭許遠遊
一種仙風兩夫子更於何處覓瀛洲

太一雷師許共叅別來長憶劍江南
如何一片雲邊路不見黃公不壞菴

聞說巾車向撫州官情何事苦綢繆
懸知後日相尋處擬峴臺高月正秋

富州行

富州城中雨翻盆富州江水侵城門
三冬常苦風雨

惡兩月不解雲雷屯驚蟄已過平聲春未半白波浩
漾無諸村寒氣憑陵失暘谷殺聲排蕩摧崑崙蟲蛇
滿地憂凍死草木已茁何由蕃田家舉趾迷畎畝飲
食顛倒傷精魂紆金太守在華屋一念忽復憂黎元
酌水熏香走祠宇從官雜沓咸駿奔黃冠釋子出經
像苟欲以此排天閤氛祲從來自乖戾回天有道須
討論似是天公憐赤子詰朝已見扶桑暎五風十雨
願終惠稽首再拜天何言

湖田

湖田春水漲遠近富魚蝦浪接雲邊樹風回海上查
翁云深畎畝浩蕩失津涯農事嗟何及豐年望更賒
元同文室六詠

瑞香

密葉舒青蓋繁花點絳唇幽香滿庭院桃杏敢爭春
綠萼梅

野興青邱鳥豐姿萼綠華瑤池別王母來傍列仙家
紅梅

丹霞蒙素質絳袂掩清芬一與佳人別窗前忽見君

幽蘭

劍光千萬葉玉色兩三花珍重幽人操同心越歲華

黃木香

枯株便愛日嫩蘂怯清霜風雨三春莫荼蘼不敢香

百結

百結逢春日數花迎曉風道人無个事笑爾獨忡忡

黃堂隆道宮次韻陳秋巖所題

家住逍遙儼鄭鄉尋真聊復過山陽千章古木連雲濕一種靈茅沁露香仙道猶推師道重歌聲還共水

聲長颿車歲歲瑤池會流俗何知有底忙

寧州太清觀厄于火且三年高士黃自牧焦心
瘁躬走謁檀施期底于成訪予玉隆賦詩二十
八韻見遺即韻答之

瓊旌堂上森圖書十年燕居已忘吾坐見朱顏生白
鬚逢人自笑山澤臞外視不足中有餘顧影窈窕憐
羈孤道人閱世周五湖滿襟風月真吾徒彈鋏歸來
食無魚過我非爲利名趨背負錦囊從奚奴自云力
耕闢荒蕪道喪交情誰笠車邇來奔走無安居翕赫

炎火中焚如耿耿樓觀成邱墟赤水居然索元珠突
兀何時見其廬幾向秦庭哭包胥歲月擲人催柳蒲
世事擾擾更榮枯勿念昔有傷今無時來不煩折簡
呼瑤臺玉宇須凌虛翠炎穹龜照山隅黃房自足寧
君軀豐功盛事端可模丹成千歲還清都

次韻答劉存菴

玉樹淮王後如君有幾人隱居便地勝樂道見天真
雨霽千山曉風和萬象春求賢當盛世早晚覲楓宸
隱者陳元亮故宋太守杉溪之子也有令名予

未之識一日賦詩一章寄玉隆道士陳雲隱高
古可愛次韻以奉雲隱併寄元亮

有客何人斯揮毫落珠玉文章事經濟胡乃在巖谷
知人視其友風月富隣屋陳子夙相親抱被或同宿
朝來誦佳句溽暑快新浴山中十年事歷歷如轉燭
獨餘詩酒興清絕映林麓彼美那可期君應往來熟
義勝中無營環堵恒自足我欲往從之峴嶽畏山曲
馮高挹西爽秀色窗戶綠五陵佳山水是處可游目
達士輕去留反招有遺躅何事盡吾簪莫作龜藏六

歐陽南還陽得官廬陵郡幕歸自都中有作見
寄次韻奉酬併寓相規之意云

憶昔燕山看飛雪貂裘駿馬長爲客君時獻書光範
門十日八九見顏色奉祠一去十年強君映青衫五
峯碧考書上上賦歸來雙石巖頭有新宅我北君南
巧相辟東西望望長相憶好風吹墮雲錦章玉宇無
塵得佳月天邊雨露定偏私不爾何由展奇翼廬陵
劇郡繁簡書獄訟徵呼久殷積大才小試須重慎勿
謂直尋斯枉尺仕止隨時合經訓言行悔尤疑殆闕

文忠祖武未云遠
儒術傳家必清白
期公勲業滿中朝
燄燄輝光照天北

新昌貢士姚濟川楫道出玉隆賦詩來見即韻
答之

廣寒宮闕高無極
老桂吹香自開闢
世上空聞顧兔靈
翟公不作誰能識
綠髮朱顏姚氏子
高歌歛逐風雲起
仰天攀桂遇明時
九萬扶搖斯至矣
學優筮仕豈徒然
以道濟時心契天
定見聲華滿南北
班生步武榮登仙
健翮圖南一吹息
五鹽山水生顏色
重來

訪我錦帷中撥棄塵緣參道一

安成貢士周敬修惠詩次韻

皇元啓休運文物粲金玉道統系春陵大賢匪私淑
賓興下明詔多士紛場屋有客西南來渥丹映晨旭
雖逾知命年未改雙鬢綠長才浩河漢筆陣輕尺牘
自云全相國禮下肯推轂君須慎儀矩未敢脫邊幅
粹然廊廟姿豈復在空谷旦夕金榜縣彈冠喜新沐
今辰感良會共此泛萸菊射策期春風承恩炫朝服
燕雀徒紛紛焉能識鴻鵠吾方守舊邱放鶴自騎鹿

既醉欣太平非關飲醕醑期君恢遠業德澤均草木
定交勿予忘高歌對銀燭

敬修再賦長句見贈次韻

晉柏千年聳奇恠遠並甘棠應勿拜旌陽神劍橫秋
空六合蒼茫九州隘昨夜鸞驂還故里雷師頌洞風
雨快朝光入戶寂無聞收拾神功歸上界憶昔朝天
出清灝珊珊環珮勝銀艾頗看萬象雄森羅動地鈞
天等秋噫奉祠南下得逍遙索居朝莫聆虛籟尚友
如君同臭味便應崔沆知崔溼高秋戰藝淬文鋒意

氣雄豪輕勝敗大器輪囷異瑚連旣種亦須謀旣戒
中州文獻羅星鳳子亦矍然起江介青紫定知成俯
拾巧官誰云俱狡獪飛黃騰達際明時記取任棠陳
水薤道傳太極有家聲木鐸淪淪振聾聵我住雲林
君勿羨晦明晝夜舒圖畫杏壇柏殿摠清安君系儒
宗吾道派送君無物止新詩嶺上白雲非可賣

敬修集天下同文以壽諸梓用前韻賦詩一章
求賢於予次韻

英雄昔未遇纓桂炊白玉終然位卿相德望豈不淑

抱道復何求公寧厭茅屋蹇驢與破帽步月待朝旭
知音苟無人燕石迷結綠傾蓋方論交新涼累篇牘
嗟予守祠官短褐異華轂愧非原結施安得孟宗幅
大哉同文集搜括遍山谷訓誥雜風雅窺觀必熏沐
藻麗敷春雲幽芳散秋菊鋤鏝事銖積異好匪奇服
象罔求元珠桓榮致翔鵠幽尋到真館已候夜鳴鹿
勿言天外事且飲盃中醪富貴非公誰榮遷定喬木
他年玉堂仙烜赫金蓮燭

題宜春山水圖贈謝景初

昔年仕昭萍地入吳楚交扁舟熟來往山水多巖壑
上有宜春臺雲烟俯江郊輕別忽三紀光陰如石敲
謝生持卷來訪我松雲巢云有羅稚川筆力驅騰蛟
生綃半幅間曲折藏泓坳摩挲識曾遊峻路平林梢
五臺互轆轤三峽爭叅巢秀氣何所鍾英姿匪管茅
進德須及時青春無自拋歸哉有餘師世俗徒嘐嘐

送楊廷鎮總管歸全州

江西省檄考試竣事歸治所

全州太守楊夫子經術傳家世共稱化並文翁臨蜀
郡仁推元結在春陵清湘浩浩恩波潤喬嶽巖巖夙

德升聖治維新求舊日佇看威鳳早騫騰

送董文壽還山

文壽嘗師金野菴學道

我家龍虎山秀發山之南聖井羅諸峯群仙列雲菴
龍泉啓華構樓觀何耽耽種杏聞董仙綠毛已毵毵
邇來有雲孫勝處多窮探訪我騰勝天元微志同叅
道超太極先一理中函三夜氣方鴻朦蟾光映秋潭
可受不可傳吾言非高淡持歸問金子自言吾無慙

贈道人周無情

周生學老氏而以無情字爲人苟無情木石復何異

猶龍五千言亦曰絕仁義三寶先慈儉慈愛情所寄
聖人愛道喪矯激有深意學徒得其偏直以情我累
性情自天稟應物無險詖於焉致中和化育贊天地
斯今胡不然無乃果自棄爲作無情詩勗我爾賢知
無情得詩謂予正之以中庸之道未盡無情之
義復作八句偈以贈之

道人本無情悲喜了不系飛鴻雪泥跡去去那復計
一月涵萬川何曾與俱逝吾知無情真爲說無情偈
天寶洞天贈支鍊師

南紀多名勝西山得具瞻千峯迷遠近百里見洪纖
突兀仙家出巉巖洞府兼瑤池青鳥去碧海紫鱗潛
神物儲金盞騷人詫玉簾龍光騰瑞靄鶴影轉晴檐
吳許高風在曹盧宿衛嚴旂幢彌棟宇蕭鼓走閭閻
祀典邦家重祈年水旱占蕭壇通絕頂罕廟類孤尖
丹竈風煙合芝田雨露霑修篁吟鳳味蒼檜亂虬髯
藥島松脂滑泉剡石髓甜野花搖白氎山果落紅鹽
興遠詩頻詠歌長酒屢添幽棲羨支伯文藻愧江淹
訪古情何極尋真樂未厭他年續仙傳着我定無嫌

吳仙觀贈祖鍊師

在昔吳仙宅于今老氏祠萬山環翠阜一水匯丹池
恠石金莖出修藤鐵鎖垂重門森羽衛秘殿靚檐帷
御史三天秩真人百世師清時消瘴癘萬古息蛟螭
紫誥旌神烈元功著鼎彝銖衣分縹緲瑤草競葳蕤
鶴嶺雲千疊蛟湖月半規山靈驅象罔方士學安期
鄭谷鸞鳳嘯嵩高熊豹姿秋空騰劒氣曉露沁詩脾
上下多騎鹿逍遙獨采芝不關輕紱冕曾是畏羈羈
好客門無鍵論心酒滿卮塵緣俱擺落清事摠相宜

古字唐人韻雄文宋代碑室虛光耿耿丹熟樂熙熙
蓬閣知何異松喬定可追興來吟不盡醉筆寫榴皮
元都道士出示吾師月池翁三十四年前所賦
詩次韻以贈

上界元都觀雲關列萬松遠山晴見畫高閣坐聞鐘
未問還丹訣聊舒辟世蹤懷哉老仙伯歸去主芙蓉
道士祖竹溪見和再賦

萬古神仙宅層頭頰澗松廣寒通月戶虛白應霜鐘
化鶴寧無術飛鳬豈有蹤霓裳驚世俗却擬壘芙蓉

送蔡九思如京師

蔡子事遠遊彈冠向燕山燕山帝王宅虎豹嚴九關
經緯深軌轍飛甍結雲端珪組羅俊賢輝光照人闌
男兒負經濟白日生羽翰金臺矗千仞中道多險艱
八月寒風至客衣常苦單田園有真樂去去何當還
次韻劉明叟推官

萬古西林太史家樓臺長是護烟霞紅爐偃月留丹
訣翠柏凝霜拂劒花龍卧有泉寒不竭客來無酒夜
能賒高談一昔添詩興清絕無煩雪水茶

楚些二章爲丁石澗作

東風解凍兮草木華滋朝躋南山兮思遲遲憑高兮
騁望媿人去兮何之石磊磊兮愁予惘冷冷兮聲悲
聆雞犬兮雲中忽有無兮愈微心飛揚兮浩無極耿
思君兮淚橫臆命巫陽兮下招窮八荒兮求索神山
巍巍兮海上風波洶洶兮難即盍歸乎來兮舊鄉企
予望之兮庭柏

若有人兮鸞岡紫霞衣兮白霓裳乘瑤光兮北極拜
金色兮扶桑歲既晏兮寂寥炯神丹兮內明音芒厭

塵世兮溷濁駕飛龍兮周章周章兮何許爾高明兮
九阯音岡思夫君兮耿耿佇環珮兮鏘鏘

丹陵觀道士胡天牖約余同遊古龍宮至丹陵
胡留西山別墅宿留三日胡竟不歸賦五言二
章以寄之

一與胡公別經冬春又殘來遊鍾玉府爲問紫金丹
采藥歸何晚尋芳興未闌長吟倚杉樹日暮碧雲寒
古龍曾有約春莫擬同遊風駕成孤往聯鑣竟莫酬
山空雲冉冉風靜水悠悠尚想髯公子芳醪正獨篋

題象牙潭古龍宮

錦江東流過西原江邊老木雲水昏祠宇沈沈著靈
異龍宮設像古所尊珠宮貝闕浩無底世有漁者知
其門歲旱爲人作霖雨神功烜赫難具論紫髯道士
好事者一一演說非虛言昔有張侯作太守夏秋禾
黍傷載燔封香遣使走祠下頃刻雷電咸崩奔萬丈
橫江見髻鬣四郊甘雨如翻盆坐見焦枯變豐稔邦
家藉爾蘇黎元古今施報昭祀典誕錫爵命當殊恩
胡爲膏澤久未下肸蠁空爾流諸村廟前行客笑且

語有功不賞何其繁況復龍居異人世服食不在壁
與飧旱乾水溢靡終極蕩蕩神化天長存

題玉臺觀

冉冉春光取次歸玉臺高處閱清暉湖田水漲耕夫
息野渡舟橫過客稀篁竹籠烟饒綠暗櫻桃帶雨長
紅肥心清隨地皆仙境何用尋真入翠微

玉臺觀贈謚鍊師

平湖古觀勝山棲蕩漾波光綠打圍清磬拂雲驚曉
夢落花和露點春衣高人自得養生主俗客那知杜

德機試問謨公行道處中天積翠是耶非

贈龔鍊師師少壯偏遊江湖能役雷致晴雨其
師夏公亦以道法著名

隱君聞說夏黃公弟子傳燈已姓龔月下吹簫曾引
鳳池邊縮水試降龍壯遊自適江湖興老去人看水
雪容他日重尋應更健元關莫遣白雲封

古心萬鍊師樂道好施玉隆殿閣摧圯師將以
己財作新之奉贈四韻

唐人曾詫萬仙翁此日雲孫道益隆古貌彌明譏石

鼎野心宏景畫金籠神交蓬閣蒼茫外興入江湖杳
靄中更借廣寒修月手錦帷宮殿看成功

翰林典籍劉泰觀留題玉臺觀用工部閬州玉
臺詩韻邀予同賦

玉臺何代築尚想少陵遊勝境西南異高名今古留
山蟠龍虎勢水繞鳳麟洲髣髴紅雲近通明在上頭
泰觀別去二十年邂逅玉臺話舊信宿而去用
前韻贈之

憐君不得意又作五湖遊仕路何時達詩名到處留

濕雲迷古道春草遍芳洲去去須奇遇侯封在虎頭

題棠湖冲真觀

汝水沄沄去棠湖湛湛開苔侵碑碣古雲壓棟梁摧
有客求丹訣無人問梓材松風更蕭瑟空有鶴歸來

題招仙觀

觀乃許太史鑄劍處近年主觀章高士重新
之

唐朝古觀喜幽尋寂歷松篁護晝陰山閣雲深仙犬
吠劍湖風起老龍吟章公盛業光前後太史神功邁

古今試問道人何所學傳燈無事只傳心

南昌道中

楊花飛盡楝花新芳草連天水欲薰賣笋野人形似
鵝插襖紅音工女髻如雲煙光潋灩陂塘滿曙色淒
迷隴畝分見說田家更憔悴催科隨處吏成群

洞陽觀

江上神仙宅幽尋挂席來回風知島嶼映水得樓臺
劍爲降龍出門因放鶴開滄溟空浩蕩那更有蓬萊
洞陽道士永大中往歲識面於古洪獨見標致

秀美初不知其才能也余既題前詩大中屬和
且叙宗盟句法清新意度高古與之語好學多
藝年雖少奇才也復用前韻贈之

之子吾宗彥相思望汝來出塵看玉樹通籍在瑤臺
文史三冬足詞章萬象開求賢當盛世喜見北山萊
遊洞陽既留題五言詩宿留三日境與神會吟
興不窮再賦七言律一章

彭蠡西來汝水東層臺突兀水雲中晴天蕩蕩黃金
榜夜月沈沈碧玉宮河伯效靈鰲背穩神仙朝帝鶴

巢空洪濤不隔尋真路我欲馮虛試御風

妙有堂

南湖有孤島流水通岷江蕩蕩來天風波濤日舂撞
道人王遠徒既見心則降樓居扁妙有萬象羅紛
道人學虛無妙有豈能哢常無與常有體用非珉珏
一笑悟元理紅日生東牕

如清江訪舊出山遇雨

忡忡事行役暫喜午陰涼冒雨千山暗號風萬竅長
前溪新漲綠早稻半傳黃處處歡聲起秋成定可望

瑞州道中連日喜雨

柳岸溪橋又一程
疾風吹樹攪溪聲
蛟龍半入雲頭黑
蟬螭斜分雨脚明
客路敢辭泥滑滑
田家賸喜水盈盈
西林回首蒼煙外
共樂年豐頌太平

重遊閣阜山三十韻

縮地求蓬島
尋源訪羽人
閭形千古異
阜色四時春
殿閣縣金榜
巖廊擁玉晨
雲霞光絢爛
嶺岫勢嶙峋
寶籙三天授
鴻猷四海遵
清朝崇大教
重使展明禋
憶昔陪師馭
維時奉國賓
皇華輝曉日
紫氣靄秋旻

檄走風雷動恩沾雨露頻婁豐昭盱蜜景福叙彝倫
一別歲月久重來物象新山靈如喜客方士轉情親
楊蔡松喬侶陳徐巢許隣丰安出塵俗德望靡緇磷
笑整謝公屐還醺陶令巾追隨忘遠近登頓覺逡巡
絕頂壇雖險磨厓篆更神除妖歸正道濟世賴深仁
赫赫仙翁秩班班上帝臣高奔凌日月飛步躋星辰
故宅何年改元風浩劫振妙傳應有待良遇邈無因
綠野招猿鶴滄洲想鳳麟石存雙鯉化潭卧九龍馴
馬跡紛瑤草棊枰護翠筠林深丹竈在霧暗墨池湮

琴筑涓涓響旌幢樹樹陳空堦環薜荔精舍莽荆榛
勝事難窮盡幽棲豈隱淪何當分半畝共作葛天民
時宗師楊京山提點蔡楚山提舉陳觀心宮倅
徐心一故云

泊玉澗口

維舟玉澗口訪舊意如何地僻人煙少江空月露多
踈鐘來野寺小艇亂滄波更喜仙家近臨風想玉珂
明日入山奉宮主何簑月

釋舟行草路十里聽松風疊嶂開青瑣一溪流玉虹

神仙遺世遠祀典至今崇樓殿凌雲起重興第一功
簞月見和再用韻答之山乃梅子真得道之所

東閣餘詩興高人又姓何論交金石重閱世海田多
德潤山藏玉心間井不波神丹應已熟玉陛看鳴珂
秀氣鍾群玉如君有古風丹心明皎日文彩映長虹
吏隱今誰並仙才世所崇何當伐山石椽筆紀成功
題仁智山水圖

子昂內翰至元間爲夏官郎中時作仁智山水圖以畀真人劉君玉笥道士羅環中從劉

學道乃得之距作圖之歲殆及二紀仁智乃
羅故隱堂名珍藏又二十年矣余遊玉笥主
羅君出以示余徵詩賦十韻以歸之

人心每好靜靜久動亦隨動靜有常道道合仁智基
宣尼喻仁智謂與山水宜趙公遊聖門仁智固自知
居官繪爲圖寫此胸中奇羅仙家玉梁清輝肆娛嬉
高堂扁仁智動靜人所思此圖一入手把玩頗恨遲
願子勗貞操勿爲聲利移達德先智仁宣尼不吾欺

叢月

石洞仙人舊姓何月明何事更披蓑知君玩世甘樵
牧慙愧人間尚綺羅

明月壇

明月壇前露滿衣鳳蕭聲斷彩雲飛梅仙一去無消
息立盡殘更望鶴歸

三台松

落落長松百尺身碧霄常與泰階隣仙官閱世輕人
爵肯並三槐詫重臣

澗泉

羣玉峯前水一灣
濺濺流出白雲間
神仙宴罷歸來晚
卧聽空堦響珮環

遊玉笥山別叢月

合沓清江曲
嵯峨三會峯
濕雲青羽葆
曉日碧芙蓉
杙斂鳴千澗
屏幃列萬重
玉梁蜿蜒化
鐵柱妙形容
突兀飛樓觀
鏗鉤振鼓鐘
恩榮丹詔下
珍重白雲封
鴻寶應難秘
刀圭儻可逢
高人曾狎鹿
中使昔投龍
金籙何寥闊
瑤壇尚肅雍
穹碑傳禹迹
巨石紀仙蹤
入谷東南奧
懸厓子午衝
野花明側塞
幽草細蒙茸

曲折逾青嶂攀緣訪赤松蒼茫風景顯厭浥露華濃
永嘯和天籟旁窺俯壑淙彤霞九真署司命百神宗
祀典推嚴潔黎民盡敬共炳靈稱赫赫求福見憧憧
郁木霏香遠華芝秀氣鐘嵐光騰瑞靄磴道峙崇墉
梅尉誰能並何公世莫從祠官今水部俗客匪周容
去去尋輕舸行行伴瘦筇題詩無好語一笑賴彌縫

周大江遊仙詩

四海大江翁時清道更窮還將醫國手轉作活人功
栗里今陶令東山昔謝公九京如可起端有萬夫雄

廬陵周處士束髮幕前修靜得琴中趣閒從方外遊
瀛洲餘歲月宰樹幾春秋喜有承家託諸郎更炳彪
送郭志尹秀才趨上京

之子儒林彥汾陽幾世孫沈深窺學海浩蕩見詞源
白日風雲會青春雨露恩端歸拜家慶盛事說名門
宗友大中惠詩歎此淹留次韻解之

晉柏凌空翠入樓祠官老我十年留世緣袞袞翻疑
夢詩興寥寥冷欲秋天外錦帷瞻太史雲端仙袂挹
浮邱師承正好親同姓莫作騎鯨汗漫遊

曲曲闌干百尺樓每於多景獨遲留紅霞出海千山
曙白露涵空萬里秋人世忘機皆樂地仙家隨處是
丹邱桃椎芳躅分明在何用求師賦遠遊

登華蓋山虞十一學士枉詩見寄次韻

朝元劔佩逼中台頗視巔崖念草萊萬象盡從天外
見三峯疑自海中來丹池月冷龍應蟄琪樹風高鶴
未迴此景若無虞學士野情詩興亦寥哉

巍巍華蓋像天台石有龍湫山有萊黃獨苗稀仙子
去青冥路穩世人來軍山南望雲千疊贛水東流勢

九迴若向輿圖辯方域分明指掌信奇哉

雍國當年位鼎台清朝又見北山萊挂冠莫向南州
去賜酒朝從上國來蓋世文章多忌嫉致君事業尚
遲迴時人不識乘桴意却擬承貞更遠哉

丹霞道士黃知微見和再用韻答之

禮斗壇高籥上台丹霞長爲護蒿萊巖花委地知猿
過庭竹搖風企鳳來問道有緣千里遇遊方無定幾
時迴乾貞戶帖山中寶早賦歸歟信美哉

題白雲深處圖贈麻姑道士上官元元

亭亭麻姑山翠色出天半山中有佳勝原野平若案
道人極幽討結構巖谷畔松風激飛泉彷彿絲竹亂
白雲護蒼蘚蕪徑人迹斷人間那有此直恐縣圃貫
道人上官生旭日示方旦居然絕華念甘與麋鹿伴
學道期精堅毋爲畫龍玩持歸語麻姑爲我一笑粲
蘇文忠公嘗謂人之爲文須令氣象崢嶸精彩
絢麗漸老漸熟方造平淡其實不是平淡乃絢
麗之極若徒見其平淡而便學此樣則失之矣
貞一尊師見教所作有古體自成一家披卷吟

終偶憶蘇公之說敬歌二絕

烟霞黼黻爛長虹盡斂光芒入太空
存得本初根抵在自然機軸妙天工

其一

學詩真與學仙同換骨元非一日功
見繞九秋風露足纖埃磨盡見真空

其二

貞一齋詩稿終

梅花百咏

江蘇古籍出版社




四庫未收書提要

擘經室外集卷一

梅花百咏一卷提要

元韋珪撰珪字德珪山陰人案四庫全書所收梅花百咏乃元馮子振釋明本倡和之詩德珪此作始以李仲山之命成咏梅二十六首繼又摭拾見聞更成百首復以梅花未入楚詞作補騷一章以附於後又嘗自署其讀書處曰梅雪窩蓋其平生有嗜梅之癖矣首有楊維禎手書序文此從元刻摹寫者



梅花多咏序

予讀后湖范氏梅溪其移類不過

十四五卿友常君德圭自吳下嘉祐

梅溪其見視通自甘以咏至于百

咏何其多耶豈非梅者

中木之魁稱也今必以吟

事雅多而帶賦梅

顯字自又將補石湖譜類之缺
歟吾東山公論梅之佳有所謂
寫真儼神之異真此兩辭
神則傳者其情性也與石湖之
論墨梅貴韻與格而不徒貴
夫真收氣神者其素同觀
石湖之於梅不獨偏其真而又

得真神則體卑章復句之
以既布人而後正於什百
之多乎廣盡勿自秘亟寫諸
醕醢之上不與老邁八歌並傳
善不傳也又豈特補石湖
之編之觀者哉原盡名璫
璫璫其自號也會稽錢遂

蘇人楊維禎書于西湖
梅下齋時至正五年十一月
十又四日也



至正壬午冬覃懷李公仲山父以西掾貳憲
行部至楓江時予備貢州牧公退之暇相與
商確今古亶忘倦遂出所命賦梅詩俾
予校讎因得百詠之什迺越士韋子德珪
之所作且從而識其人焉嗟夫卉木之生稟
天地至清之氣而異於凡植者莫若乎梅
豈易賦哉抑古人詠梅為後世嘆賞者不
過一句一聯如少陵和靖之作是矣至秦太虛

首倡百詠然未免足成於二蘇之手由此觀之
梅真豈易賦者哉大率作詩之法違於物
則不工泥於題則不化故詩貴欲如大圭不琢
為良難也觀德珪所賦百詠清新而瞻雅淡
而葩梅事掇拾殆盡尤善脗合於引喻想其
冰雪肺肝吐此妍辭麗句可謂遠而不違近而
不泥者矣雖舍其題而觀之人孰曰不可況一題
一詠之中或言志或感興或寫情寓意而各

得其趣者與蓋梅之清非詩無以發詩之清
匪梅無以託曾不知梅清於詩邪詩清於梅
邪世必有九方皋之目者在予何庸贅德珪
嘗顏其讀書之窩曰梅雪則其嗜吟清苦之
志固可見已何當敲石火煮雪水命童子
歌此詩於花下之窩斯亦林泉之真樂也後予被
召預脩三史由集賢以春官致仕還吳顧瞻
庭梅倒指數易花矣德珪訪予止齋追

話疇昔之好嗒然同一清夢不知老之將至
唯興後生可畏之歎耳語既復徵予言故
履歷其所以如斯予聞李公拜河南省叅知
政事致政歸燕山為梅庭主人德珪異日遊
京師必能會公以叙詩盟幸為我道問訊云
歲強圉大淵獻長至日吳郡干文傳叙

古之咏梅者如陰鏗何遜蘇子卿
林和靖諸賢題品絕唱迄今膾
炙凡口後人於梅復以詩鳴者不
過得其殘膏賸馥之萬一耳儂多
闕靡云乎哉至正二年冬十月覃懷
梅庭李仲山公持西州憲節按治姑
蘇公餘命賦梅廿六絕因撫遺題補
綴百咏得非貂不足而續之猶不自

足者耶詩成辱李公印可仍徵諸
壽道千公考訂而誤為加點逮夫
吟壇諸老未始不予進而相與評
焉噫詩之遇邪抑梅之遇邪
觀者幸毋哂其僭云山陰韋珪
梅雪窩書

梅吟百題

庭梅

官梅

江梅

溪梅

嶺梅

野梅

早梅

古梅

憶梅

夢梅

尋梅

問梅

探梅

索梅

觀梅

賞梅

友梅

寄梅

評梅

歌梅

別梅

惜梅

折梅

翦梅

浴梅

浸梅

簪梅

粧梅

蟠梅

接梅

移梅

補梅

苔梅

杏梅

蠟梅

竹梅

雪梅

月梅

風梅

烟梅

孤梅

踪梅

老梅

新梅

瘦梅

矮梅

遠梅

落梅

宮梅

簷梅

寒梅

咀梅

盆梅

紅梅

粉梅

青梅

黃梅

鹽梅

千葉梅

鴛鴦梅

萼綠梅

臘脂梅

西湖梅

東閣梅

清江梅

孤山梅

羅浮梅

漢宮梅

解舍梅

書牕梅

琴屋梅

棊墅梅

釣磯梅

樵徑梅

僧舍梅

道院梅

柳營梅

茅舍梅

蔬圃梅

藥畦梅

前村梅

照水梅

山中梅

城頭梅

水竹梅

水月梅

檐上梅

杖頭梅

隔簾梅

照鏡梅

十月梅

二月梅

未開梅

乍開梅

半開梅

全開梅

水墨梅

畫紅梅

玉笛梅

紙帳梅

梅花百咏

山陰韋珪賦

庭梅

玉立階除春正融
清標不與衆芳同
為花掃雪開東閣
人在光風霽月中

官梅

公庭凜雪霜
姿凍合
蓬衙想報遲
索咲
宜清白
吏心如明月
澹無私

江梅

花下寒潮漱石磯
朔風卷雪濺苔衣
西湖

自有清香在只把吟篷載月歸

溪梅

夜月灘頭浸玉寒暗香微度石橋邊一枝帶雪橫清淺不礙中流訪戴船

嶺梅

庾關春在萬山巔出處清高節操堅著屐幽尋忘峻險憑誰持贈白雲邊

野梅

不因地僻減清香春暖孤根到處芳抱□

荒村甘寂寞任他桃李在門牆

早梅

芳信撓先露雪葩小春忽見玉無瑕世人
盡說南枝暖更看枝南第一花

古梅

曉月清江寂寞濱心含太極獨先春風霜
歷盡蒼顏在孤竹赤松吾故人

憶梅

美人一別隔年期遙想風前玉雪姿幾夜

小窓清不寐月明無處著相思

夢梅

玉笛聲飛江上樓芳魂驚曉動清愁覺來
人問商巖下曾見和羹傳說不

尋梅

上春有約覓南枝水竹人家遍扣時一任
灞橋風雪冷寒驢破帽不因詩

問梅

寄聲湖上舊花魁曾有逋仙行輩來青鳥

經年芳信杳春風咲口為誰開

探梅

騎馬出門春尚小花神應喜故人來名題
翠竹知相訪若見春風不用媒

索梅

幽討名花謝俗夢幾回東閣挹清芬掇來
盆盎如難色萬玉枝頭早見分

觀梅

月下相逢認未真曉來標格愈精神林逋

仙去芳盟冷誰是花前具眼人

賞梅

愛花終日對瓊林飽玩豪吟興趣深檀板
金尊非樂事此心清白是知音

友梅

三益堂前世外人歲寒誰是舊雷陳知心
千古惟松竹冷淡相交始見真

寄梅

故人遙隔隴雲邊折玉傳香水驛寒江北

江南重相憶只將春信報平安

評梅

月旦花前豈乏人風霜齒頰帶陽春江南
野史餘芳論絕世清如古逸民

歌梅

六片紅牙捧雪兒花前低唱怕花飛後庭
玉樹空陳迹白雪一聲人聽稀

別梅

花謝東風攪離思愁翻縞袂忍輕分月明
相送臨溪水春樹遙憐隔暮雲

惜梅

香銷泥污意裴徊
掠地回風玉作堆
愁絕黃昏無一語
怕看孤月上窓來

折梅

殘雪輕搖攬素肌
故人應說寄來遲
花時先假調羹手
選取東風第一枝

翦梅

破玉并刀試手溫
香凝雙股斷芳魂
花隨燕尾輕分處
不帶春風爪甲痕

浴梅

玉骨清寒凝雪痕金壺香水浸來溫餘波
輕飜春風面應是新承雨露恩

浸梅

插花貯水養天真蒲酒風標席上珍清曉
呼童換新汲只愁凍合玉壺春

簪梅

折玉臨風帶咲簪烏巾春滿酒厭少年
莫訝頭如雪猶勝梨花壓帽簷

粧梅

五出風流拂面輕點成宮額映花明覺來

不用臨鸞鏡蝶粉蜂黃一洗清

蟠梅

鐵石芳條誰矯揉從教曲折抱天姿龍蛇
影碎玲瓏月交錯難分南北枝

接梅

采玉金刀巧若神好枝分得續孤根待看
夜雨蒼苔長幻出春風不見痕

移梅

湖邊鋤月換根基玉樹重栽樹不知種竹

當年遺法在須留宿土記南枝

補梅

闌殘老樹著花疎一半餘春一半枯
掇俸買栽添勝槩依然風月滿江湖

苔梅

古貌蒼然鶴膝枝土花生暈護春機
玉堂試著青袍客莫忘江南有白衣

杏梅

董林驀地暗香傳淡紅芳照眼妍有客

前村來問酒牧童誤拍到花邊

蠟梅

金玉同盟破雪開清香異色滿瑤臺不因
蜜滓將花染安得蜂黃點額來

竹梅

浪說松林有美人何如倚翠渭川濱歲寒
揜映春風面一日可能無此君

雪梅

五出花開六出飛玉肌寒擁素綃衣更看

霽月同清白一夜窓前瘦影肥

月梅

素蛾姑射闢嬋娟踈影分明不夜天
斲却廣寒宮裏桂清光長滿玉堂前

風梅

花間少女剪春寒
粲々霓裳舞隊仙
月夜搖香環佩冷
莫教吹落玉花鈿

烟梅

夢隔梨雲逗曉天
苔枝浮翠泥春寒
不嫌

玉質籠輕素留與詩人冷淡看

孤梅

獨抱冰霜歲月深
舊交松竹隔山林
英姿孑立誰堪托
惟有程嬰識此心

踈梅

依稀殘雪照寒波
桃李湯山柰俗何
瀟洒最宜三四點
好花清影不須多

老梅

種花年少負幽期
歷遍風霜不計時
顧我

今居丈人行愿遺清白蔭孫枝

新梅

幼玉嬌姝欲効顰初花小試一年春花前
明月無今古花下詩人非古人

瘦梅

冰肌如削怯寒威天賦清羸可得肥我亦
詩癯被花惱玉人渾欲不勝衣

矮梅

籬落盤根枕水坡月低清影舞婆娑青衣

童子慳三尺花底相逢唱短歌

遠梅

雪泥踏遍十餘里迢遞疎林接野橋何日
移春歸院宇免教望斷玉人遥

落梅

風榭飛瓊舞遍時春初早賦惜花詩家童
輕掃庭前雪莫遣香泥污玉肌

宮梅

恩深移植傍含章一白三千莫比芳花落
若驚公主睡不留殘粉試新粧

簷梅

玉立庭前暎壁璫
巡行索笑挹清香
踈花近屋枝相亞
冷逼鴛鴦瓦上霜

寒梅

北枝偏受雪霜多
曉奈蜂媒凍損何
一任玉奴呵手折
芳心元自抱陽和

咀梅

細嚼冰蕤齒頰馨
詩脾冷沁有餘清
靈均可惜不知味
卻向秋風飡落英

盆梅

瓦缶移根宿土栽，盎然春滿玉堂開。
鈎簾不怕霜風入，自愛花顚日影來。

紅梅

昨夜瑤池醉玉顏，曉粧濃試破清寒。
應憐餐雪冰肌瘦，乞與春風換骨丹。

粉梅

玉容有似傅鉛華，濃抹燕脂未足誇。
白面何郎不須試，揚州清賞壓瓊花。

青梅

累累酸實釀餘春，小摘枝頭可薦新。
之子

深能保貞固中含天地發生仁

黃梅

青子纔看遍綠陰轉頭紅綻又垂金未應
功到和羹盡更為蒼生大作霖

鹽梅

熬波翻雪子青二鼎鼎同登要適鈞何代
無賢如傳說大羹不和味尤真

千葉梅

密攢玉瓣費神工什百春藏一朵中雪壓

鮫綃花骨冷故教重疊護東風

鴛鴦梅

采二雙花對錦機翠禽同夢月交輝有情
一處隨流水莫被風飄各自飛

萼綠梅

翠袖籠寒暎素肌靚粧仙子月中歸露香
清逼瑤臺曉隱約青衣侍玉妃

臘脂梅

濃妝出色染芳林春入胚胎造化深非是

玉顏凝酒暈也知紅粉有丹心

西湖梅

花發蘇堤柳未烟主張風月小壺天清波
照影紅塵外冷看遊人上畫船

東閣梅

對雪蜀亭清興動回思何遜更妙才倚闌
人去花無主詩壁春深長綠苔

清江梅

古樹烟籠碧玉流酒旗風勁暗香浮只今

卜雪滄波上幾見看花人白頭

孤山梅

種玉西湖獨占春
逋仙佳句播清芬
月明花落吟魂冷
童子何之鶴守墳

羅浮梅

高卧花陰醉復醒
不知月落與參橫
人生總是南柯夢
獨有師雄一夢清

漢宮梅

玉碎雲收迹已陳
劉郎從古惜芳春
新妝

日照明飛燕冷落長門拜月人

解舍梅

種花官宇說揚州何遜多情憶舊遊二十
四橋春暫歇新詩題遍小紅樓

書窓梅

擬魁春榜冠瓊林對白抽黃幾夜深雪案
香浮芸葉冷半生清苦此時心

琴屋梅

花月窓寒彈白雪冷然寫出廣平心臨風

三嗅還三弄清極香中太古音

棊墅梅

孤山擬折東山屐白戰曹林望解圍妙幹
神機先一點落花隨子闔斜飛

釣磯梅

蒼苔石上老烟波手把長竿倚玉柯閑繫
孤舟明月下寒香一夜襲漁蓑

樵徑梅

峻嶺孤芳吐未勻半欹山路半為薪帶將

檐上來城市饒取春風賣與人

僧舍梅

紫竹林中艾衲寒淨瓶曉折供金僊三生
石上精魂在清夜靜叅花月禪

道院梅

玉佩光寒白錦袍步虛人立月華高赤松
仙友如相問近日元都不種桃

柳營梅

花寨穿楊月掛弓霜飛玉帳帶春風太平

一本只
止渴將軍老詩壘閒收白戰功

茅舍梅

數椽草屋延清客竹作疎籬護雪葩不是
玉堂無分到且和明月寄山家

蔬圃梅

翦韭春園香暗浮籬邊墻角試尋幽詩人
一任花俱瘦只愿民無菜色憂

藥畦梅

炎帝遺芳濟世珍園中百草讓先春調羹

妙手能醫國不說當年種杏人

前村梅

竹外疎花二外橋托根聚落任風飄
一泛茅店吹香後踏雪來尋酒價高

照水梅

一泓映出兩南枝
髣髴明妝對鏡時
波面浮香天作底
芳魂浴月影娥池

山中梅

素居空谷避緇塵
石冷雲寒一片春
洗屐

看花歸去晚松風掃月待幽人

城頭梅

杖策尋芳近東郭女垣無月亦精神
角聲吹徹霜天曉十萬人家捻是春

水竹梅

波涵脩翠玉玲瓏院落清幽自不同
冷浸湘雲帶疎影一般瀟灑月明中

水月梅

淺碧籠蟾醺玉痕乾坤清沁鏡中春
黃昏

照影成三絕只恐花光寫不真

檐上梅

蜂螭隨人紫陌賒挑將春色向誰家若逢
公子休輕售不比街頭賣杏花

杖頭梅

玉鳩橫影暗香飄絕勝江行掛酒瓢雪擁
吟肩兩清瘦一枝挑月過溪橋

階簾梅

庭花暎箔眩吟眸一片湘雲鎖暮愁風捲

一
本
口
黃昏踈影動珊瑚枝上月如鉤

照鏡梅

銅瓶養素近妝臺一點芳心對面開應是
常娥厭丹桂換將踈影月中來

十月梅

年二開占小春時點綴湖山景
宜造化流芳何太早無陽安得有南枝

二月梅

臘蕊開遲到艷陽
丈人殿入少年場
百花

一見應相妬肯對東風聘海棠

未開梅

緘春蓓蕾冷含烟絳蠟封香信暗傳姑射
怯寒猶掩袂眼前惟見蕊珠仙

乍開梅

曉粧初試薄寒侵漏泄春機想未深昨夜
耕房花蕊小為誰索咲露芳心

半開梅

一片芳心早破寒踈英向暖點酥乾卻愁

爛熳成搖落春色平分政好看

全開梅

瓊姬小隊遍深宮滿面春生大咲中畢竟
花房羞半掩一齊分付與東風

水墨梅

香銷南國雲愁地影落西湖月暗天回首
玉堂春夢杳一池黑雨起龍眠

畫紅梅

一夜花房賜守宮丹青誰為寫徽容卻疑

卯酒傷歎後綃帳春寒睡正濃

玉笛梅

誰家瓊管奏春風吹落江花曲未終黃鶴
樓空人不見一聲_二在月明中

紙帳梅

春融剡雪道人_一家素幅凝香四面遮明月
滿床清夢覺白雲影裏見疎花

梅南產也三閭大夫生於楚而騷經所
叙弗之及夫豈不接於耳目而舍置焉竊

意此花生于谿谷幽僻地譬諸卓行隱
君子以脩潔自尚侶不可以蕪穢褻之
或者指為脫略非知大夫心者亦非知梅
者今觀此詩及補騷之篇豈外昔人之
若靳特富其辭以顯彰之乎若梅雪子
者可謂真知於梅而尤知大夫之心者矣
天台胡世佐識

補騷

梅花不入楚辭古今之通恨也予觀屈子
所作其中語意有若關於梅者目迷而
補其闕云

惟草木之零落兮哀衆芳之蕪穢
霰雪紛其無垠兮路幽昧以險隘
深林杳以冥冥兮子紛獨有此姱
節
駟玉蚪以棄鷺兮吾將上下而求索
日黃昏以爲期兮恐美人之遲暮
世溷濁而莫余知兮好蔽美以嫉妬
望瑤臺之偃蹇兮聊逍遙以相羊

荀中情其好脩子雖僻遠其何傷玉色頽以晚
顏子形螺虬而透蛇超氛埃而淋尤子精皎皎
以往來欲少留此靈瑣子夕余至乎縣圃惟佳人
之獨懷子魂營而至曙乘回風子載雲旗被明月
子珮寶璐折芳馨子遺所思鼉馳余馬子江皋
觀者憺子忘歸既惇獨而不羣子唯昭質其
猶未虧及年歲之未晏子芳菲其彌章昔
不可子再得盍將把子瓊芳余幼好此奇服子
願自申而不得聞赤松之清塵子見伯夷之放迹

說操築於傳巖予恐脩名之不立伏清白以死直予
悼來者之愁誰可與玩斯遺芳兮長卿風而舒
情惜吾不及古之人兮竊賦詩之所明余既滋蘭
之九畹兮羌無實而容長夜耿而不寐兮懷琬
炎之華英變白以為黑兮亦非余之所志也置以
為像予猶有曩之態也吾不能變心以從俗予
蓼母姣而自好歲習其若頽兮寧隱閔而
壽考若有人予山之阿既含睇兮又宜咲恐鵜鴂
之先鳴予余猶惡其佻巧溘吾遊此春宮兮迷

不知寵之門風伯為余先驅兮野寂漠□□□
時續紛以變易兮心愁悽而增悲何所獨□□
草兮委厥美而歷茲惟天地之無窮兮退□□
脩吾初服存髣髴而不見兮臨流水而太息辭曰
后皇嘉對生南國兮懷質抱情獨無匹兮自明及
晦思美人兮受命不遷壹氣孔神兮夜光何德
與長友兮蘇世獨立姱而不醜兮路遠處幽毋滑
而魂兮愿歲并謝聊以娛心兮

蟻術詩選

江蘇古籍出版社



四庫未收書提要

擘經室外集卷三

蟻術詩選八卷提要

元邵亨貞撰亨貞字復孺有野處編四卷見四庫全書伏讀四庫全書總目云亨貞所著蟻術詩選世已無傳此從舊鈔依樣過錄凡古今體三百七十六首又聯句三首詩格高雅絕無元世綺縟之習案馮遷注稷跋野處編並云其書乃上海陸郊以授稷而刊行是編及詞選每卷首皆有新都汪稷校字樣是亦郊所授刊之冊跋又云并所著蟻術詩選蟻術詞選為十六卷今合三書卷帙觀之並屬完善之書惟卷

首不著名而著字乃明人刻書陋習也

蟻術詩選目錄

一卷

五言古風

秋懷

次韻王彥強監稅中秋不見月

又次九日韻

夏夜

夜

謁青龍文廟

和孫果育先生曉行池上韻

晚望五側體

齋居讀書倣晦菴先生體二首

早春次陸伯宏韻

陳元茂別去十年扁舟由山陰來有詩敘懷

次韻識喜二首 用上人萬玉軒

上武陽太守汪公國良

公新安人善文詞書翰

次字文子貞別駕見貽韻

熏自聞上人禪房與陸伯宏暮坐偶成

全真師鄭無用北遊

午日曹雲西翁厚 堂分韻玉字

秋懷擬古用黃伯成韻

黃仲珍會試回潘省中有詩留別沙德潤任

以南皆次韻持來求予著語

德潤以南又賦以適遠興再和爲荅

贈經筵檢討太原陳敏夫

四月十七日偕張彥聖陳景曾李道原郭與
仁倪自明遊東岩蘭若分韻得夏字

彥聖次予夏字韻見貽乃亦次彥聖孟字韻
爲荅

彥聖再用夏韻見示又以復

再用前韻與彥聖景曾論詩

景曾和孟夏二韻見貽復用孟韻追道向者
泮林聚首出處之誼

僕年來塊處閭閻緬懷平昔託交粗多然意
氣相期者指不多屈因景曾詩中論及交

道就韻以懷數子隔絕

送傅子初先生之信州錄事

題傅伯玉來青軒

瑞閒雲開士雲深處

昨以青鏡褐帶寄郭志道先輩暇日貽二詩
以彰所賦不啻引王之漸次韻爲答

春晴次申屠仲權進士韻

申屠仲權與曹安雅翁爲五側詩以論進學
之道持來屬予和韻

送錢思復之海鹽州教授

庚子歲暮飲曹園古梅下分韻得動字

有探得暗字者辭以韻拘閣筆主席者求予

補卷

曹孺章得岸字韻時方從軍求余擬作此亦
梅花之變風雅也

庚子歲暮風雪極寒入春薰旬餘凍不解殊
無春意青龍鎮文學林子敬相拉飲于鱣
堂約共擬催春之作

奉寄海鹽知州李正卿先生

贈星數術士陳秋巖

田家四時詞爲九山學稼軒作

戊申仲冬兒穎爲館人所連得罪繫獄朋游
咸謂必老夫叫閤乃可昭雪由是衝寒扶

僊戒途凡越旬始抵石城道間記所見得

詩如左

澱湖

吳門

新安鎮

沙湖

義興

前馬鎮

溧陽

七里山

分界山

官塘

白府君廟

謝亭岡

青埂

金陵

壽靈源上人遊方

錢塘林子文以星術醫藥畫筆遊食江湖爲

題行卷三首

幼女嫠居澄江無後可託親往載之以歸庶
盡父子之道且得縣宰給以公文沿途無
闕譏之虞丙辰歲月廿一日出關宿城南
屠家鎮逆旅中夜分枕上紀述示舟中同
行者

寄贈潁上縣令車則明會稽人小兒穎以罪
遷彼此公知其非辜每加矜睞

贈寫神王鑑堂

寄南金絕句

夢中紀遊

題窠石絕句

金錯刀竹

二卷

五言長律

貞溪寒望

至正庚辰歲暮大雪同孫果育季野衛立禮
三先生分韻賦禁體得天字二十韻

太原秦景容肄業胄監以春秋經中大都鄉
魁有田在海隅至正壬午秋以收稻至雲
間錄示近詩和韻復其來意二十韻

送松江太守楊公正秩滿歸太原

悼趙士宏先生

宋宗室與先生同戊子生

錢南金往歲胥會嘉禾紫虛觀近聞館於澌

湖謝氏經年隔絕寄詩問訊二十韻

辛丑早春和顏仲逸新正試筆韻

客居感懷寄簡吳野舟四十韻

邾仲誼博士久別重見以詩敘聞依韻之二

十韻

追悼南金錢文學二十韻

乙卯立秋日客舍紀懷二十韻時長兒克穎

遷于穎水幼兒克淳没于濠梁故園凋落

殘生茫然不能無感於天時也

三卷

五言短律

陪孫果育先生遊干山次韻三首

題圓智寺

懷古太初書記

贈壽南麓上人

辛巳歲元日雨雪中飲曹雲西翁家次翁韻
錢南金往海鹽省母阻風歸遲用曹雲西翁
懷之
寒食次雲翁韻

還家舟中口號

荅宣伯賈孝廉見寄韻

丁亥臘月廿八日立春雲西翁有夜枕之作
詰朝置酒餞歲次韻以復

橫泖客舍立秋日

橫泖雜言二首

客舍早春

寄南金

哭劉希孟先生

無錫東屯和朱梅山司丞韻二首

歲暮九山道中二首 橫溪夜思二首

挽衛立禮先生二首 泗涇雜詩四首

次韻荅馬本勁賢良見寄

俞山月用韻敘舊如韻荅之

早春用前韻述懷錄似馬俞二友

城樓雨夜

歲暮丁未

己酉春金陵旅舍和蔡君立程傳可二友韻

奉酬錢曲江見示韻 湯成二首

春日橫溪

哭王子章先生二首

挽謝德嘉同知二首

和襄陽縣宰沙德潤春遊韻

四卷

七言古風

昭君出塞圖

松居圖歌爲會稽陳元茂賦

畫梅行會稽王元章惠以墨梅且題其上依

題酬之

玩古行武川唐允文蓄古圖畫碑刻金玉彝

鼎及諸器物一室中名之曰玩古齋

桃源圖歌

荅唐元度惠草堂詩陽羨茶

旅秋行次韻荅錢南金所寄知近寓秀水僧
寺

題許守中太和丹室

四皓圖歌

澹滄漁叟引爲攜李蕭養素賦

張氏三味軒歌

穀江行三衢之江山常山二水自須溪金川
合流交錯如穀故名穀江潁上文學掾徐
景顏居於其間自號穀江漁隱云

灤東畊隱歌爲烏溪黃成章賦近在潁庠分

教

五卷

七言排律

汪太守壽席同諸老分韻得蘭字

寄孤山和靖祠堂葉掌祠

曹安雅翁新營溪東莊

六卷

七言律

冬桃

苦梅

出遊別溪上親友

次韻王彥強客懷

江城暮春書事

次韻安雅翁亭屏榮悴松圖

寄錢素菴鍊師雲間南城大族

寄錢南金孝廉

奉寄熏自聞上人併謝槐茶冷淘之款

挽會稽呂勉夫先生咸平宰相申國公九世

孫也

次韻曹雲西翁雨牕述懷時故里大水

題徐中孚高士代祀武當桃源中朝諸公詩

卷

孤山新建和靖先生祠

暮春次南金韻

題錢素菴鍊師封雲室

又可月亭

謝王伯靜惠葛巾

東永嘉裘日章進士

次南金見寄韻

寒食雨中

奉王眉叟真人二首

簡唐復齋徵士

簡吳太然高士

簡楷則中書記

簡黃魯德秀才

簡賢大愚座元

送張茂夫之南安縣尹其父嘗爲翰林學士

早春錢南金用陳景曾韻紀會

次韻孫果育先生海鹽茶園道中作地名夾

山有金粟寺試茶院錢南金嘗約予遊未

果

次孫果育先生觀海韻

乙酉歲人日閒雲端師過訪得唐復齋錢南
金賢大愚各以倡和之詩見寄因就韻各
荅一章以當新春問訊首荅閒雲

重柬南金

頻年與陳景曾分教泮宮去秋竣事新春景
曾有詩見寄次韻爲荅

送吳景高廣文秩滿歸永嘉

次李太無鍊師見寄韻

次韻謝戴彥李先生

其父帥初先生與先大夫同登咸淳辛未榜

遊吳中靈岩寺

歲暮寄南金時在茜涇積善寺

哭李仲輿隱君

題吹笙人詩卷

海濱何隱齋靜得軒

辛卯歲臘月大雪次曹安雅翁韻

海濱何氏攬秀樓

新春荅陸伯蒙見寄之韻

荅明心印上人約遊澱山寺

石湖圓覺中半雲法師和前韻見寄再韻荅

之

橫泖客舍二月陰雨兼旬無朋游詩酒之樂

花木禽鳥之觀不能不動貞溪之想賦以

紀懷

次韻荅曹村範春日感懷

早春潘濟民遠過客舍以詩見示和韻爲荅

紅梅

贈王同僉

次張湯亭雲溪菴晚望韻

挽錢素菴鍊師

和倪德中見寄韻

清明日陪王同僉遊馬跡山

次韻焦漢章胡景仁見貽之什

過千山荅孫果育先生見示之韻

寄馬敬常冠軍

辛丑七月一日寓橫溪觀迎引大士經會酷
暑鬱蒸廣庭露坐忽晚雲送雨神氣始蘇
唐元度有詩見似因口占以復

次荅海慧上人見寄韻

湯成用楊廉夫韻

寄鄉人魯道原贊府

懷澄江鄧毅夫帥叅

寄馬文璧徵士

畫得名

簡崑山慧明極上人

善詩文
隸古

荅馬敬常冠軍見寄韻

荅張孟膚見寄韻

孫長慶小山招隱

曹幼文遺安室

錢思復寓柳濱見荷花憶西湖遊賞有詩述

感書以求和步韻復命

再和

七夕思復韻

再和

癸卯元日與南金感舊而作

張孟膚過余故里有詩寫曹雲翁西園景物
不覺起余舊感向來文物荒蕪殆盡前輩
典刑邈不可見行樂之地間存遺跡長厚
之習則掃地矣不能已於言也

青龍任氏母貞節堂

楊廉夫受吳門賓館諸公餽餉爲詩自述且
求友朋屬和次韻荅之

甲辰元日次成元章韻

早春過曹雲西翁舊園

次錢思復寒食懷錢塘韻

送勤無逸上人亂後歸西湖復業

丁未元日和夏頤貞韻

曲江居士特以險韻與倪雲林論方外事和

者閣筆余適自外歸持來求正戲爲下一

轉語

次元博弟初度自壽韻

和楊鐵崖曹園感懷韻

宗上人芝山小隱

俞子昭見寄舊懷新感藹然言意之表次韻

奉酬

用曹新民韻感曹雲西翁園中老梅

歲晚訪陳景曾于金澤几間有新詩信筆和

韻以述會合

次韻吳野舟見寄

新春和徐澹然處士韻

俞遂良有遊九山之約借韻促之

奉酬夏時可文學早春之韻

澹然時可遂良三君子皆有春遊之興借韻

訂之

贈嘉定普福宮秦東海高士

送陸伯翔往金陵授業侯門

贈理即中上人禪學之外尤明丹法

九日橫溪客舍

賦同門友葉子澄春星堂

又賦子澄雪蓬軒

甲寅至日在橫泖客舍憶存沒二子

和錢思復過真淨旭公房所作

秋日過余山

荅胡克溫惠藤枕

又鐵冠

感橘

黃岡賈彥德碧梧軒

賦鄞士梅隱

七卷

七言絕句

見梅懷錢南金

早春駕湖夜泊

晚晴二首

小鬟以墨海棠爲名友人張子正爲之畫以
求題

七夕孫果育文席上有詩首句約坐客各續
卒章爲賦如左

題演上人畫蘭

題危鍊師春溪小泛畫

題黃一峰畫扇

陪曹雲西翁攜妓泛荷舟中次韻

明日曹安雅翁約席上諸公再放蓮塘席間
次韻

次韻荅衛立禮元旦之作

桃源畫卷

松竹卷子

雪山便面

春日 and 錢南金韻

次荅汪子翼進士嘗爲采石山長三衢學正
同曹雲西翁泛舟過千山

賦孫果育丈千山小隱

即景

次張漫亭遣興四首

從軍過太湖上梅花正開與顧允中趙君式

登山縱步和韻三首

挑菜美人圖

和錢思復春日口號

己亥二月晦日寒食無錫東屯舟中漫成

客樓春日

西湖小景扇

香雲室

題曹元博辟間馬文璧小畫

題項鍊師山房倪元鎮小畫

題夏頤貞所藏王眉叟真人馬遠溪月堂卷

題扇寄鄒君顯

君顯荅賦再韻以寄

一峯道人畫九山雪霽

題墨竹

李雲山畫秋林晚步

梨花十二紅

夏士安家董元小寒林

辛亥中秋橫溪菴客牕對月口號

桃花五色子

橫溪晚步

懷野舟客

停簫士女圖

息齊李使君自號廣陵醉客其守吳興日郊
行見民家小湖石名蓮花峰玲瓏奇秀求
之弗獲乃畫爲圖且書其意以識不忘客
有持以求題者

杏花宮女

柳陰宮女

牡丹宮女

蒼苔宮女

秋懷故溪

元日試筆

上巳日泊舟崑山縣城北十里顧墓田家風
暄日麗野花亂開邂逅父老爲設尊俎相
率縱步春興橫生乃爲短述以紀所見

曹園看梅

貞溪初夏次南金韻

八卷

會合聯句

至正改元余寓虎林三閱月南金授業茶院
孟冬余歸而南金亦還溪上夜坐縱談念
不可無述以紀此會四十韻

編校遂生亭聯句

有序

舟中聯句

蟻術詩選目錄

蟻術詩選卷之一

元雲間邵復孺著

明新都汪 稷校

五言古風

秋懷

金風應商節，
樹生秋聲沉。
復踈雨過莎，
鷄振前楹客。
居在城市朋，
從少合并雖。
無山林賞乃，
亦無俗情芳。
時屢消歇身，
世坐無成廣。
庭散短策逍，
遙塵慮清陶。
然發孤詠聊，
復遂平生。

皎皎青樓月，
流光照幽樹。
當時樓中人，
邂逅感相遇。
娟娟耀華年，
粲粲美風度。
黽勉在同心，
誓言金石固。
離居

幾何時元髮各已素豈無陽春心去去若朝露芳馨苟
不存臨風歎遲莫

依依漢南柳秋至多悲風搖落在一息坐此颯爽中衰
榮有天運物力詎能攻桓公豈不偉乃亦歎其窮嗟哉
山林子出處將無同

今日秋雨霽廣陌后土乾出戶欣所矚紅塵滄海寬
子此行樂朱顏撫雕鞍

次韻王彥強監稅中秋不見月

高樓有佳人長歎惜流景漫漫夜何其耿耿愁莫省
昔爲陽春花今媿明月影徘徊望雲端悠然素心冷

又次九日韻

佳節坐無緒行憇嘉樹陰秋花澹相對慰此遲暮心悠
哉美人遠輾轉相思深天風日夕起長歌良不禁

夏夜

紈扇寄晚興竹牀生夜涼大星在南極新月照東廊稍
隔葦泖路遠懷荷芰香夜深屢移枕清漏一何長
林端鵲尋巢屋角螢照席風生銀漢涼雲散玉露滴坐
久氣益蘇心靜神自適鄰鐘忽迢遞相與破幽寂

夜

月白霜滿地山家寒未眠人影在門外梅花遶牕前村
春自斷續戍柝相後先沈吟惜良夜那能遲芳年

謁青龍文廟

鎮市近東海人煙迷遠郊前朝有勝迹遺碣在荒茅民
識青龍艦樹傾黃鶴巢崇臺近僊路擬尋王可交

地有王可

交并
仙臺

雪落暮潮上雲橫春樹迷刺船龍江口解榻鱸堂西舍
米重典禮采芹留品題風塵正旁午教養詎可稽

和孫果育先生曉行池上韻

逍遙碧梧井顛倒白苧裳荷淨雨初過水清心益涼晨
風却羽扇秋意滿藤牀了無塵中趣良以遂行藏

晚望五側體

出戶縱雨屐略約不可度興到意未適且復信晚步野

景頗慰目萬壑倏已莫興盡始欲返解后有所遇父老
謂有役耒耜出遠路況乃積水涸岸脚稍復露觸物卽
勝賞暫爾釋俗慮竚立望不極暝色亘綠樹

齋居讀書傲晦菴先生體二首

端居掩柴門四月忽已暮物色催年華綠陰滿高樹雨
除軒牕靜宴坐屏百慮清風激然至好鳥聲亦度愛茲
羣芳秀幽景欣所遇瀟灑契心賞澹焉忘世故

清溪一雨過沃野桑麻成屬茲長養節慨彼少壯情庶
類各有適微生湯無營窮居在田里胡能事虛名俛仰
狗幽獨微吟散新聲百年總役役且復遂吾生

早春次陸伯宏韻

春生海岳菴冰消建安瓦山鍾隔遙林漁蘧散寒野遠
客忘馳驅懷人賴陶寫書燈尚鄰雞塵陌已官馬

陳元茂別去十年扁舟由山陰來有詩叙懷
次韻識喜二首

向來秋懷詩絕響斯寡和憶君鼓朱絃對客汎白墮歌
長竹間醉興盡花下卧有時舞婆娑褰衣綠陰破
契闊日以邁交道日以虧緬懷載雪舟放情換鵝池山
川固無恙觴詠長若茲流水日東逝何以寓相思

用上人萬玉軒

琅玕遶禪室坐卧空翠間誤疑箕簞谷携入藍田山戒
衣蒼雪亂談塵清風還何當往擊節亦以香巖關

上武陽太守汪公國良公新安人善文詞書

翰

峩峩紫陽山高廣出奇觀千年喬木存蒼翠拂雲漢名家多世臣冠蓋恒煥爛道統自考亭事業擅藩翰朱紉清廟具一倡起三歎謝庭固多才王羣足渙汗

能書事魏晉筆陣妙莫傳清絕籠鸞經窈窕臨河篇神交千載上八瀟日以全錐沙得利器墨沼龍蛇騫向來鮮與趙已擬摩其肩記名金石間良以永斯年

春風滿庭戶三槐日芬芳雨露足生意清陰蔽高堂彼美蘭蕙花婉戀有國香良時拜家慶綵衣列成行孔庭富詩禮實氏多義方懿哉德星聚霄漢生光芒

次宇文子貞別駕見貽韻

泠泠茗雪溪清泚世莫比中有泗濱磬籍籍韻人耳采
之貢廊廟秀發鉤天微願言正始音行贊元化理
鯤溟多化鵬鷄羣有孤鶴偶並樊籠困所志在寥廓豈
無青冥姿迢遞若溝壑知音苟不存清唳何由作

熏自聞上人禪房與陸伯宏暮坐偶成

郊居絕勝賞性僻如自然時俗非所趨方外若有緣況
茲蘭若幽坐榻臨清泉飄然縱心目問法得老禪丈室
頗蕭散妙語開元元西牕綠陰靜林麓含雲烟逍遙接
清景塵俗詎能牽

全真師鄭無用北遊

往皆柱下史翩翩跨青牛示彼衆妙門契此元學流後
來羣仙籍往往在北州至今燕趙間斯道良可求鄭師
宦門子氣寐業乃修行當得所遇逝將與之遊稽首謝
埃壒長嘯崑崙邱

午日曹雲西翁 厚堂分韻玉字

仲夏暑氣微嘉樹藹深綠詠歸衡門下逍遙清溪曲屬
茲午日至悠然對醺醪親戚恒舊歡荆楚尚遺俗飲罷
仍太息歲月傷局促世情苟驅人毋使隨轉燭願言各
自愛重之若金玉

秋懷擬古用黃伯成韻

悠悠涉塵世冉冉傷流光來者日紛靡逝者日微茫已

秋不可春一夕百草黃羣動悉偃蹇孤懷良慨慷幽期
在空谷於以觀翔翔相看且慰意歡樂之渠央

黃仲珍會試回藩省中有詩留別沙德潤任
以南皆次韻持來求予著語

美人善窈窕長年抱幽素迢迢遡飛鸞昵昵眄盟鷺蹇
修無裏言良人昧情度歡娛在一息胡然藐雲路

膏雨下灌木春雨濯文苻美人遵江阿中心忽秋冷昔
期朝雲臺今若中流艇終焉蓬蒿姿慎勿歎宵永

德潤以南又賦以適遠興再和爲荅

清景日以邁元髮日已素遲迴置鴻鵠曠蕩狎鷗鷺何
慙魯淳朴頗適晉風度長歌招隱辭延佇淮南路

離離原上蘭
泛泛漢中荇
春陽豈所私
夕露寧獨冷
誰其念遠人
采之寄孤艇
曷若遂其息
芳馨與時永

贈經筵檢討太原陳敏夫

并州古名郡
盤踞山河長
禮樂盛姬晉
民風本陶唐
清泚多名家
軒蓋相低昂
有美元龍豪
喬木久芬芳
中宵德星聚
文采遙相望

盛朝尚文治
機暇事探討
春明御延閣
六籍互稽攷
我貂蟬列經
邦坐論道之
子初明經盛
年致身早
晝永掄對休
揮灑更文藻

四月十七日偕張彥聖陳景曾李道原郭與

仁倪自明遊東岩蘭若分韻得夏字

客居寡歡樂奄忽歲云夏會合無前期偶爾遂閒暇追
隨二三子遊憩東岩下杖藜足幽討奚必整夙駕野色
隔市槁塵氛絕僧舍屬茲長養節灌木色相射清賞欣
所遇置酒此軒榭談元岸烏巾林鳥亦驚詫人情脫城
鄙矚眼仍自訝我生頗宏放久矣觀物化世道苟難趨
端合返耕稼逍遙柴桑廬良以竟晨夜

彥聖次予夏字韻見貽乃亦次彥聖孟字韻

爲答

浮生羨楚狂適意類優孟豈惟事文華矧復慎言行暇
日得朋從游心在觴咏睠茲蘭若幽愛爾林麓淨登山
竹有題俯檻水可鏡起坐情共真嘯語氣益勁追尋往

事改帳望前修。論文浩無算。行酒肅有令。居然豁塵襟。恍若蘇久病。了無物我情。坐見夙昔性。杯盤既狼籍。步履互斜正。重遊當及時。山中筍猶盛。

彥聖再用夏韻見示又和以復

我家住清溪。嘉木諳朱夏。耕鑿頗自適。藏脩有餘暇。中有韋氏傳。素出孔壁下。鄰好皆相歡。興到輒命駕。從容歲時禮。往來東西舍。髣髴總好書。冠首或能射。暄風登春臺。涼月嘯秋射。衣裳時使然。登望俗所詫。縱匪桃源深。亦有漁舟訝。樂矣忘吾憂。逝將與之化。維時已種秫。卒歲競登稼。期君草堂遊。剪燭巴山夜。

再用前韻與彥聖景曾論詩

騷壇有清音翕若奏韶夏宮商相激昂合止適休暇一
倡每三歎萬籟風斯下夜深鳳來儀屢飭緱嶺駕飄風
忽大和桑濮俱退舍初疑矍相圃妙中見奇射再疑廣
寒宮羽衣滿臺榭品題得賞音終然匪虛詫所貴正始
音不受淫哇訝采之貢清廟自足驗風化陽春與白雪
生意在禾稼行當集大成鏗鏘振良夜

景曾和孟夏二韻見貽復用孟韻追道向者

泮林聚首止處之誼

陳子冬日溫可愛若趙孟不競聲利場從容抱口行我
昔遊泮林屢歌伐木咏識君稠人中心若止水淨揆余
素暴白相照兩明鏡君如雖處囊不屑露鋒勁我猶絀

尚錦韜晦極深夔折晉鄉里兒終媿彭澤令一朝共引
退似失膏盲病臨川濯我足逍遙遂天性重逢無厚顏
自謂出處正願言若松柏保此歲寒盛

僕年來塊處閭閻緬懷平昔託交粗多然意
氣相期者指不多屈因景曾詩中論及交
道就韻以懷數子隔絕

走昔重交際流汗若炎夏結納天下士寢食若不暇蜀

王藐餘子卧之百尺下

王彥強成都人

晉秦早穿楊近命武昌

駕

秦慕容太原人

傳子經濟才多士避三舍

傅子初鄱陽人

有美彭城

宣雄辯氣如射

宣伯聚徐州人

錢郎早明經翰墨照臺榭

錢南金華

亭人

落落東甌陳特達衆所詫

陳元禮嘉人

雙湖王文學識晚

互相訝

王昌言
攜李人

平生此數子因之氣質化況茲得孟公

粮秀見良稼關絕殊有懷起舞雞鳴夜

送傅子初先生之信州錄事

去年十月交冬淺寒輒沍客居江城館燈火在風露君
從錢塘來舍舟縱游步一見心爲開問勞出情素番陽
與雲間相望千里路會合匪偶然況是夙所慕江左古
世家粲粲美風度射策衣繡歸春生五陵樹文章天機
錦到手眩昏瞽坐談極疇曩歡然獲知遇自冬更徂春
不問朝夕晤君於稠人中走獨心所寓傳舍稍密邇泥
濘亦枉顧開卷析疑義沛然決東注賞音風雅間神會
見天趣平生耿耿懷不爲流俗具因君頗呈豁欣快未

易喻誓將與此老結納視親故款洽豈有極忽復報爪
戍錄曹雖民職未足展抱負行者崇令德政化諄先務
分違坐契闊引領不可遯中年別親友作惡若深忤梅
風彭蠡寬歸鷁慎速渡後約仍綢繆中情尚能賦芳洲
蹇誰留懷哉美人暮

題傅伯玉來青軒

走昔重慶下總角拜而翁聞之祖父言此老臭味同與
我爲世契家在兩山中聞山在何處僻近滄海東先生
隱其下邃若盤之宮開軒納蒼翠口螺鬱芻芻拄笏以
致之嵐氣浮雲濛雲牕筆硯濕雨檻尊罍空春花與秋
草四時自青紅夏暑熟桃李歲寒斂永種門深俗駕返

迴有前賢風茲來三十載念之感吾衷先生雖隔世有
子傳箕弓家範一經在未覺吾道窮況我與伯玉少小
相磨礱及茲坐遲暮髣髴各已蓬手澤敬所存矧敢弛
前功青山不改色軒檻猶玲瓏排闥匪寓言生意那有
終何以志不朽立言在諸公顧惟通家好詎能忘效忠
泥塗適偃蹇物理還窮通善保堂構心禮法慎爾躬方
來當有振鑒此以自崇

瑞閒雲開士雲深處

高人悟般若斂步問棲息冥然百念靜隨處可面壁況
茲故山深雲氣窈無極雖在三界中若與塵世隔向來
出山時千里縱杖錫西上醫王城北峯文殊域雄峯快

南遊玉几眇東歷周流歲年邁冥然屏心迹歸來白雲
在此見非舊識出山固無心在山那有役雲我今兩忘
有相同木石山河眼底華無復著五色是雲本不深聊
寓幻化質今茲大自在所向罔不適此中有妙趣欲語
難自析我生墮世網性本慣幽寂終當從之游瀟灑共
朝夕復此清淨根直指不容力

昨以青鏡褐帶寄邵志道先輩暇日貽二詩
以彰所賦不啻引玉之慚次韻爲荅

客從渠國來遺我火齊銅蛟螭結其背文藻交青紅一
展雙眼明秋江送飛鴻俗狀媿不稱什襲寶匣中念我
平生親潔白與之同持贈見題品坐使光價隆重君有

僊骨長年駐顏容豈知晦迹士元髻成飛蓬

縞帶不緣辟出自鮫人杼閭閻蔽光華纖纖街紋縷服
用必老成褒博邁前古垂之良有餘踐履有門戶一御
君子身居然稱章甫步趨重禮貌周折中規矩荷君不
鄙夷約束還見許立朝對賓客老矣更延佇

春晴次申屠仲權進士韻

澤國獸久雨暮春生晝陰羣芳悉委翳何以忘憂心況
迺泥潦阻朋侶少盍簪晨興矚新霽拍拍春流深散策
茅簷下對酒還自斟許身沮溺徒逍遙浣塵襟

春山在屋外照映綠水灣暄風斂宿靄秀色若可攀恍
疑桃源路窈窕非人間欣然寓游目及時爲開顏花香

渺莫卽引領徒懸懸緬思繁華節光風汎山川娟娟渚
花媚恰恰谷鳥遷郊人戒農務芳草催詩篇于時正興
矚擊壤聲相傳沉憂感物色泰道何多愆人事蓋有忤
天運豈所偏安得伶倫竹感召和氣還大鈞忽駘蕩生
息斯可全願言陶化景調燭在時賢

奉寄海鹽知州李正卿先生

往歲事行役路入錫山道公務有程限不暇致幽討期
會邦大夫迺得斯文老班荆草莽間一見顏色好船頭
接杯觴彼此露懷抱泚筆賦黃花屬意出天造暇日再
升堂披豁見文藻學問仰前列結納悔不早所惜吏事
稽告別殊草草歲晏歸故林藜藿強自保雲霄絕躋攀

世路迹如掃文星忽移次屢起視蒼昊雖乏彈冠資庶
得慰枯槁感激良有懷心焉怒如擣海城遠邊烽觀瀾
近三島惠然澤斯民終以養吾浩會當擊扁舟濶絕重
傾倒

贈星數術士陳秋巖

天上種白榆豈使塵世知人心極天理乃有步天詩好
風或好雨未易以意推晦明與纏次測候無愆期人身
列三才照耀匪所私歷象示禍福鑿鑿信不欺陳生得
元祕傳授有心師指掌披周羅隱顯見豪釐我生五行
內貴賤詎可移因子許蔗境遲暮不復疑

人身小造化中有天地理形氣苟相遭總合大易上自籌

策運乘除變化亡起止千古發幾微乃得袁與李擊壤
集大成煥然具衆美經世浩莫量論命同一軌微言明
晦吝勇決至生死擾擾六合中萬類莫逃此相逢叩浮
生妙語瑩如水往哉抱韋編冥心究終始

田家四時詞爲九山學稼軒作

大鈞播羣品生意滿寥廓晨興矚南畝鳴鳩在林薄婉
嬾起遐思良時戒東作燒痕日以回野水日以落荷鋤
豈辭勞動勤有餘樂臨流歌幽風心跡欣所託

迢迢谷水陽山勢西南翔平野萬頃間林巒互低昂屬
茲長養節綠陰滿虛堂耘耨旣休息藹然苗稼香端居
無物役朋來時命觴餘力事編簡先民遠相望

廩秋碩霜露歲功行及時刈穫遍原野萬寶紛陸離童
穉日夕喧欣然不知疲聖門貴道德於焉鄙樊遲無逸
示艱難拳拳戒先知微生已忘世舍此將安之

鬱鬱嘉樹林宛宛溪水曲幽人此躬畊良田遶茅屋歲
晏農務休我廩羨種繆蜡酒歡里閭相與介景福變遷
吾弗虞治忽吾亦足永懷陶公廬無忝鄭子谷

戊申仲冬兒穎爲館人所連得罪繫獄朋游
咸謂必老夫叫閤乃可昭雪由是衝寒扶
僊戒途凡越旬始抵石城道間記所見得
詩如左

澱湖

夜宿郭家舍早行陳墓村霧歛湖蕩白遠水浮晴瞰兵
餘聚落廢草木蕩不存倚橋得野店判船具晨餐向來
經行處恍惚不可論川原莽無際黯然消我魂豈知衰
暮景值此天地昏

吳門

日夕望吳門荒煙翳寒草泊舟問何處云是對門道三
年百戰餘人烟迹如掃舉目山河異恍若天地老殘民
餘幾何流離孰能保仁者不可追誰其念枯槁嗟哉棄
除理實匪人力造茫然夢寐間惆悵對蒼昊

新安鎮

白首念舊遊瞬息六七載興衰反掌間宿昔魂夢在向

來太原公襟度絕爽塏大開青油幕籌策善掄采談笑
合經綸事業有期待入幕匪郝超羅致慙郭隗重來弔
遺跡驚心變桑海故舊散如雲我獨毛髮改城門鳴咽
水似恨有遺鏜天運不可量鑄錯詎能悔

沙湖

凌晨出沙湖杲杲寒日赤望路指西南趣風挂帆席行
行數里間舟底盡沙磧歲暮寒水落過者總煩劇篙師
力支撈進寸乃退尺叫呼問鄰舟始得指所適中流植
荏葦表以深水迹由茲遂無阻四望始充斥迢遞達岸
傍回首日已夕嗟予匪徒行衰謝牽物役人生苦多虞

仰羨投林翮

義興

口風中夜起白晝生晦冥舟行向亭午問路循郊坰日
色稍穿漏歷歷崗巒青地出陽羨西亂後皆凋零良田
久荒穢聚落如晨星乃得張生廬回塘水冷冷少年頗
解事肅客開林扃燒薪具湯沐置酒陳壘餅具言兵火
事慘惻難爲聽余亦感其意強飲忘歎醒明發戒行李
指點仍丁寧

前馬鎮

水行數百里今日始登陸老來筋力微徒步窘局縮暮
抵前馬鎮人煙稍蕃簇琳宮半摧頽猶是前朝屋陰陰
寥陽殿仰見貌像肅吁嗟禮樂壞銷毀日相逐鬼神依

人靈至此亦傾覆出門投逆旅展席成地宿江東形勢
高土室頗溫燠牆隈卧兩牛對月寒舐犢因之傷我懷
中宵淚盈掬

漂陽

戒車屬昧旦霜露猶淒淒折旋荒墟間石逕迷東西第
宅燒焚盡頽垣互高低北風振林箔寒鳥向我啼逶迤
出官道所見愈慘悽南來多遷客一一援子妻嚴冬犯
冰雪面目俱沙泥歷險復凍餒矧敢勸攀躋皇天有恒
運何以慰黔黎擾擾六合內誰能遂幽棲

七里山

我生本無營垂老值逆景山水性所樂邂逅心目逞朝

來經行處林麓頗深靜松篁雜泉石豈不慰馳騁一見
暫解顏愁慮終莫屏那能似平昔到眼輒記省始知乾
坤內萬事如過影患難偶相遭定力未深領曷若忘吾
憂陶然造真境

分界山

亂後喬木盡新植纔拱把惟時搖落餘山色亦瀟洒至
茲頗險峻宛轉曲崖下路出分界山神思欲傾瀉僅有
古廟存斷碑仆荒野緬思承平年處處難豚社衣冠不
復進何由斷風雅我雖一腐儒自謂賞音者胡然迫物
累對此失陶寫

官塘

曉行犯霜露驅車上崇岡四顧人煙稀日色浮蒼涼山
家竈無突炊烟滿衣裳出門復風沙老眼終昧茫父老
爲我言時事殊可傷此邦最是邑右族侔金張粵從亂
離始十室九喪亡強壯殞鋒鏑老弱委路傍形勝旣改
觀山川遂無光累累偷生者榆景何由長語罷長揖去
喟然面穹蒼

白府君廟

道經溧水縣古廟當城陰浮雲映霄漢鬱鬱宮殿深脩
門聳飛閣穹碑列森森前朝屢褒頌落落正始音國家
崇祀典首以民爲心陵谷有遷代造化無古今信知鬼
神德福善終禍淫馨香苟可薦黍稷非盻歆

謝亭岡

此地非深山所歷無絕險高下百里間崗巒互重掩民
居稍聯屬兵餘苦勤儉山田固微收況復經歲歎停車
謝亭岡暮色昏冉冉風寒人不行遙見燈火颺恍然遊
子懷偃蹇忘拘檢

青梗

夜寒宿秣陵曉霽度青梗芻臨總溝壑不啻瞰胥井俯
視層冰橫照目光炯炯輿人亦良苦交馳畏肩竝霧昏
迷轍迹有力不敢騁我時舍車行屐滑不憚整殷憂莫
暫置懷抱常耿耿山川不我厭衰晚負清景何當問蒙
莊寸心若灰冷

金陵

亭午寒霧收，日色漸昭晰。此行旣迢適，身世任曲折。四顧遠近間，羣峰儼環列。峩峩石頭城，形勝天地設。龍虎相踞盤，王氣故不輟。鍾山一卷石，迴與他阜別。山川無情物，往往隨變滅。粵從典午來，禹跡屢割裂。豈不祈永延，中自仁義缺。是知王伯資，初不恃險絕。誰其罪真宰，惆悵還結舌。白首匪壯遊，弔古粗可悅。唐虞彼何時，長歎肝肺熱。

壽靈源上人遊方

我生頗宏放，素有山水癖。胡爲隨世網，所願久未適。矧當風塵際，及此頭盡白。豈如浮屠人，蕭散無物役。名山

勝水間往往快遊歷青鞵萬里道不汗縑塵迹相逢明
眼士心地渙冰釋壽公山林秀豈憚勤勞力發軔始自
茲端可窮絕域設心一以廣所向竟終極了此最上機
三界在瞬息歸來烟水間借我半禪席

錢塘林子文以星術醫藥畫筆遊食江湖爲
題行卷三首

璿璣耿夜光所示各有象七政一以齊元理益深廣萬
類靈者人命運合天壤儒先妙推測經緯在指掌後世
得其文禍福益宣朗

我聞賣藥翁夙尚韓伯休避名字宙內殆亦僊者流後
來不乏人往往繼前脩濟世在陰德豈爲生事謀刀圭

忽通神遂與元氣游

古來朝野間靡不重豪素山水擅甲科夙昔著名譽
滂瀝積雪峯險絕懸崖樹之子法李郭惜墨見天趣
幸寫桃源圖艱危得歸路

劣女嫠居澄江無後可託親往載之以歸庶
盡父子之道且得縣宰給以公文沿途無
關讖之虞丙辰歲二月廿一日出關宿城
南屠家鎮逆旅中夜分枕上紀述示舟中
同行者

暮出澄江城夜宿屠鎮市身老憚驅馳情真易嗔喜生
平兒女債累及衰暮齒婚嫁雖粗償生死那可擬逝者

不復追存者詎能已經營盡人事得失任天理此行未
爲迂所願聊復爾同舟得佳侶聯榻忘旅邸去住釋殷
憂周旋賴知己鷄鳴客夢迴犬吠征人起旋聞啓重扉
又欲戒行李闕譏良可虞公檄信足恃吾生旣若浮老
境復何止沉冥但結舌感激還撫髀聞道固茫然忘機
亦久矣何當絕紛埃放情好山水

寄贈潁上縣令車則明會稽人小兒潁以罪
遷彼此公知其非辜每加矜睞

東瞻會稽山萬古神禹跡嶽嶇控大荒偃蹇鎮南極蓬
瀛屢清淺造化恒鬱積人物秀所鍾不啻崑產璧衰微
或相尋生毓詎肯息之子經世資製錦整淹抑光岳含

靈氛終古有通塞

孔門有遺訓政事列四科
畢父坐鳴琴武城起絃歌
至今百里間聖化恒漸摩
汝陰古名郡先哲屢經過
巢由垂隱跡歐蘇鼓文波
起廢喪亂後豈不煩撝訶
頗聞德化感道碑藹春和
願言邁前列脩途振鳴珂

微宗事儒素家在嚴灘上
衣冠久淪落喬木亦凋喪
平生江海心既老尚宏放
應門賴弱子粗習菽水養
一朝坐斥逐夢寐隔千嶂
無家復貧病曷異楚囚狀
傍徨砥犢情悽惻倚問望
明公憫斯文青眼顧流浪
有德彌二天沒齒詎可忘

贈寫神王鑑堂

江心百鍊銅照物無遁形人於天地間方寸尤神靈不
知子都姁有目若晦冥之子頗絕特炯炯震瞳青豪端
化工在妍醜任使令凌烟重一代傳若貴千齡自古賢
達士德義斯可銘慎勿薄固陋更叅相心經

寄南金絕句

朝望苒溪雲暮望苒溪水倚窗對晚色懷人不能已

夢中紀遊

春澤下楚雨暮江開野花巖灘釣魚客却上漢仙槎

題寒石絕句

雲際天籟收石底元氣蟄幽人憺忘歸日暮山鬼泣

金錯刀竹

一 與謝靈運書
君子在澗谷歲晏服豹鞬擬將鐵石心鑄作金錯刀
二

蟻術詩選卷之一

蟻術詩選卷之二

元雲間邵復孺著

明新都汪 稷校

五言長律

貞溪寒望

物色存荒域人煙散遠郊
閑門當野際望眼出林梢
水落三秋後天寒十月交
草蕪殘畎塵沒舊衡茅
日送牛羊下霜催橘柚包
溪渾魚漏經樹折鳥傾巢
風俗從時改邱園未易拋
生涯慙負部歲事乏充庖
獨學唯踈嬾羣居適混叅
世途多反手友道絕投膠
無復懷招隱猶堪賦解嘲
興來從目斷一鴈下塘坳

至正庚辰歲暮大雪同孫果育季野衛立禮
三先生分韵賦禁體得天字二十韻

肅殺成冬令禎祥兆臘前何人能剪水此夕遂彌天始
訝同雲合俄看大地連皇恩敷宇宙春意滿山川氣應
豐年早光還太極先灑牕初浙浙入幕已翩翩部婁因
成績坳堂久未填隨風元辟易帶雨却俄延萬室均霑
瑞千林競奪鮮獵圍明燧火僧舍起茶烟高卧甘茆屋
深耕望林田映書如有約授簡豈無緣金帳家聲舊朱
樓樂事傳酣遊曾驪褭低唱總嬋娟尚覺寒鑪好猶宜
破帽偏雞羣空出色驢背莫爭妍嚴瀨仍高節程門憶
少年陶情憑酒力禁體詫詩篇豈意三陽迫重驚六出

全因聽郢中曲欲覓剡溪船

太原秦景容肄業胄監以春秋經中大都鄉
魁有田在海隅至正壬午秋以收稻至雲
間錄示近詩和韻復其來意二十韻

世宦推三晉聲華自五陵禮隆鄉舉首望重辟雍朋白
璧光堪摘青霄世所矜山陽聯允胄淮海接雲仍鼓篋
曾無忝穿楊豈不勝十年加淬礪萬里會騫騰俊比峯
尖隼清嫌棘上蠅依依春月柳炯炯玉壺冰家學多軒
冕師模足準繩吟空謝池草業費剡溪藤壯志懷前席
雄才薄敗繒詞源長倒峽賦壘況高脰道本關淪喪文
應有廢興遠遊方澤國清話及鄰僧鄉味鱸曾膾家書

鴈可憑海潮鳴客枕江雨入書燈繼廩饒杭徐羞遽到
芡菱雅懷青嶂疊口口白雲層傾蓋真如故盟爐獨未
能春秋須附驥早晚看搏鵬

送松江太守楊公正秩滿歸太原

裂土邦千里孤城海一隅廟堂嚴遴選牧守慎徵求有
美楊夫子真如漢列侯雄才方趙壁問氣出并州卓蓋
聲華重銅章禮數優民心懷善教政典邁前脩突兀黃
堂改森嚴畫戟稠阻飢憐接踵移粟慰窮愁疏鑿江河
道經營畎畝秋泮宮仍頌魯多士率歸周一諾疏畱獄
諸公服遠謀笑談均賦役聲價滿林邱強梗俱潛跡高
明獨運籌拳拳崇祀典翼翼介神休報最還前列掄才

孰與儔去思登史冊來暮起歌謳雲路追黃鵠春風送
紫騮棠陰長藹藹柳色自悠悠波暖江淹賦天空庾亮
樓未能趨幕府只想逐鰲頭朝野連吳楚恢台直斗牛
何因能借寇高興欲依劉

悼趙士宏先生宋宗室良字行

與先生同
戊子生

大族連天水餘芳出浚儀英雄隨氣運浩蕩濟艱危爲
庶清門貴傳家舊俗垂人猶羨鍾鼎業不廢弓箕文物
終難泯才華竟莫施通家推執友喬木共殘枝先子交
承蚤同庚意氣如由來諳契舊比歲數追隨倡和形詩
筆殷勤接酒卮客樓頻對榻親舍屢彈棋近作溪頭別
方爲歲晏期計來疑入夢心折恨難追殷禮終黃土商

歌起總帷斯文情所感況乃突吾私

錢南金往歲胥會嘉禾紫虛觀近聞館於澱

湖謝氏經年隔絕寄詩問訊二十韻

世路多闕隔音書絕往還故人長在望良會眇難攀伊
昔來茸泖平居共里闔簡編爭取益詩酒最相關花徑
時時埽林荆日日班比年恒異處吾道屬多艱鷗鳥風
波急醯鷄宇宙慳洪溪重邂逅元鬢各凋爛分手仙人
宅傾心刺史灣璫璣寧自韞蕭艾孰能刪忽報遷翹館
還堪慰旅顏新詩應夢艸短袂快登山孤陋嗟無似驅
馳老漸頑塵居惟習嬾浪跡暫投閒漫欲爲雞口何能
見豹斑心期忘蹭蹬歲序任循環故里春猶在秋牕月

又彎平湖澄水鏡孤阜聳烟鬟目斷蘼蕪際神勞夢寐
間少須携白墮相與岸青綸

辛丑早春和顏仲逸新正試筆韻

江湖逢獻歲塵土各忘年天際凝煙沒林梢霽雪懸山
川祇尚爾風物頗蕭然鳥語春聲動魚浮水氣還豐凶
沿俗識治忽驗巫筭對酒亡新頌簪花失舊妍干戈紛
未已燈火寂無傳閱世驚身老題詩讓爾先

客居感懷寄簡吳野舟四十韻

喪亂嗟吾老漂流惜子賢鄉闕荒政裏萍梗畏途邊撫
事從誰論偷生祇自憐泥塗長泊沒甲子屢推遷未覺
心灰冷何堪室罄懸泰山那畏虎蜀道但聞鶻蕩析彌

千里征徭徧一塵故園迷草莽喬木混風煙寶劍深埋
匣瑤琴久絕絃兒童荒問學故舊失周旋生理儒冠誤
才情世累牽志乖綿上隱業廢汶陽田蓬島知何地桃
源別有天少年違宦達晚景負神仙著屐慚靈運登樓
感仲宣意行花漠漠帳望草芊芊物色何曾歇人情實
自煎愁添新白髮貧憶舊青氊結舌防滴俗潛形遠逆
愆行藏甘屏迹塗抹敢求妍倦欲英華斂窮惟氣節堅
不煩詹尹卜雅愛子雲元夙昔知予者于今獨爾焉家
聲昭代重姻好德門聯和璧傷淪沒韋經肯棄捐重逢
驚濩落交慰憫顛連江海孤舟險風霜短褐便襟懷還
尚爾身世總茫然稍訝頭顱改仍欣禮貌全賞音殊落

落屈指特拳拳豈望唐虞際猶攀魏晉前
隱淪須隴畝衰謝合林泉黃卷希聞道丹砂覲引年
誅茆求杜曲種菊訪斜川春雨漁蓑唱秋風鶴帳眠
酒杯從放浪詩卷漫流傳小佇乾坤豁無憂雨露偏
浮生多曠達此意豈遷延投老寧無託相親定有緣
好焚經世策同貯買山錢

邾仲誼博士久別重見以詩叙聞依韻荅之

二十韻

客舍窮無事柴扉懶不扃鄉田荒稼穡野饌雜參苓
喪亂身空老浮沉夢未醒功名嗟曉露故舊惻晨星
世道紛叢棘流光逐建瓴忘形從槁木託跡任浮萍
衰衰欣

投筆寥寥願授經堪輿更代謝動植總凋零幸免題鸚鵡
何堪賦鵲鵲暖風仍甕牖涼月尚虛櫺適興紋楸局
開懷瓦缶醺風埃便短褐畎畝絕侯鯖細帙繁新蠹練
囊冷舊螢故人頭盡白重見眼終青媿我淹顏巷傷君
憶孔庭久懷投臭味何啻挹芳馨思繞盟鷗渚羈栖喚
鶴汀雲霄迷北海壺嶠隔南溟蹇劣顏增甲衰顏目眩
丁幾時同辟地萬里快揚舲

追悼南金錢文學子二十韻

弱冠論交道斯文獨賞音瑤環生世族冠帶表儒林學
海窮探討詞源極訪尋漸磨期遠業爾汝得同襟文采
珊瑚樹聲華綠綺琴幽蘭湘浦韻喬木謝庭陰才美時

無遇情真世所欽精神元不負道骨竟難任嵇阮風流
遠與犁意氣深半生聯里閑卒歲盍朋簪夜雨巴山話
陽春郢上吟對碁忘寢息沽酒喚登臨漂泊緣生事絨
題出素枕風塵多契濶鄉井共浮沉末路傷存沒危途
異古今空梁迷落月宿草賸遙岑後死遭時變殘生迫
歲侵丹心長耿耿霜鬢益駸駸草記王孫跡梅存處士
心空懷掛寶劍那復鑄黃金

乙卯立秋日客舍紀懷二十韻時長兒克穎
遷于潁水幼兒堯浮沒于濠梁故園凋落
殘生茫然不能無感於天時也

棲遲頻閱歲疎嬾又經秋身老那禁病時危未解憂客

居甘屏迹儒術悔無謀撫事浮雲變驚心大火流家山
如隔世鄰里盡荒邱杜曲傷遺族咸陽惜壯遊兵塵餘
瓦礫烟夢亂汀洲南郭違憑几西風倦倚樓幾年春浪
濶三泖暮雲稠世道何多梗吾生信若浮悽迷忘夢鹿
浩蕩失盟鷗鐵硯功無補丹砂志未酬偷生情惘惘淋
後計悠悠楚室囚仍繫穀陵骨未收音書惟墮淚伏臘
轉添愁霜露埋歸轍關河阻去舟孔懷陳俎豆雅志託
箕裘悔吝亡先兆行藏豈預籌疎狂猶有興衰謝復何
求宇宙還清氣樵漁送白頭

蟻術詩選卷之二

蟻術詩選卷之三

元雲間邵復孺著

明新都汪 稷校

五言短律

陪孫果育先生遊干山次韻三首

題圓智寺

古寺藏雲表幽花遶路徬溪山如有約心跡總相忘翠
壁題詩蹟青籃采藥香野人應未識白髮舊潘郎

懷古太初書記

此老誰復記近來何處尋勤勞非左計正始有餘音月
冷虛白室秋高空翠林遺蹤不可訪回首碧雲深

虛白
空翠

皆其
室名

贈壽南麓上人

暮下山房榻晨炊石澗泉聽鐘清夜坐移枕白雲眠南
麓曾題竹東林未種蓮何當結茆屋投老學逃禪

辛巳歲元日雨雪中飲曹西翁家次翁韻

望眼鯢鵬運驚心犬馬年東皇開萬象南雪暗中天歲
事驅馳裏村居寂寞邊拊花易爲醉夜久不成眠

錢南金往海鹽省母阻風歸遲用曹雲西韻

懷之

村纜曉未解溪風晚自和君行殊未久花落已無多夜
饌魚如玉春庭雀可羅遲遲去魯日遊子意如何

寒食次雲翁韻

春信催元鳥客愁聞杜鵑
一邱寒食雨三月杏花天
物色知誰賞風光亦可憐
西湖長入夢人在采香船

還家舟中口號

人語荒村晚船行逆水風
平蕪鷗外綠落日鴈邊紅
奔走生涯拙歡娛往事空
故園看漸近喬木有無中

荅宣伯襲孝廉見寄韻

高致嵇中散能書褚遂良
家聲惟學禮經術更尊王
湖海多清議邱園閱耿光
驂騑終閑步未肯漫騰驤

丁亥臘月廿八日立春雲西翁有夜枕之作

詰朝置酒餞歲次韻以復

蜡酒今朝臘牛鞭昨日春山林藏勝地天地有遺民池
草生新夢牕梅若故人夜深風雪底鷄唱又催晨

橫泖客舍立秋日

塵世常爲客天時又立秋病餘疎簡冊地僻少朋游高
樹商聲動虛牕雨氣浮浮生迷出處祇合老林邱

橫泖雜言二首

橫泖清晨望人烟樹幾重三江歸禹貢衆水會吳封雲
倚孤村塔潮生半夜鐘田翁談古跡隔浦是青龍

橫泖在吳

松江南
數十里

廣廈人來少青山遠對門緩潮通曲港高樹接遙村井
記袁崧宅鄉連宰我墩行吟聊適興心迹未須論

袁崧宅宰

我輩皆在數里
間遺跡存焉

客舍早春

下榻荒村夜挑燈傳舍春江湖爲客處花鳥隔年人世
事隨時變風光幾度新天涯芳草綠想見故溪濱

寄南金

樹老深村巷苔荒舊釣磯地偏途路隔世亂簡書稀病
骨須丹鼎閒身且褐衣春來能載酒重話久相違

哭劉希孟先生

蜀國山川秀吳門閥閱深家聲推朔黨世業擅南音時
俗防遺直江湖見古心寥寥紫霞譜諸子尚能尋
有道常高世懷才只曳裾賦愁周庾信卧病漢相如貧

幸家擅在清無僭石儲斯文多汲引淚落寄來書

無錫東屯和朱梅山司丞韻二首

世亂人烟廢村荒道路賒遠山猶突兀朽木自歌斜黃
落驚林葉紅搖見渚花獨憐行役勸回首鬢霜華

此地窮兵後前朝勝跡賒黃沙成廣漠白骨競橫斜鶴
去空華表鷗飛起浪花却思天地裏底事有紛華

歲暮九山道中二首

兵火何多難人烟此獨存鶴歸城郭老龍去海波渾廢
屋青山寺斜陽錦樹村蹉跎猶自任軒豁共誰論

向老忘機事無營守故林風霜屢搖落身世轉浮沉列
屋咻齊語孤舟動越吟梅開驚歲晚於爾慰貞心

橫溪夜思二首

宿霧隨雲斂寒星著水明
容舟移遠岸戍柝報初更
老覺驅馳倦愁思喪亂平
故人鷄黍約歲晚更多情
海角天寒夜沙頭月暗時
梅花還入夢芳草不成詩
聞道懷南郭傳書憶下邳
所嗟遲暮色豈計往來期

挽衛立禮先生二首

文獻承平族衣冠靜壽堂
塵居成大隱家學擅遺芳
牀上圖書富壺中藥草香
清門堪佚老喬木遽斜陽
白雪孤鸞操紅塵小鷄冠
陶情千日酒養道九還丹
風月詩篇逸乾坤舞袖寬
花堂行樂地春事在芝蘭

泗涇雜詩四首

閱世心先老看山興橫生驅馳仍合道遲暮若爲情事
向愁邊廢詩從酒後成晚來黃葉墜閉戶聽秋聲

客枕驚秋夢鄰舂起夜歌兵塵長荏苒歲月易消磨未
習游談勝浮生左計多扁舟未落手浩蕩白鷗波
秋盡江村迥時危世路艱地偏從湧浪身老絕躋攀隱
几懷南郭移文尚北山興來仍極目詩滿夕陽間
鴈驚橫秋影村墟起暮寒隱淪同木石游惰廢衣冠白
日那能駐青山不厭看故人江海隔驚喜問平安

次韻荅馬本勁賢良見寄

公府徵賢日賓筵講道時抗詞風灑灑退食晝遲遲才
美蒼生望文高宰相知曳裾纔借逕入幕已先期

俞山月用韻叙舊如韻答之

市樓聯榻夜溪館艤船時縱酒花飛遍吹簫月到遲情
隨時事改心有故人知但得江山在逍遙自可期

早春用前韻述懷錄似馬俞二友

剪燭驚新歲看花感舊時身閒從髻改親老願春遲貧
豈揚雄逐愁惟庾信知風塵任萍梗未負野人期

城樓雨夜

十月荒城夜三更暗雨天鴈聲營柝外鷄唱寺鐘前松
菊何人問萍蓬往夢牽物華兼世態回首一茫然

歲暮

丁未

江海歲云晏乾坤戰未闌世途長恍惚吾道轉艱難陶

逕無成趣龐門敢遺安豈知投老日不厭遠遊冠

己酉春金陵旅舍和蔡君立程傳可二友韻
六朝江左國二月雨中春舉目山河異驚心草木新盍
簪忘孟浪把酒慰艱辛莫問庭花曲興亡有鬼神
撫事傷遲暮勞生感晦明風塵城郭老花柳歲時更興
午虛龍虎阿房實鼎鑄春寒欺旅客二月未聞鶯

奉酬錢曲江見示韻

何遜詩逾古江淹筆尚靈秋風黃葉寺春雨綠莎廳行
樂那能繼浮沈不暫醒鹿門在人世何日遂潛形

漫成二首

久雨秋將盡愁雲冷未開形神同木石眼界總蒿萊舊

讀書忘記新成句，嬾裁棲遲何所託。
衰謝莫相催，風急欲墜戶。
夜寒思授衣，亂離生事拙。
漂泊壯心違，蝨犢長形夢。
亡羊久息機，柴門秋色起。
倚仗看雲飛。

春日橫溪

對酒忘衰髻，看花憶故園。
春光空在眼，客路總忘言。
老羨山林逸，愁嫌市井喧。
周旋從習俗，出處信乾坤。

哭王子章先生二首

家世儒爲業，江湖字得名。
貧居成樂地，孝養出真情。
造士登侯泮，觀光及帝京。
哲人天弗壽，波冷自鷗盟。
好客長浮蟻，書經每換鴛。
家庭聞禮早，舍館育才多。
力學心何苦，加餐老不磨。
斯文總凋落，天道信如何。

挽謝德嘉同知二首

鄉里推名族，邱園重老成。
璽書來暮景，玉樹起前聲。
讀史諳興廢，彈冠荷寵恩。
晨星政寥落，天道底無情。
高世襟懷古，承家姓字香。
墳荒曾迭奏，橋梓復聯芳。
雲冷登山屐，春閒夢草堂。
爽靈應不朽，騎鶴晉人鄉。

和襄陽縣宰沙德澗春遊韻

春事元無算，人生若有涯。
傷門新種柳，滿縣舊栽花。
小隊東山屐，清風北苑茶。
襄陽行樂處，幾度接離斜。

蟻術詩選卷之三

蟻術詩選卷之四

元雲間邵復孺著

明新都汪 稷校

七言古風

昭君出塞圖

漢代明妃余所恥遺跡猶存畫圖裏當時祇恨失蛾眉
千古相傳關國體佳人命薄何足論大國禮重當自尊
堂堂卯金亦左計孰謂口口能懷恩古今多少明妃曲
萬語千言題不足獨餘哀怨在琵琶近日音聲轉煩促
君不聞樊舞陽霍票鷄與姚同英略奇謀竦廊廟精兵十
萬可橫行殄滅強梁在談笑吁嗟此志何因循漢廷遂

有匈奴塵

松居圖歌爲會稽陳元茂賦

暨陽山人讀書處隱約蓬萊山下住天荒地老百年餘
留得承平歲寒樹樹根古屋弗計年樗櫟爲棟薪爲椽
蒼龍摩霄雲沃若天籟滿坐風泠然山人住久忘清苦
淳朴襟懷侔上古夜然明節作書燈晝煮茯苓登宴俎
海桑遷變孰可稽直欲掉首從夷齊提封一夕遍鄉井
高舉更覓青雲梯我欲尋真換凡骨屢訪名山猶未得
山人若許穿雲羅輒向畫圖求髣髴

畫梅行會稽王元章惠以墨梅且題其上依

題酬之

道人畫梅墨色爛頃刻畫成還自歎不教么鳳識貞心
故遣苔花封老榦空江歲晏冰雪寒江上月明人倚闌
隔江美人相見難誰其致之白雲間美人爲我話疇昔
感此孤高混荆棘春風一夜到寒窗坐使化工長太息
嗟予清絕忘世緣得此似挹羅浮仙歲寒相對深崖巔
夢中梨雲豈其然

玩古行武川唐允文蓄古圖畫碑刻金玉彝
鼎及諸器物一室中名之曰玩古齋

吁嗟世道久不古元氣寥寥僅如縷諸生日夕事簡編
猶欲冥心究鄒魯三墳五典素不完雲門咸池寂無語
崑崗之火幾燎天大貝天球藐何許古人代謝如逝波

古道凋喪猶傾柯區區羈物有成毀歲月既邁存無何
唐生游心及千載所見輒辨正與訛埽除一室玩往昔
迴與先哲相漸摩木落江空天地老江上相逢慚潦倒
世降俗薄殊紛綸乃是設心求古道我亦齋居養時晦
賴爾能來慰枯槁從茲可見羲黃心歲晏相看期保抱

桃源圖歌

陶公昔作桃源記謂有桃源在人世不因漁子逐桃花
那得世間知此地重尋舊路迷其蹤天闕絕境無由通
偶因天台劉阮事乃謂此有神仙宮二事流傳本殊絕
後世相治罔分別昌黎先生一品題疑誤爲君談笑決
誰將豪素畫作圖高唐想像終模糊陵遷谷變屢反掌

此中按堵猶唐虞民物于今同土苴有力難尋種桃者
白髮吳儂淚盈把安得桃源遍天下

荅唐元度惠草堂詩陽羨茶

君不聞浣花老翁隔春水長日清吟泣神鬼不求錄事
草堂貲祇送先生太倉米又不聞玉川破屋洛城裏門
外日高猶未起忽傳諫議送月團便欲蓬萊作仙子二
公高興出天機千古清風韻人齒文章舉世尚茶歌名
教相宗賴詩史青谿野人書屋底歲晚山空念知己梅
花獨伴客氈寒閉戶窮年窺故紙晉昌才子好事者每
與論文心輒喜襟懷蕭散涵江湖學問春容有源委昨
朝過我荒寂濱清貺灑然兼二美我聞建安兵火餘紙

價倍高書版燬又聞北苑道路艱青巖城題阻千里豈
期物色融心神不啻瓊瑰溢筐篚呼童洗鼎烹石泉展
卷高歌發宮徵枯腸漱滌生陽春老眼光明耀牕几我
生追羨少陵翁千載神交得其旨從來亦有嗜茶癖知
味陸郎差可擬邇年潦倒絕賞音一旦爲君重屈指山
中白雲不可持何以殷勤報投李相期月夜來叩門淪
茗談詩洗心耳

旅秋行次韻荅錢南金所寄知近寓秀水僧
寺

紅葉風高墮寒雨商聲起自蕪葭渚三江逝水憺忘歸
獨客羈心亂如縷此時客在江之湄日暮途遠迷東西

鷗波萬頃清景絕鴈門十月愁雲低得子素書如夢裏
知與山僧相汝爾東林結社或種蓮南部養生終隱几
憶昔與子同居時花前美酒燈前詩清風明月見元度
流水高山得子期只今與子成二老脩名不立欣聞道
歲月無情左計多江湖滿地知心少十年共坐風塵中
夙昔元翼成飛蓬慣看青白有俗眼已悟得失如塞翁
歲晚終歸釣遊處與子誅節黃葉路時從編簡對古人
日涉田園自成趣人生百歲何時閒我輩久在浮沉間
吁嗟長安日已遠莫負江南烟雨山

題許守中太和丹室

至人水火鍊空鼎中之物止形影涵融造化發春溫

感北乾坤歸內景後來學者傳失真幾人能識天地根
強將旁門作大道甲是乙非徒糾紛山人何處得其秘
烹煮砂鉛作良劑坐收元氣入刀圭起療沉痾等兒戲
歸來燕處一室中神光不夜春融融可憐下土混昏濁
豈若違世超鴻濛九還七返窈莫測欲往從之限溟渤
安得凌風振元翮稽首安期問五石乞與寒瓊換凡骨

四皓圖歌

長春道士身姓許博雅好奇心獨苦手持六尺商山圖
要我賦時原上古展圖宛見四老人秦漢既遠誰識真
當年事跡稍茫昧舉世傳說徒紛紜我聞前王建邦國
樹子由來戒無易卯金欲貽四海憂於此忍能忘羽翼

此行實爲蒼生計世變相仍豈天意大綱一正四百年
孰謂斯人終避世山中紫芝今有無草木蒼莽埋邱墟
驚濤虐雪昏天衢祖龍餘孽何由蘇曷若繼爾爲遠圖

澹滄漁叟引爲樵李蕭養素賦

澹滄溪與鴛湖接中有漁舟小如葉漁郎把釣溪之濱
日夕歌呼弄煙月滄溟空濶風常寒紅塵辟易天爲寬
襟期不啻在楚澤出處似欲凌巖灘一夜嚴飈吹虐雪
千山鳥斷人蹤滅忽然漂泊箕潁間洗耳長流更清絕
人生百年俱有涯榮辱不到漁樵家天吳海若惡作劇
信緣齊泊終無譁江南處處青山在江上故人毛髮改
尚餘鷗鳥識孤舟不信相看換桑海武陵只在天地間

可惜晉士成空還桃花舊路若邂逅謝絕世故無厚顏

張氏三味軒歌

古來賢達當衰世往往全身遠名利典午骨肉紛相殘
東曹掉首成歸計秋風一夕吹三吳吳中正美蓴與菰
四腮入饌復雉永千里命駕忘馳驅一時託興無遺恨
百世流芳有清論微物因人乃得名至今三美餘風韻
東曹一去今千年後昆散處猶多賢時持三物弔遺跡
清風峻節還依然九月秋深天宇肅三高祠前風落木
瀝酒高歌送迎曲吳淞水碧吳山綠

穀江行三衢之江山常山二水自須溪金川

合流交錯如穀故名穀江潁上文學掾徐

景顏居於其間自號穀江漁隱云

吾聞西安之水如羅紋江山形勝相吐吞二川合流勢
不分清湫迴迴風雲奔中有幽人居喬木暎衡門高世
偃蹇甘隱淪先秦文字不啻數千卷日夕莊誦若對羲
黃人興來出門放孤艇一竿坐釣清粼粼落落渭濱叟
榮名滿乾坤籍籍煙波徒高節摩峨岷清風灑灑絕俗
塵千載而下氣益振神交夢接意所親古今成敗在指
掌一室燕坐窮無垠十年戎馬中原昏城郭挑達乃爾
成紛紜抗顏爲師我輩事忍使此道厄不伸慷慨投袂
起歛見俎豆陳況茲潁水湄禮義夙所尊歐蘇之跡遠
未泯至今父老遺風存君今生意滿藻芹水天米廩手

可捫某邱某水荒荆榛猿驚鶴怨誰與鄰君不見鹿門
谷口雞犬村野人笑語春風溫年年碧草哀王孫

灤東畊歌爲烏溪黃成章賦近在潁庠分教
天寶乾元亂離日東川西川氣蕭瑟中原旋復九重城
灤水猶存萬家室杜陵野老悲無家白頭漂泊錦水涯
入幕何堪故人死爲農復歎京國賒此翁高節無復得
後輩猶懷踵遺跡蜀山萬里何茫茫詩史千年長歷歷
我有邱壑如灤東春畊秋斂誰復同浣花草堂在眼中
日夕想見前賢風十年出處學彌勵放逐居然增意氣
從容時發舞雩詠淒涼亦灑新亭淚人生百年安可常
行役孰不懷其鄉一朝杖屨賦歸去故園草木生光芒

蟻術詩選卷之四

蟻術詩選卷之五

元雲間邵復孺著

明新都汪 稷校

七言排律

汪太守壽席同諸老分韻得蘭字

九仙山下梅開早
生意齋前竹耐寒
插架書多呈琬玉
寫經牕靜長琅玕
晝閑風滿談元塵
春暖庭生結佩蘭
老子胡牀饒逸興
郎君綵戲有餘歡
對棋不勸仙柯爛
醉草從教墨沼乾
門外塵氛俱辟易
壺中歲月儘盤桓
已聞北闕徵黃霸
未許東山老謝安
南極景星明永夜
鶴書欲下五雲端

寄孤山和靖祠堂葉掌祠

聞道高居絕世塵，湖光十里碧粼粼。
向來東閣梅花好，近日西山爽氣新。
學士港口春窮寵，先生冢口石嶙峋。
共欣當代文風盛，不使咸平勝迹湮。
結屋數楹鋪俎豆，種花千樹闢荆榛。
明時汗簡書高節，吉日生芻屈措紳。
綠欵掌祠談笑逸，畫船載客往來頻。
新亭風景應回首，故國江山亦愴神。
蠟屐一雙吟踏雪，銅錢三百醉行春。
家童放鶴青冥上，道士籠鶯綠水濱。
清宴有時呼錦瑟，高歌長是岸烏巾。
江城握手窮冬迫，客舍論心古意真。
一自北風吹去旆，幾番南浦候離人。
喜從歸鴈曾傳信，咲指盟鷗欲問津。
谷口犁鉏仍汨沒，山陰觴咏屢因循。

生涯自信溝中斷，意氣深期席上珍。安得鳴鞭追騷裏，
尚能肆筆對麒麟。黃昏踈影應無恙，白雪陽春莫效顰。
絳帳談經終有約，青藜照坐定相親。西泠渡口重維櫂，
第二橋東擬卜鄰。

曹安雅翁新營灤東莊

小隱清溪多歲月，舊家喬木老風烟。雲寒高卧崑山屋，
雨暖深畊灤水田。洛社衣冠無俗習，善和書籍有人傳。
飄蕭華髮三千丈，寄傲清時六十年。著述自堪當野史，
歸休曾不念塵緣。春生栗里雙吟屐，秋入吳淞一釣船。
茶盞通仙揮麈外，酒瓢留客剪燈前。久諳時論同堅白，
自許風情合太元。白璧一霍光炯炯，朱絃三歎舞蹁蹁。

庭深玉樹孫枝長離遶黃花晚節妍氣味本同瓜圃從
歲寒猶比竹林賢想應出處人同世好在鴻濛太極先

蟻術詩選卷之五

蟻術詩選卷之六

元雲間邵復孺著

明新都汪 稷校

七言八句

冬桃

重到元都異昔時紅香冷落怯瓊肌
天寒人面誰相映
歲晚漁舟或可期三月禹門風浪惡
小春仙洞雪霜遲
淒涼不似天台路萬一劉郎有所思

苦梅

空濛烟霧滿羅浮紺碧生香夢未休
綠髮夜寒遺玉瑱
羽衣春暖怯蒼裘小牕橫幅丹青落
古殿殘粧翠黛愁

骨化寒瓊心似鐵至今么鳳妬風流

出遊別溪上親友

筆牀茶竈未荒涼籬下黃花尚晚香
紀夢每疑蕉有鹿讀書却笑穀亡羊
葵荒杜曲經秋雨柳老江潭帶夕陽
明日扁舟隔煙水風流詩酒未能忘

次韻王彥強客懷

秋風城郭起層陰遼鶴歸來歲月深
鏡裏光華催綠髮牀頭顏色歎黃金
班生有志終投筆鍾子無言久廢琴
白石溪頭問鷗鷺不堪塵事日侵尋

江城暮春書事

三月凝雲連白晝滿城宿雨漲黃沙
歲華不改綿蠻鳥

春事俱成頃刻花每厭巡牕飛野馬絕憐沉竈產官龜
庭槐自是南柯夢觸悟愁人起歎嗟

次韻安雅翁亭屏榮悴松圖

從來故國多喬木此地春風及暮陰榮悴忽看屏上樹
扶疎却憶澗西林某邱易動頻年感今雨不來何處尋
歲晚山空重回首題詩不覺小論心

予故家在嚴陵澗村之西

寄錢素菴鍊師師雲間南城大族

南城曾看五陵花東郭新營處士家每向郢人傳白雪
未從葛令問丹砂華亭夜聽橫江鶴銀漢秋期泛渚槎
忽見梅花耿相憶夜來清夢遶薰葭

用曹雲西翁韻簡瑞閒雲開士

清谿蘭若十里外謝絕塵緣定卜居風靜花飛巖上衲
雨深苔汙壁間書酥燈夜話維摩室蠟屐春尋處士廬
白髮江湖多歲月叢林禮法未能疎

寄錢南金孝廉

與子間濶始十日離別未遠相思深風燈耿耿美人夢
江蘼漠漠遊子心綠柳向人春灑淚碧雲隔水暮生陰
西園花事已寂寞莫爲愁絕廢新吟

奉寄熏自聞上人併謝槐葉冷淘之欸

已公屋下涼無暑翁仲門前水拍天槐葉冷淘時供客
蓮華刻漏夜叅禪獨居不廢叢林禮狗俗仍明出世緣
自有門徒能養道無因重問灤西田

挽會稽呂勉夫先生咸平宰相申國公九世

孫也

家聲奕世畫凌烟曾傷城南尺五天白髮襄陽耆舊傳
黃花栗里義熙年山中夜雨燒丹火門外春風載酒船
何日蘭亭訪陳迹摩挲遺碣拜先賢

次韻曹雲西翁雨牕述懷

時故里大水

積雨空齋晝欲眠莫雲親舍水茫然春餘故國烏衣夢
秋惱中郎綠髮年漢柳蕭蕭吹笛裏巴山歷歷剪燈前
正愁松菊荒三徑失喜新詩寐宴邊

題徐中孚高士代祀武當桃源中朝諸公詩

卷

羽衣使者持金節分得天香下玉墀四海山川歸望秩
九重雨露及虛危桃花洞暖瓊田在華蓋峰高鐵鎖垂
紫府仙官來校籍想應曾采玉堂詩

孤山新建和靖先生祠

曾讀咸平處士碑水沉亭北黍離離南枝不似當年樹
今月曾看此夜詩歲久蒼麟眠古墓天寒白鶴認新祠
斷橋流水聲嗚咽獸對清香酌一卮

暮春次南金韻

茸茸野艸帶煙藍漠漠溪花隔霧酣邨店人稀鷺轉午
官河風暖柳眠三小童荷鋤朝朝筍幼嬾條桑處處蠶
錦里詩人最蕭散短筇時過小橋南

題錢素菴鍊師封雲室

陸地仙家雲氣深，達人棲息共無心。
山中虛室夜生白，戶外長松晝落陰。
瑤草滿階童不埽，洞天無鎖鶴來尋。
華山高處春長好，不管桑田變古今。

又可月亭

結屋天壇爽氣多，廣寒仙樹影婆娑。
神游太極黃庭景，興遶虛空碧落歌。
竊藥姮娥秋有約，吹笙王子夜相過。
道人燕坐光明裏，春滿華池白玉波。

謝王伯靜惠葛巾

爲嫌山鳥怪儒巾，故使青綸矯俗塵。
章甫未能酬壯志，遠游且復邁時倫。
對花漉酒青山暮，閉戶煎茶白屋春。

三月苧衣相掩映舞雩定約詠歸人

東永嘉裴日章進士

鹿鳴詩裏知名久鴈蕩山中識面難若士妙年先入幕
有才如此盍彈冠炎方荔子書能致水國鱸魚興莫闌
我在谷陽城外住日長掃徑待吟鞍

次南金見寄韻

欲采江蘺遺所思蘼蕪滿地綠離離青春不送五窮鬼
造化猶如一小兒落日中原鸚鵡賦東風南浦鷓鴣詞
杜門一向生塵俗不覺今朝又有詩

寒食雨中

芳草離離遍五茸

雲間舊爲五茸城

天涯收拾暮愁濃西郊風

雨一百五南國江山千萬重眼底春光長拍塞鬢邊秋色肯從容闌干此際偏腸斷零落梨花晚寺鐘

奉王眉叟真人二首

兩袖天香近六龍幾陪宸馭到蟾宮鑑湖一曲承恩後
瀛海三神入望中新種梅花期處士久留丹井付仙翁
漢家正重神仙事已築崇臺倚碧空

曾望清風過十洲寥陽宮殿五雲浮仙人金掌涼如水
老子胡牀月滿樓談咲屢陪十日酒過從時借九花虬
幾回目送飛鴻去憶共山中宰相遊

簡唐復齋徵士

五茸春水碧生烟歷歷平林隔武川狂客問奇長載酒

仙人賣藥不論錢
橘間棋子尋真樂
竹下苔痕醒醉眠
錦里錢郎來往熟
相逢毋惜寄新篇

簡吳太然高士

玉皇香案久辭官
小隱雲林帶鷓鴣
冠滄海三山求砭石
黃房五夜轉還丹
自緣瓜圃生涯拙
頗覺桃溪去路難
我亦山陰寫經手
幾時換得白鶩看

簡楷則中書記

上人家在武塘南
一曲林泉護石龕
滿室天花紅陣陣
遶池春草碧毵毵
皐比教雨宗湖學
塵尾清風雜晉談
聞說吾儒黃舂度
詩禪日日與同參

簡黃魯德秀才

洛下衣冠遠莫追城南韋杜本同時江山風景知何似
湖海襟懷自有期近況俱題鸚鵡賦舊情猶託杜鵑詩
蘭舟夢遶清溪曲杜若花開白晝遲

簡賢大愚座元

江湖名字久相知一棹秋風見面遲方外有緣能致我
山中無物不堪詩更長屢下蓮壺箭雨暗猶殘竹院碁
自恨野人無玉帶相逢未敢道深期

送張茂夫之南安縣尹其父嘗爲翰林學士
玉堂學士家聲舊花縣郎官事業新庾嶺風煙終帶古
楚江天氣最宜春好將鼎實調羹用莫遣鱸魚入夢頻
料得此行詩更好因風寄與隴頭人

早春錢南金見訪用陳景曹韻紀會

春溪一擢竹枝歌倒疑相迎感慨多塵土不知新歲改
兒童共喜故人過對牀傾倒情還在接燭盤桓意若何
如此襟懷最真率心聲歷歷見天和

次韻孫果育先生海鹽茶園道中作地名夾
山有金粟寺試茶院錢南金嘗約予遊未
果

聞道夾山金粟寺一如兜率淨居天雲藏衲子煎茶屋
春著仙翁載酒船打破斷碑何代始種來高樹百年前
錢郎詩裏曾相約蠟屐因循未了緣

次孫果育先生觀海韻

夫子舊傳觀水術先生到海輒尋源瀛洲方丈天茫昧
賜谷岵夷浪吐吞形勝不嫌吳地僻要荒共仰漢槎尊
明年三月桃花浪會有神魚過禹門

乙酉歲人日閒雲瑞師過訪得唐復齋錢南
金賢大愚各以倡和之詩見寄因就韻各
荅一章以當新春問訊首荅閒雲

野屋春生喜錫飛曹溪一宿話遲遲未忘兜率叅禪解
且問匡廬結社期世道不侔空向老物華如許却堪詩
明朝煙水還迢遞漸負邛州竹一枝

荅復叅

武川塘上暮雲飛春水迢迢放棹遲謬說銜杯如阮藉

可能問藥訪安期人間動是經年別方外相傳近日詩
願乞昌陽留綠髻東風潦倒插花枝

荅南金

茸柳天寒雪不飛茜溪雲斷鴈來遲春回故國元無賴
人在殊方未可期芳草王孫何處客梅花人日去年詩
門前雨後新流綠獨欠吟舟繫柳枝

荅大愚

馴龍伏鉢夜深飛破袖生光出定遲栢子想應機不露
梅花自與月相期從來名教唯多樂近日浮屠總好詩
欲把談元犀麈尾與君林下換松枝

重東南金

江樹春雲興欲飛扁舟相見偶然遲風埃俱負幽棲役
邱壑曾爲汗湯期晉代元談幾造道周南風化實關詩
思君只隔烏衣巷喬木春深有舊枝

頻年與陳景曾分教泮宮去秋竣事新春景
曾有詩見寄次韻爲荅

故人往往歡遊阻客舍朝朝俗事增秋冷泮池同撤席
月明江市又收燈汗青編簡無新益晷畫闌干憶舊憑
芳草連天未歸去小山招隱復誰能

送吳景高廣文秩滿歸永嘉

東州文物恒多士此老家聲著昔時事業遠承湖學派
典刑曾識漢官儀鴈山喬木春長在魚浦歸舟晚更移

每共劇談前代事夕陽燕子獨相知

次李太無鍊師見寄韻

華髮蒼顏白恰衣遠遊冠上異香飛
花開碧洞春風起丹轉黃房夜氣微
白雪詞章雲作篆元洲步武玉爲磯
欲攜談麈壺中去共講陰符起陸機

次韻謝戴彥李先生

其父師初先生與先大父同登咸淳辛未榜

曲江宴集義熙年諸老風流競酒船
後世尚存金殿策前脩已化玉樓仙
日斜江鷺春尋壘月冷湘靈夜促絃
握手莫傷遲莫恨一經猶得似韋賢

遊吳中靈岩寺

百尺蒼頑一徑通竹輿宛轉翠微中
春尋謝監登山屐

路入吳王避暑宮，響廊深雲氣白。
彈琴石老，蘚花紅。吳兒不計興亡恨，猶說陶朱霸越功。

歲暮寄南金

時在菑涇積善寺

隔岸人煙是菑溪，梵王樓閣樹高低。
美人只在寒雲外，破屋依然谷水西。
歲晏冰霜無勝事，春來花鳥待新題。
不堪音問經年絕，夜久相思夢屢迷。

哭李仲輿隱君

先生有道獨沉淪，窮巷棲遲若廢人。
龍劍有靈能役鬼，毛錐無術可娛親。
變來騷雅文逾古，論入元微學更醇。
重到西齋弔遺跡，朔風吹淚灑叢筠。

題吹笙人詩卷

截玉參差作一攢欲將天籟起雲端竹餘嶰谷年華老
鳳去縵山月色寒江上酒闌人窈窕夜深簧暖燭沈澗
小樓吹徹東風冷歷歷江南入夢看

海濱何隱齋靜得軒

聞說高居近十洲一塵不到海天浮簷前白日皆清景
座上青山總勝遊花氣入簾春寂寂櫂歌到枕夢悠悠
幾時約得蓬萊侶跨鶴秋空訪隱侯

辛卯歲臘月大雪次曹安雅翁韻

馮夷捲水夜深飛竟日同雲掩晝暉漢節凋零淹屬國
琵琶哀怨泣明妃豈無鷺臯攻城略自有龍蛇起陸機
千古桐江壇高節羊裘未肯換朝衣

海濱何氏攬秀樓

百尺高居隔市寰，青冥物色手堪攀。
目窮瀛海三神表，身在匡廬五老間。
江燕舞殘春雨歇，玉笙吹徹暮雲還。
登臨更起瑤臺興，便欲凌風響珮環。

新春荅陸伯蒙見寄之韻

行藏每辱故人憐，世道無情久荷旣。
天上寅賓平秩日，山中甲子義熙年。
談元廣坐風生席，衆興孤舟雪滿川。
不怕春來增紙價，快題新句任人傳。

荅明心印上人約遊澱山寺

人間樂事無前定，方外論交有宿緣。
謝監好山長貯屐，遠公結社合栽蓮。
三千世界非塵境，九十春光半雨天。

準擬前村寒食後移尊共買澱湖船

石湖圓覺中半雲法師和前韻見寄再韻荅之

石湖蘭若好林泉開士深居息萬緣閱世無塵心似水
談經見性舌生蓮花邊問訊春三月江上懷人雨一天
若得黃公容夜宿便尋祇樹泊吟船

橫泖客舍二月陰雨兼旬無朋游詩酒之樂
花木禽鳥之觀不能不動貞溪之想賦以
紀懷

東風吹袂起征塵驚見門前柳色新客路驅馳連月雨
故園隔絕幾分春杏花村落懷人遠芳草池塘入夢頻

蓬髮蕭蕭漸旅食人生只合早謀身

次韻荅曹耕範春日感懷

年少光陰去等閒繁華過眼竟忘還王孫芳草天涯路
仙子桃花海上山絕代風流多失意百年身世幾開顏
重逢快覩新詩筆興繞平蕪夕照間

早春潘濟民遠過客舍以詩見示和韻爲荅
深谷荒涼動遠思隔年冰雪放船遲文風歷代有消長
世道百年多亂離每憶漢槎天上下可勝羌管月中吹
時危處處無行樂客裏逢春總不知

紅梅

夢入羅浮醉未醒梨雲路接錦宮城明妃誤受關氏聘

猜女終騎玉鳳行
蹋月前村疑問酒
餐霞閣苑勝調羹
黃昏小立看清淺
歷歷珊瑚水底明

贈王同儉

萬里江山入戰圖
歡聲一鼓集東吳
三秋奉使終歸漢
五月將軍欲渡瀘
訓練只須揮白羽
功名何止執金吾
行當早入麒麟畫
却弄扁舟泛五湖

次張漫亭雲溪菴晚望韻

雲溪菴外野人家
秋晚行吟石逕斜
口馬長年肥苜蓿
塞鴻一夜集蘆葭
舟中歲暮懷張翰
琴外風清感瓠巴
天際楚江楓葉赤
眼明只想是春華

挽錢素菴鍊師

儀鳳橋邊喬木盡雙鴛湖外草廬荒土埋石磴栽松鑿
塵鎖雲牕辟穀方晉代清風當入傳郢中白雪定遺芳
翩然跨鶴雲間去顏色猶疑在屋梁

和倪德中見寄韻

白首窮經未識兵年來世故總忘情棲遲豈謂逢衰世
治忽何嘗屬腐生夜月賦詩嚴武幕春風醉酒亞夫營
自慚疎濶元無補那得微言協太平

清明日陪王同僉遊馬跡山

馬跡山中雨乍晴鴈門灣裏水初生山川易主何多難
花鳥於人尚有情四海風塵均造化幾家歌舞過清明
春風吹上籃輿去戲逐元戎小隊行

次韻焦漢章胡景仁見貽之什

屢經患難思逃世未有文章辱薦賢
荒草夕陽多戰鼓落花春水失漁船
黍離滿地空懷古萍泛無家亦任天
猶幸晉人風度在相逢不肯廢詩篇

過千山荅孫果育先生見示之韻

傾尊屢聽燈前雨揮塵長懷坐上風
飯顆獨憐工部瘦漂陽應念孟郊窮
黃塵世事悲歌裏白髮光陰醉夢中
猶幸千山青在眼扁舟來往趁飛鴻

寄馬敬常冠軍

憶昨吳門八月樓將軍對客最風流
青黃竹簡分詩韻紅白花枝計酒籌
柳暗新營嚴武備菊殘荒徑賦歸休

春來又動江湖興，準擬追尋話舊遊。

辛丑七月一日寓橫溪觀，迎引大士經會，酷暑鬱蒸，廣庭露坐，忽晚雲送雨，神氣始蘇。
唐元度有詩見似，因口占以復。

赤日黃埃蒸酷暑，澹雲疎雨薦清秋。
三江海近新潮上，七月天空大火流。
晉代有人皆曠達，周南底事獨淹留。
此行已訂尊鱸約，何待須乘雪夜舟。

次荅海慧久上人見寄韻

海慧寺前官柳樹，當年曾挽繫船枝。
一從勝地經烽火，無復叢林見禮儀。
雲冷沙汀鷗夢遠，月明華表鶴聲悲。
孤舟尚有殘僧在，頭白滄浪把釣絲。

漫成用楊廉夫韻

歲月驅馳坐白頭已將心事付東流百年南國無遺老
千古東陵只故侯邱壑忘形羞覽鏡風塵滿眼倦登樓
故人往往情懷在不廢山陰雪夜舟

寄鄉人魯道原贊府

七里灘頭野燐紅鄉關隔絕夢魂同由來王伯興衰際
總在春秋筆削中蘭佩無時懷遠渚荷衣終古耐秋風
相期共載華亭月歸訪雙臺把釣翁

懷澄江鄧毅夫帥叅

鄧子清才意氣多承平風物飽經過談兵夜入青油幕
載酒春鳴白玉珂客路情懷仍曠達鄉關歸計尚蹉跎

春來應夢池生草，遲我西牕剪燭歌。

寄馬文璧徵士

書得名

有客寄家胥浦上，放懷詩酒四時春。
輞川蕭散王摩詰，谷口優游鄭子真。
夢裏江花生綠筆，醉來山雨墊烏巾。
因君寫出蓬萊路，喚起江湖老病身。

簡崑山慧明極上人

善詩文諫古

不見高人兩載過，望中樓觀碧嵯峨。
中原小篆黃龍刻，西域靈書白馬馱。
我輩襟懷於世薄，禪家風度託詩多。
三江流水春還綠，擬放輕舟入薜蘿。

答馬敬常冠軍見寄韻

南越將軍思不羣，東吳詩壘薄層雲。
魯連旣出攘秦策，

司馬寧無難蜀文天地洪荒千古在山河形勝幾回分
英雄自昔生衰世韜略于今已屬君

荅張孟膚見寄韻

雲邊城郭是蘇州一擢輸君汗漫遊麋鹿臺荒山不改
鳴夷江在水空流青藜仙杖應相訪紫錦奚囊莫漫投
遲莫行藏君識我端居豈是傲王侯

孫長慶小山招隱

陸機山下小衡門晉代風流此獨存世亂有誰招隱士
草生何處覓王孫上京冠蓋遙相望陋巷簞瓢頗自尊
獨許野人分坐席時時拒掌到羲軒

曹幼文遺安室

家有襄陽耆舊傳經時幽事頗相關求田問舍中年後
望水尋山夕照間白日戰塵飛不到滄江鷗鳥去仍還
鹿門此去幾千里遺跡依稀尚可攀

錢思復寓泖濱見荷花憶西湖遊賞有詩述
感書以求和步韻復命

每愛西湖六月涼水花風動畫船香碧簫行酒從容醉
紅錦游帷次第張月殿承恩露沆瀣星槎流影下陂塘
江南秋冷紅衣落離立西風舊恨長

再和

吳山風物久荒涼十里紅蕖失舊香貝闕珠宮渾寂寞
弓腰冷袖亦更張馮夷鼓罷風生渚太乙舟迷月暗塘

異縣相思正愁絕一聲羌笛楚天長

七夕次思復韻

乞巧詩人白苧袍剖瓜宮女寶鸞刀
銀河浩渺終難測粉席橫陳亦漫勞
節物因人傳習俗經星何事有遊教
貧家用拙還依舊犢鼻仍將古錦韜

再和

梧風淅淅振絺袍又見深閨試剪刀
時俗濫希天上巧仙家應厭世間勞
那能高會如秦女安得良優學楚敖
此夕相看對吟壘敢揮白羽運奇韜

癸卯元日與南金感舊而作

二十年前新歲日與君剪燭聞新詩
春迎北斗魁三象

詞唱東風第一枝共喜舌存心似鐵不嫌身老鬢成絲
椒花重爲斯文頌拍塞陽和入酒卮

張孟膚過余故里有詩寫曹雲翁西園景物
不覺起余舊感向來文物荒蕪殆盡前輩
典刑邈不可見行樂之地間存遺跡長厚
之習則掃地矣不能已於言也

故里依稀綠野堂軒窗面面俯滄浪長林接地陰如染
遠岫當門翠欲翔石井銅鋪琪樹老雲階月砌蘚花粧
煩君袖裏如椽筆寫入堅珉與記將

青龍任氏母貞節堂

龍江喬木映江波清白名門世不磨孝子善藏諷草什

族入爭誦柏舟歌天寒翠袖愁何在春暖斑衣樂更多
已喜年來慈竹長孫枝漸滿鳳皇坡

楊廉夫受吳門賓館諸公餽餉爲詩自述且
求友朋屬和次韻荅之

甘露英華生間世文星光彩動南天公孫館下無虛士
揚子亭中半列僊二月煙雲詩入畫百花洲渚酒如泉
諸賢能致先生饌應取侯鯖手自編

甲辰元日次成元章韻

經年高臥似袁安忽報新春起正冠門寫桃符寧却鬼
盤行麪繭湯探官幾家夢草催詩句何處生花上筆端
白髮不禁春色惱東風莫作故人看

早春過曹雲西翁舊園

曹園花木又經春舊客重來感慨頻
先輩風流如隔世承平典故屬畸人
唾壺塵尾何時設冷袖弓腰幾度新
老眼看花重回首天涯無處不風塵

次錢思復寒食懷錢塘韻

夢裏錢塘鎖暮煙
鶯花不是舊山川
露涼古殿銅盤折
月到荒臺錦樹圓
綿上空存寒食節
長安無復麗人天
相看莫說承平事
頭白傷心海變田

送勤無逸上人亂後歸西湖復業

海內年來尚阻兵
叢林諸老亦凋零
虎溪橋斷山靈去
鷲嶺雲荒野燐青
石蘚不侵詩壁字
天花應待講臺經

勤公歸去開樓閣歷歷諸天擁翠屏

丁未元日和夏願貞韻

守歲爐邊燭影搖門前賀客笑相邀謾將詩句題桃板
便覺風光襲柳條時事總開良史筆曉班誰續侍中貂
老夫無復承平夢驚見春回北斗杓

曲江居士以險韻與倪雲林論方外事和者
閣筆余適自外歸持來求正戲爲下一轉
語

續得曹溪第幾燈曲牀趺坐敢橫肱庭前擊竹知童子
海上留衣記老僧花落空中多似雨瀑懸岩上直如繩
若能問答無生話別有元機最上乘

次元博弟初度自壽韻

君似陶潛早覺非我如李廣老尤奇
稔聞桑海風波惡始信桃源歲月遲
夢寐不忘重慶日笑談寧似太平時
相看共識浮生理造化真如一小兒

和楊鐵崖曹園感懷韻

曹氏家園百歲餘承平遺跡久湮蕪
路埋銅爵西陵瓦壁暗襄陽海岳圖
春雨荒池花濺淚夕陽喬木鳥呼雛
凌虛臺上論興廢千古雄文屬老蘇

宗上人芝山小隱

翠微深處遠公家不與塵寰共歲華
寶樹七重環淨宇靈芝五色散天葩
簷鈴響谷頻伽烏塵尾香飄薝蔔花

獨許杖藜携酒客時來分席岸烏紗

俞子昭見寄舊懷新感藹然言意之表次韻

奉酬

愁坐牽衣拂劍霜悲歌撫掌按伊涼塵中白日驅人老
雲外青山引興長詩句近傳何遜好酒徒還放酈生狂
羨君高隱東林下罨畫圍屏面面張

用曹新民韻感曹雲西翁園中老梅

夜來夢入羅浮路解珮依俛見洛妃荒草等閒埋玉樹
冷雲猶解護苔衣空懷吹笛花前醉無復觀燈月下歸
老子風流總陳迹只留遺恨滿斜暉

歲晚訪陳景曾于金澤几間有新詩信筆和

韻以述會合

茫茫岐路失東西
冉冉緇塵翳客衣
春雨滄江鷗識侶
秋風華表鶴思歸
殘生同藥迷仙島
某水投竿感舊磯
歲晚逢君如夢寐
相看共喜姓名微

次韻吳野舟見寄

元鶴歸來世事訛
白鷗盟冷困滄波
山河錦繡今誰識
關塞荆榛莫浪過
四序光陰歡樂少
百年身世別離多
老來不奈親情絕
時復漫漫起夜歌

新春和徐澹然處士韻

青年有脚春如夢
綠髮無情雪作堆
世故紛紜催我老
愁懷拍塞向誰開
草荒金谷花無主
日落烏衣燕不來

待得東風到邱壑尚堪扶醉一登臺

俞遂良有遊九山之約借韻促之

千里漸成荒草地九山仍在亂雲堆孤村新歲春猶淺
窮巷兼旬雨不開老我尚堪携酒共知君欲約故人來
時危會面應難得放浪須登百尺臺

奉酬夏時可文學早春之韻

春從雪後試初晴客在雲間憶故城賣藥仙人聲價重
種桃隱者去留輕蟻杯錢蠟驚新味鳳歷催年感舊情
猶幸與君同晦跡殘山剩水尚堪行

澹然時可遂良三君子皆有春遊之興偕韻

訂之

閒關水鳥報新晴拭目春生海上城好景盡從愁裏過
賞心猶向老來輕百年往事如兒戲千古東風不世情
長憶杜陵經喪亂曲江春色尚潛行

贈嘉定普福宮秦東海高士

東華外史繼元風普福仙源屬正宗筆底丹書呼白鶴
匣中星劍闕蒼龍瑤壇功行三千數閬苑煙霞幾萬重
有約同遊尋大藥明年先上大茅峰

送陸伯翔翁往金陵授業侯門

鳳凰臺上春風起鸚鵡洲邊暮景斜四海車書今復混
六朝文物尚堪嗟深衣雪髻絃歌老列鼎宮壺袞繡家
回首故園如隔世身閒不必問生涯

贈理郎中上人禪學之外尤明丹法

中年好道嗟何及方外論交夙有緣
白日堂堂唯應世青山往往負談元
已期入社從彭澤豈謂逢僧似紫賢

南派薛道光
禪師號也

借我林間松麈尾相看儘可答詩禪

九日橫溪客舍

晚節追思往事艱老來未得此心閒
欲題紅葉無佳句相對黃花只強顏
出處幸同衰艸木登臨不媿舊江山
酒杯還似當年綠忘却風前兩鬢斑

賦同門友葉子澄春星堂

君家住近白榆鄉依約風林左
氏莊處士隱居春入畫
賢人聚處夜生光
乘槎泛渚仙風迴
燒燭張筵飲興長

底事同門少年子老來濶絕類參商

又賦子澄雪蓬軒

歲晚瑤花滿太虛翩然蓑笠混樵漁浮家直到空明際
問路重尋混沌初巖瀨客星應黯澹山陰人跡久蕭疎
老夫亦有孤舟在擬約凌寒共釣魚

甲寅至日在橫泖客舍憶存沒二子

長在穎
上幼沒

梁濠

父子睽離骨肉寒每逢時序輒辛酸濠梁逝水聲嗚咽
箕穎荒原路杳漫家廟蒸嘗難備禮客鄉寢食敢求安
海隅兩度逢南至坐對梅花強自寬

和錢思復過真淨旭公房所作

短褐長鏡隱士風蒼顏白髮瑩雙瞳池邊駐馬邀山簡
月下登樓約庾公縱酒放歌聊玩世尋僧問語且談空
十年同在風塵際幾見春雷鼓壤蟲

秋日過余山

幾年不到九山中今日扁舟興尚濃亂後人煙俱落落
歲寒林木尚重重追尋故舊皆新鬼曾見興衰是老農
我欲卜居愁險絕老來登陟窘龍鍾

荅胡克溫惠藤枕

廣州高枕織花藤黑白縱橫疊浪層繡褥錦屏寧肯汙
蒲團紙帳實相應書藏墨子誰曾識夢見周公我未能
便欲東山學高卧不堪華髮久鬢髭

又鐵冠

高人鑄鐵作儒冠雅製由來出杏壇剛氣未輸逢子掛
鏗鳴政合貢公彈山林服飾猶多誤霜雪頭顱却耐寒
野老初非真御史有時怒髮也相干

感橘

伊昔洞庭風景好滿林秋色類春光后皇嘉樹深培植
巴蜀仙翁久遁藏晉帖特書霜未降吳姬解道手猶香
踰淮不奈多爲枳應望江南憶故鄉

黃岡賈彥德碧梧軒

百尺青桐覆短牆重重車蓋翠陰涼北平甲第停鸞鵠
東日高崗起鳳凰風度綺牕春弄影露浮金井夜生香

練衣塵尾蒼苔磴遲子清談送夕陽

賦鄞士梅隱

萬玉林中一草廬市聲不到此幽居孤山處士曾通譜
秦隴行人獨寄書瓦甕酒香春動後石橋屐冷雪晴初
高情迴出紅塵表不比桃源禮澹疎

蟻術詩選卷之六

蟻術詩選卷之七

元雲間邵復孺著

明新都汪稷校

七言絕句

見梅懷錢南金

東風吹鬢酒消消
拄杖看花又一年
怪底江淹容易老
幾回南浦送春船

早春鴛湖夜泊

燒燈過了閒門
靜踏月歸來宿酒香
何處高樓夜吹笛
曲中桃葉斷人腸

晚晴二首

一
槿籬疎處夕陽明
簾捲薰風溽氣清
竹簟半閒書帙亂
倒歌烏葛看新晴

濯濯南風入
芡衣門前江色映
書闌浮雲卷盡天連水
兩個鷓鴣上下飛

小鬟以墨海棠爲名友人張子正爲之畫以
求題

嬌枝小小出簾櫳
賜浴華清淨洗紅
一自金鑾供奉後
夢魂長在研池中

七夕日孫果育丈席上有詩首句約坐客各
續卒章爲賦如左

白髮年年逢七夕
青天夜夜見雙星
客樓亦有當時月

却照誰家戲絲庭

題演上人畫蘭

空山楚雨夜淙淙一硯春雲起碧牕却憶扁舟載離思
暖風容與渡湘江

題危鍊師春溪小泛畫

春樹扶疎水接天紅塵不識此山川風流二老衣冠古
多是山陰道士船

題黃一峯畫扇

南州邱壑無今古東晉衣冠久陸沉便欲相從二三子
滿船載酒劇論心

陪曹雲西翁携妓泛荷舟中次韻

藥宮仙子倩霞粧太乙真人白苧裳獨欠湘靈來鼓瑟
冰絃歷歷按清商
紅藕溪頭白玉磯畫船載客憺忘歸僊姝散得天花亂
不敢飛來著羽衣

明日曹安雅翁約席上諸公再放蓮塘席間
次韻

老魚吹浪起層瀾六月陂塘特地寒花底畫船人似玉
忘機鷗鷺亦貪看
花間玉露夜生香淨洗冰肌不受粧三十六陂還有約
定携羽扇看新涼

次韻荅衛立禮元旦之作

鬢底新霜白未真情懷已似老來人春風獨自無崖岸
委曲相尋白氎巾

桃源畫卷

人間不識武陵春獨有漁郎認得真只作曲江風景看
殘山剩水尚精神

松竹卷子

華頂蒼寒松五粒渭川風度竹千竿長安陌上看花客
不信山中有歲寒

雪山便面

山中茆屋四時好雪裏開門心眼明小童沽得前村酒
須著溪翁相對傾

春日和錢南金韻

溪上東風散草芽去年曾此共看花
至今留得行春屐猶帶西園徑裏沙

次荅汪子翼進士嘗爲采石山長三衢學正
采石官醪琥珀黃柯山元壁照人光
芸香閣上無塵事鄭老詩成醉欲狂

同曹雲西翁泛舟過干山

松篁兩行遶溪灣一舸逍遙任往還
藜杖幅巾林下去野人疑是古商山

弭棹溪邊問老漁雨中歸路晚模糊
九峯三泖人家外髣髴烟江疊嶂圖

賦孫果育丈千山小隱

清宵分榻聽疎鐘
白日看山倚瘦筇
想見幅巾蕭散處
層層樓閣萬株松

壇上藥鑪時進水
佛前燈火夜然酥
儋州老子前身在
不比尋常醉道圖

即景

一秋兵革競紛紛
山下人家晝掩門
昨夜南鄰雞犬鬧
又傳吏過石壕邨

次張漫亭遣興四首

滿壁鑽書嫌脉望
巡簷設網厭蠨蛸
悟來物理如人事
準擬緣槽結小巢

僧舍看雲歌歎乃漁鄉對月舞婆娑山中住久忘塵世
不道桑田變海多

南渡承平無復見中原喪亂又重看白頭父老談興廢
曾識漢宮承露盤

身到天河惟博望功成漢室有淮陰一時凜凜英雄氣
千載寥寥去住心

從軍過太湖上梅花正開與顧允中趙君式
登山縱步和韻三首

銅坑山下野人家信步看梅石逕斜二月江南春寂寞
東風不管路傍花

曾到咸平處士家幾番花壓帽簷斜如今老眼風塵際

不敢分明看此花

春光欲動客辭家
戰艦縱橫破浪斜
范蠡湖邊重回首
五陵不是舊時花

挑菜美人圖

記得行春出灞橋
踏青挑菜總嬌嬈
如今老眼看圖畫
翠袖鴛鴦鞦韆久寂寥

和錢思復春日口號

二月江南白霧昏
人家日日候晴暉
疎林敗屋春無主
燕子歸來若箇村

己亥二月晦日寒食無錫東屯舟中漫成

薺麥青青殘柳黃
兵餘無處不村荒
惠山南畔逢寒食

回首松楸路杳茫

客樓春日

東風吹夢到溪頭
溪樹依依綠水流
斜日小橋扶醉客
遠煙芳草釣魚舟

西湖小景扇

畫橋歷歷樹斑斑
蘇小紅樓紫翠間
烟月不知人事改
夜深猶自照湖山

香雲室

牕前嵐氣博山爐
壁上晴光海嶽圖
一夜梅花橫紙帳
暖風吹夢遶蓬壺

題曹元博壁間馬文壁小畫

巖谷幽閒雨露深翠烟長護讀書林春風長養承平樹
期爾芟裘歲晏心

題項鍊師山房倪元鎮小畫

空同山下無名樹秀葉飄颻翳翠霞移向元都壇上種
春花開遍玉皇家

題夏順貞所藏王省叟真人馬遠溪月堂卷
憶過餘不浮玉塵山開元堂下水潺潺只今惟見溪頭
月白鶴沖天不可攀

題扇寄鄒君顯

浣花溪上堂依竹采石沙頭月滿船鱸蟹熟時秋正好
放歌載酒白雲邊

君顯答賦再韻以寄

情到漫題秋後扇興來欲放雪中船
三江近信丹楓外一夜相思白鴈邊

一峯道人畫九山雪霽

大雪漫空暗九山晉人遺跡杳難攀
老仙只在扶桑外借得瑤京鶴駕還

題墨竹

江村蠶老柳花香楚楚新梢出短牆
却憶黃陵廟前過澹雲疎雨映瀟湘

李雲山畫秋林晚步

疊疊青山黃葉村夕陽喬木幾家存
幽人占得前溪住

不是桃源定鹿門

梨花十二紅

雨過東闌澹蕩晴飛來和恨寂無聲宣和殿下清明後
曾向花間見太平

夏士安家董元小寒林

徂徠山頂千年樹曾及承平雨露恩幾度長空飛霹靂
鬼神猶解護靈根

辛亥中秋橫溪菴客牕對月口號

時長子在
穎如子在

濠皆無
見期

客牕孤坐過中秋病骨支離雪滿頭潁水濠梁千里外
一方明月照三州

桃花五色子

灼灼繁紅錦不如東風依約舊元都
劉郎老大無心賞付與春巢五色雛

橫溪晚步

野老無家寄海村草荒秋老失柴門
鱸肥蟹壯無勝侶憶殺家園老瓦盆

經旬不過石橋陰幾夜雨多秋水深
美人迢迢望不及朗歌采芹傷我心

懷野舟客

鴻鴈風高秋浦涼芙蓉花開紅錦張
去年短蓼攜手處萬頃黃雲秔稻香

停簫士女圖

花前月底不勝情，欲度伊州又不成。
若見盧郎年少日，等閒吹作鳳皇鳴。

息齋李使君自號廣陵醉客，其守吳興日，郊行見民家小湖，石名蓬花峯，玲瓏奇秀，求之弗獲，乃畫爲圖，且書其意，以識不忘。客有持以求題者。

苕霅溪頭石一卷，廣陵移入畫圖傳。
崑岡烈焰誰能奪，牛李相看亦惘然。

杏花宮女

花攢金屋雨嬌嬈，依約東吳大小喬。
莫問中原舊春色，

西陵烟樹正蕭蕭

柳陰宮女

御柳娉婷拂畫闌當時浪說楚腰鸞
君王莫遣兒家學
千古天生只小蠻

牡丹士女

國色明粧映綺疏
畫閒隨意踏庭蕪
洛陽春事今黃土
忍看承平士女圖

簷蔔士女

綠牕睡起晝遲遲
簷蔔香風透玉肌
却憶芳園春夜飲
花前微醉絕纓時

秋懷故溪

三柳西來花滿園
衣冠人物小桃源
風流王謝今陳迹
燕子飛來只斷魂

江上秋風吹客衣
芙蓉花老客思歸
荒煙亂艸斜陽外
夢遶前村舊釣磯

元日試筆

賀年鄰巷雨初乾
把筆書牕墨尚寒
忽見東風到門外
似將春意入毫端

茅簷春色年年在
蓬鬢霜華日日新
世亂敢論生計事
身閒猶是太平民

上巳日泊舟昆山縣城北十里顧墓田家風
暄日麗野花亂開
邂逅父老爲設尊俎相

率縱步春興橫生乃爲短述以紀所見

崑山城北路漫漫芳草連天雨乍乾
柳綠花紅寒食近春光不在故園看

廢宅荒池鎖碧苔桃花無主爲誰開
舊時燕子知人事飛過雕簷竟不來

蠶豆花明遶路香雞桑葉暗翠陰涼
相逢野老留雞黍尚覺芳郊引興長

吳女傷春晝掩扉猶將膏沐媚春暉
逢人自把金錢卜不信征人竟不歸

曹園看梅

西園玉樹老風烟離立盈盈不記年
昨夜東君又披拂

疎枝冷蘂亦嬋娟

揚州紅萼舊風流東閣何郎昔俊遊
羌管數聲春拍塞移宮換羽不勝愁

石橋流水夜涓涓時度寒香逐澗泉
月落參橫疎影亂羅浮春夢遶牕前

貞溪初夏次南金韻

雨後林深竹筍肥渡頭風急柳花飛
柴門不掩綠陰靜人在閒牕試苧衣

巡簷燕子掠晴絲隔塢茶烟出院遲
草色入簾人不到午風吹暖夢回時

棟花風起漾微波野渡舟橫客自過
沙上兒童臨水立

戲將萍葉飼黃鵝

小卷縑車霜繭熟前村社鼓野人來
鶉鳩聲在樹陰裏
竹下柴扉晝不開

蟻術詩選卷之七

蟻術詩選卷之八

元雲間邵復孺著

明新都汪 稷校

會合聯句

至正改元余寓虎林三閱月南金授業茶院
孟冬余歸而南金亦還溪上夜坐縱談念
不可無述以紀此會四十韻

久別情懷在

復

重逢意氣添窮途仍遠役

南

吾道豈終

潛遲暮身何補

復

艱危首尚黔客情鄉態別

南

人事物

華兼豹隱曾誰見

復

雞羣適自淹故交深閥閱

南

高誼

薄閭閻歲晚詩無恙

復

更遙夢屢瞻盍簪長此地

南剪

新獨好謙富應同土苴

南

貧不厭藜鹽暴白心如鐵

復

雌黃口莫拊妙年咸仕版

南

長晝只書幃坐欲彈冠起

復耕期束帛覘壯懷從曠達

南

短髮任髻鬢未屬麒麟

畫

復

恒韜虎豹鈐淹留頻撫髀

南

慷慨亦掀髯但得襟

期在

復

何憂歲月殲匆匆投井轄

南

忽忽報郵籤江海

無忘險

復

冰霜已戒嚴詩篇相砥礪

南

友愛辱鍼砭

復

編校遂生亭聯句

有序

惟昔有元後至元二年歲丙子十有一月

冰霜汪寒信宿不解晚雲漏日朔吹凜凜

殆不能任雲間貞溪曹貞素翁設酒有會

親友於其家之遂生亭燎以楮拙沃以醖

醅脯羞循序以進少焉衆始晬面盞背歡
情甫洽翁乃呼童出楮札率客聯詩爲樂
而命余呵陳執筆以書於是意況咸適情
文藹如迨夜分酒闌凡得句百有廿而章
乃成此吾鄉疇昔清事之一也翁於予爲
外族從祖有老僧曰自聞熏師翁之從弟
也安雅翁洎弟世長皆曹氏於予爲外族
諸父錢南金陸伯翔伯宏皆外姻也主賓
凡八人後此卅餘年諸老相繼淪沒存者
惟伯翔及予亦皆年踰耳順垂白昏耄中
經干戈屢變世道衰微二翁故居悉蕩爲

卽隴求其遺跡亦復蒼莽雖流涕痛哭莫
及矣洪武己酉冬偶與元博弟話舊及此
而博乃能襲藏舊藁展卷瞭然如昨日事
不啻對諸老於几席間也然曩者所作一
時得句輒寫意度先後罔計倫叙此於詩
法爲不合博乃留藁求余銓整庚戌歲冬
杪齋居聽雨乃爲校正而編次之中復有
所取舍於是文從字順而意趣斯足遂手
書二通其一併元藁歸之元博其一留吾
齋以供暮年觀感爲承平嘉話且俾予兩
家子弟知鄉之先輩風流文采若此吁物

換人非斯文掃地後之人非特不能繼前
脩風度亦將不能知而言之矣可勝歎哉
庚戌距丙子爲卅五寒暑云是年臘未盡
五日小溪吟屋書

深冬鼓大籟口寒抑新陽

貞素

凍痕固封坼暝色浮穹

蒼

南金

斜暉射屋壁巖飈襲衣裳

世長

氣候沍眇夕景

物惟冰霜

伯翔

幽居絕蕭散喬木相低昂

白聞

長林展

圖畫疎松奏笙簧

伯宏

經時歲云暮撫事心亦傷

復瑞

朋來溫重席衆喜累十觴

安雅

窓梅弄疎影盤蠟搖寒

光

翔

竹鑪撥拙火栢子氤氲香

聞

豆邊旣無算肴核復

屢將

宏

野哉雜鶉雉溪腴間鱖鱸

長

翠罌玉蛆凍犀筋

紅肉僵

雅

偉哉青雲彦會此白石房

南

盍簪意已洽得

酒氣益強

宏

世道久澆薄古意殊荒涼

復

真情悅親戚

嘉會非尋常

素

高才貴瑚璉妙語鏘琳琅

南

太原與五

姓燕山尊十郎

翔

阿翁正矍鑠我輩俱頡頏

長

宗族互

有託禮貌詎可量

雅

舟車遠無間雞犬遙相望

聞

九世

同安居百年有餘慶

復

兒孫等鱗次兄弟列鴈行

素賴

有北道阮况得共被姜

雅

鳩杖祝勿咽兕觥介無疆

翔

晨昏足甘旨歲時謹烝嘗

雅

臭味亡薰蕕優劣何執糠

聞

躬勤樂耕釣志儉忘膏粱

宏

招隱及巖谷濯纓下滄

浪

南

清風起竹逕朝陽耀梧岡

長

歌長擊瓦缶興酣據

胡牀

素

秋花照籬落春草生池塘

復

望重詩禮庭義薄

名利場

南

學術本鄒魯治化沾虞唐

素

百兩重聘國千

金戒垂堂

翔

雄觀局四海壯志馳八荒

宏

恒鄙貨殖貢

豈羨干祿張雅

詞源

尚屈宋書法追鍾王

長

奇材任犖

犖雅量須汪汪

聞

心胸蘊星斗頭角嶄珪璋

宏

黃麻珍

世賞青氈寶家藏

翔

松柏抱貞秀蘭蕙含芬芳

長

擬儕

谷口鄭弗媿商山黃

復

曳裾或混俗衣錦寧忘鄉

南

王

掾元不癡酈生乃佯狂

復

婉孌談論濶輾轉理義長

素

會合益膠漆契濶母參商

素

笑語寒稍弛歡樂夜未央

南

真性本寥廓幻身且徜徉

聞

聯詩出雅頌看劒生光

芒

長

焚膏照無寐瀹茗搜枯腸

聞

人情咲失馬世利嗟

亡羊

翔

惟茲一餉樂勝彼終日忙

雅

所欲論文字初不

事酒漿素

耆英固難繼真率或可方

復

坐醉春滿席起

舞月在梁

南

宿氛息廣漠晴燉扶桑

宏

分袂重慷慨

驅車走康莊

雅

猗歟紀宴集斐然成文章

復

舟中聯句

洪武庚戌臘月八日余與巖陵邵復孺先

輩自雲間之澄江蚤發向吳門挂席波上

甚適也因相率聯詩以攄客懷日夕過蘇

臺窮其韻而成章凡得句百有廿興之所

至罔計工拙江空歲晚孰知吾二人清苦

若是哉諒天地必有同其情者隴右邾經

仲誼識

歲晏冰雪稀 天空水雲濶 扁舟戒行李 邵遠道舍祖輶

度柳凌鷗波 邦橫江蕩魚沫晴 暎弄熹微 召明霞入瀑

瀉村迷辨烟樹 朱林響聽風柝連隄 半隳隤 召亂石互

排拶感茲物色 睽 朱疑若鬼神奪蕭疎見古寺 召狼籍

遺壞闌替戾塔語鈴 朱跣跌堂散盃誰將拂盤陀 召我

欲叩菩薩了知空 卽幻 朱奚謂悟始達觸景人事非 召

經途客心怛憶昔兵構患 朱念此民苟活流離且無家

召癥瘕仍有筇虎寧泰山畏 朱雞豈武城割待旦苦漫

漫 召書空愁咄咄旋瞻太平治 朱遂及阨運豁造化終

含情 召生聚母蹙額夏鼎燭神姦 朱秦鏡走妖魃吾徒

恒汨沒 召斯世暫超脫侯門斂長裾 朱毗里混短褐棲

遲甘海取

召

飛騰阻天末企望麻姑鵬

朱

悵閔李斯獨

禍福信倚伏

召

貧賤逃天閼虛名自成累

朱

逸氣孰可

追頻年頗好道

召

長日頓忘渴琴心舞胎仙

朱

華陳馳

叱撥幽蘭紉佩纓

召

芳草結屨韜瓦彝香屑沉

朱

斃斗

松蟠栝衡茅讓山藻

召

團蒲勝罽毼芸編飽鼓蟲

朱

搓

梁漏羣獺野鳥資笑歌

召

林蜩供巧掇晞髮傲三沐

朱

充腹儲七糲荷風揮白團

召

桂月整緇撮掃華坐裴回

朱

問竹行跋覽衣防棘籬鉤

召

履慮蘇磴達樵漁從往

還

朱

鄰里謝喧聒童沽醅持券

召

客醉狂褫襪卒歲每

怡愉

朱

安時靡牟刺徒步猶履難

召

清談已囊括獐額

固可探

朱

猛鬚慎毋將逍遙憚拘檢

召

老醜倦塗沫涸

鮒肯貪餌

朱

罷驥耻受秣

澹然忘戚忻

召

展也釋嗔唱

谿翁故相能

朱

隴士今有恬及蔑

繼邦盟

召

翦棠思

菱北征唐爾愧

朱

南音楚誰撻湯歌車遙遙

召

何歎流

活活周道尚逶迤

朱

吳臺空截障五湖悄陶朱

召

八陣

失諸葛載陽麋縱遊

朱

無詠狼壺趺舊夢已銷沉

召

清

氛尚轆轤顏跼悲蒙莊

朱

羿寡嗟魯适君子懷游後

召

城闕記桃達斯辰當臘蜡

朱

于夕叫寒鵠巖飈轉帆席

召

斜暉在蓬筮既空鳬鴈聚

朱

徒詠鱣鮪鱗心驚元冥

汨

召

目佇青陽潑願同松柏貞

朱

不改薑桂辣搔首一

長喙

召

乾坤莽回斡

朱

蟻術詩選卷之八

玉山璞稿

江蘇古籍出版社



四庫未收書提要

擘經室外集卷三

玉山璞稿二卷提要

元顧瑛瑛字仲瑛崑山人事蹟附元史陶宗儀傳
後玉山璞稿四庫全書已著錄一卷是編乃至正壬
辰乙未間所作凡古今體詩二百七十五首詞一首
書中送董參政饒歌十章如克淮西入昌化定安吉
諸題足補史所未備元史惟稱秋七月饒徽賊犯昱
嶺闕及杭州路案是時董搏霄率兵復之所云參政
及送周天蟾詩中大參董侯皆其人卷末有云水戰
甚難蓋舟楫有遲速風水有逆順故不能齊其隊伍

然則瑛于舟師之法亦略窺其一二非僅以詞語流麗見長也

玉山璞稿 至正甲午

玉山顧瑛

春暮有懷琦龍門兼呈于匡廬袁子英春草池綠
波亭上作

綠波亭上風光好水荇菖蒲叢雜生出林柳花作團去
放子鯉魚成隊行美人不見有新夢春事欲歸生遠情
明當與君洗大白濁酒百壺相對傾

黃孟起參政領水軍副都萬戶開水軍府事二月
二十三日以瑛佐治軍務留海上索詩口占奉呈

燕領將軍虎豹顏去年殺賊下三關
筆端草檄千鈞力馬上開弓一石彎
定賞名標丹鳳宸論功身在紫薇班
今看耀武回滄海日日從軍奏樂還

張仲舉待制以京中海上口號十絕附郊九成見
寄瑛以吳下時事復韵荅之

估販年來不受沽徒勞蹤跡走通衢
祇緣盡要新交鈔除卻天都到處無

帶號新軍識未真欄街作隊動生嗔
官支爛鈔難行使強買鹽糧更打人

白晝驚風海上號水軍三萬盡乘濤書生不解參軍事
也向船頭著戰袍

官鼓鼕鼕報二更船頭風浪盡軍聲不知海若緣何事
一夜顛狂直到明

冉冉長蛇漢水東噓成黑霧滿虛空腥風怪雨重陰底
化作黃蚪不是龍

莫辯黃鍾瓦缶聲且攜斗酒聽春鶯河西金觥新翻譜
漢語夷音唱滿城

紅綠油牌去復來長身碧眼更頤顙口傳催辦軍需事

一日能無一百迴

築得吳城易得摧年年風雨繞蘇臺農家盡患時行病
摠為修城染帶來

紅纓白帽錦鞍韉鐵甲金戈刺繡鞭義士一千屯海上
自家供米又供錢

和糴糧船去若飛兼春帶夏未曾歸用錢贈米該加七
納戶身懸百結衣

官糴糧美山東趙公伯堅也公以江西行省檢校
官來浙右糴米十萬石賑飢至是吳民苦於官糴

公一無所擾而官亦不勞而集瑛雖不才敢傲白
居易體作是謠使吳民歌以餞其行云

官糴糧官糴糧東吳之民自遑遑去年今年來侍郎凜
凜六月生秋霜官錢未給先取將今朝十萬上官倉明
朝十萬就船裝小斛較斛大斛量吏弊百出那可當輸
錢索物要酒漿磨牙吮血如虎狼滿身鞭箠成痍瘡郡
侯視之泗漭漭忍使吾民罹厥殃實欲止之無計張官
糴糧官糴糧東吳之民無積藏山東趙公來南昌南昌
殺賊如犬羊賊雖解圍民亦荒貧者守死富食糠愛民

誰如趙平章手發官帑錢百囊公既得之夜乘航緣江
逋賊肆獷猖操舟帕首來取攘我公挽弓一石強百發
百中賊始亡倍道十日抵蘇杭誓不移文下官坊微服
民間身作商指廩發粟酬其償十萬月就民不傷千艘
萬斛如龍驤黃旗赤幟分兩綱南風開船若雁行船頭
擊鼓聲鏜鏜六月牽江過鄱陽新米未熟舊米香江西
之民無枯腸官糴糧官糴糧粒粒盡是民脂肪天子端
居白玉堂相君我我坐廟廊紫衣朱服列兩廂天門九
重啓煌煌豹蹲虎踞嚴其防覆盆不照日月光誰能奏

額奏帝苟以公糴糧為典常東吳之民始安康官糴糧
官糴糧東搬西載道路長去年押糧上蘄黃今年五月
未還鄉安得風塵靜四方羊腸蜀道成康莊舟車所至
皆來王普天之民樂而昌天子聖壽垂無疆萬年千載
不用官糴糧

三月二十三日侍董大參巡海早發路漕

檄下遲明發樓船似馬來海空初日出風急大旗開武
士森前列儒生忝後陪茲遊絕奇壯直欲到蓬萊

是夜回宿海口舟中董參命賦口號

夜半分弓哨海頭千艘耀武發貔貅旌旗影拂三沙曉
砲石聲懸萬島秋六帥移文驅巨鰐諸軍擊楫誓中流
回頭坐見辰星近十日糧船達帝州

題琴川趙實甫恭甫瑞蓮圖

紫荊樹下盆池好一朵芙蓉並蒂芳露井月涼棲翡翠
天機雲煖織鴛鴦塢篴迭奏高堂樂鶯燕雙開半面妝
喚取桃根與桃葉蹋歌聯臂醉稱觴

題深山蕭寺圖

潭潭古寺山中央迺是梁朝之道場九霄臺殿起突兀

萬間金碧開熒煌塔鈴風前作人語
天花靜裏生空香
青鞵布襪若可到逕上翠微尋竹房

題宋徽廟畫設色仙山樓觀圖

宣和天子昔神遊鳳駕行空過玉樓
此去有人言赤馬
歸來無路逐青牛分明艮嶽通元圃
想像方壺接十洲
莫把仙山作圖畫瓊花琪樹不勝秋

題龍門草堂圖就東王仲立

龍門上人如已公茅屋賦詩清興同
不知白衣者誰子
無乃玉山之老翁長松飛花落輕粉
曲澗截山橫斷虹

聞道城中王給事近日讀書居瀨東

倪元鎮畫梧竹圖附章心遠元士見寄琦龍門為
題長詩于上璫次韻以識

山人自愛山中宅繞屋長溪深百尺桐花委地曉風清
竹筍過牆新雨碧東海倪迂真絕俗牛角漢書鉏且讀
茅齋時有已公吟松窗每待陳蕃宿思之不見勞神交
月明夜夜梁溪潮畫圖忽爾墮几案碧梧翠竹如其標
生產那知金有幾門與九峯相對峙我才獨小不成邦
作詩或借嵇康擬龍門一別垂十年客中又見秋風顛

滿懷契闊欲陶寫好寄錫山龍縫泉

題秋江釣隱圖

我愛長江上蕭蕭八月秋斷山當舵尾落葉下船頭風
起青蘋渚沙分白鷺洲釣竿如可得添我一羊裘

次琦龍門過傀儡湖詩韻

秋波無煙淨且空畫槳搖盪雙漁童晴沙翠竹見湖曲
落日青山如剡中鷗鳥翻迴蓮葉浦菱歌忽起蘆花風
何時磯頭聽春雨茶竈筆牀稱老翁

送金文中常熟州吏滿陞庸司奏差

言偃祠前落木秋
擔簦負笈上行舟
盡言能吏瓜期滿
又喜英才水部收
青草岸頭啼布穀
黃梅雨裏叫鉤輅
農家際此愁如織
奉直承顏說得不

題桶底圖

不數仙家狡獪功
戲將桶底描蟾宮
豈知大地山河影
已在庖犧一畫中

題曲江宮殿圖

千門宮殿鬱嵯峨
侍輦佳人翠畫蛾
江水江花流不盡
斷腸元在馬嵬坡

題仙山便面

仙山矗矗卞韓東
半入青雲半入空
記得玉笙鸞背上
相看都在月明中

寫山居圖後

我愛山居人
青山在窗牖
朝耕隴上田
暮飲牀頭酒
門無索租吏
座有擔簦友
不知茲山中
著得我儂否

琦龍門與王仲立遊玉峯惠聚寺龍門作排律一首以紀寫寄草堂索瑛次韻

瞰厓古殿當澄江
中有古佛疎眉厖
山靈運石馴虎伏

老禪咒水神龍降
泠泠露下杪羅葉
寂寂香團瓔珞幢
竹筍出牆雲結戶
桃花夾岸石為砵
鼉鼉隱見蟠千礎
金碧參差絢入窗
我昔馬垂紅錦障
君今船繫綠楊椿
風清齊鼓三時報
月落晨鐘半夜撞
露布未聞郵驛過
霜鼙猶聽戍樓凝
淳于夢裏空為國
曹鄴詩中不是邦
歸去支硎亭子上
開籠自放鶴雙雙

題徐公憲挾彈小像

絳縠裁春服
行騎白面馱
手中金彈子
切勿打慈雅

寫龍門草堂圖

畱客茅堂下聯詩石鼎邊呼童拾松子同煮白雲泉

家翁命題任月山五馬圖

月山道人畫唐馬筆力豈在吳興下此圖五馬更能妙
乃為玉山居士寫居士平生好奇古投老讀書深閉戶
客來展卷閱權奇颯颯秋風吹馬語我聞大唐天寶中
朝廷不用凌煙功中使傳宣下五宅一朝竝入連昌宮
望仙樓下花開早妃子霞觴對花倒五家沈醉夜歸來
夫人號國爭馳道圍官牽過月明中汗溝流血耳生風
當時圖寫落人世至今粉墨傳遺蹤君不見唐太宗坐

下六馬皆眞龍昭陵舊刻照落日千秋萬歲垂無窮

饒歌十章并小序送董參政

至正十有二年狂賊梗化紅帕首者動數十萬所在
蠭起廣平董公參政江浙行省由淮西率兵復杭城
平諸屬邑戰昱嶺殲羣醜十四年春詔開水軍都府
於婁上公領帥事平海寇也是年夏復詔判樞密院
將大用矣海隅鯁生敢擬鼓吹饒歌十曲謹書隆茂
宗描曹弗興所畫黃帝兵符圖後以寓頌美之萬一

云

克淮西言光蔡賊犯淮西公率兵轉戰所向克捷
繼召班師復杭城并屬邑也第一

克淮西法羸越陣堂堂大烈烈介士奮通賊滅杭城屹
長江撤將用良兵用捷趙用牧東胡子漢用廣口奴囑
有永斯世垂勲業

入昌化言既定杭城復入昌化殄羣寇遂參中書
也第二

入昌化羣蠻降旗整整鼓逢逢凱歌還民樂康走馬報
入中書堂

克復於潛賊衆缺罪我師尚未集公徠許自新賊
猶豫持兩端公乘怠卷甲疾趨梟賊降衆也第三
克復於潛推爾鈴爾發爾機協爾占短兵既接奇兵連
擊其怠兮渠魁殲武功烈烈民物恬緊立爾祠正議僉
樂茲土永永年

定安吉賊據千秋關襲我軍公今憑險投石發矢
賊莫能支追數十里俘馘而還遂定安吉也第四
定安吉揚威靈市肆不易民不驚戢艱難致太平致太
平岼嶷未數燕然銘

攻昱嶺賊敗遁徽饒復集衆攻昱嶺公法八陣圖
為長陣亘百里遂殲羣賊也第五

攻昱嶺麋三關何物小子肆兇奸公赫斯怒八陣頌天
衝地軸居兩間白刃霜積大旗朱殷十有八戰殲羣蠻
龍章來虎旅班憑闕號呼毋以我公還我公其還四海
永無患

水軍開殄海寇也海寇公肆暴焚城邑絕糧道帝
命開水軍府公領帥事三踰月而功成海宇乂寧
也第六

三山志卷之二
帝命開大府軍興若雲雷鵝鵲激中流蛟蜃潛海隈萬
弩洪濤平金戈白日回國儲數萬艘飛越龍之堆洋洋
大東海下視不盈杯成功兩期月內詔從天來行人毋
遮留要見皇業恢君王壽萬歲我公位三台

巡大洋言公開府率水軍耀武海洋濤風迅發千
艘並舉鯨鯢遁逃不十日抵京師也第七

巡大洋略博桑雷矢發火旗張列缺馭翼海若藏萬夫
虎虓千艘驤不十日達帝京聖皇悅惟汝功爾德爾輔
靖四方

驅海獠海寇既平遺黨襲暴民罷市公發令驅諸
海外民情迺悅祠以祀公也第八

驅海獠奠吳民羣獠肆暴更不敢嗔公怒赫心令申獠
惴惴民忻忻請罪乞自新公威以武撫之仁吳民尸祝
報德無有垠

海之平賊匿海島肆劫掠麾水軍擒之沈其舟尸
諸市門海以寧也第九

海之平海以寧挾長口批奔鯨鱗角摧毒霧腥膏寫鹵
波不驚我公開府公告成挽海水洗甲兵

趣入朝貳樞府將大用也第十

趣入朝四牡駢駢赤舄几几帝曰俞安汝止錫汝斧鉞
用輔我皇子公拜稽首受帝之祉我土我民爾安爾牧
粵千萬年載諸史

題鄭白鶴喬林遠山壁倣李協律體

鯨公脚踏紅鯉魚鐵網截海鈎珊瑚腥風海底起煙霧
濃綠斜飛隔寒素影木花開九月秋亂葉撇波如雨流
六鼇扑足三山舞白鶴夜向西池語

金華方道存鍊師以張彥輔所畫雲松圖索題就

和卷中張仲舉詩韻

金華有羽士，噉道茲山中。
據松拂朱絲，哂雲飛玉龍。
手招皇仙人，排空下琳宮。
白羊忽起立，萬壑生靈風。

新秋夜坐有感

蘋末微風起，虛庭夜氣清。
河傾天際落，星近斗邊明。
坐久新涼發，愁深百感生。
豆花紅絡緯，相對放秋聲。

錢思復汎舟過玉山作詩見示次韻以復兼呈于匡山

聞道書船盪槳行，過湖詩思十分清。
幽人素有煙霞癖，

之子寧無邱壑情七月君王猶北幸長淮丞相又南征
書生此日頭應白無奈秋風策策鳴

次琦龍門夜宿陳性之學舍詩韻東寄陳性之訓
導時學中殿梁生紫芝故及

廣文學舍清如水故友相過氣味真翠幕燈花寒作蕊
畫梁芝草淨無塵清晨館下招諸子長夜山中夢老親
我亦儒冠竟何補願於東海作迂民

寄題王孟德春雪軒

聞君帶雨種琅玕只好稀稀數十竿西寺故人同散逸

北堂阿母喜平安春風細細開簾入暗雪紛紛落座寒
他日錦衣多稚子當軒下馬為君看

和幹克莊崇明三沙詩

三沙宛在海當中隱見珊瑚樹色紅神島由來連弱水
樓船欲去引剛風東方日出樵人國半夜潮生織女宮
却憶題詩繡衣使高秋曾過玉山東

和幹克莊題崇明官舍詩

海上開官署龍光夜獨明居民雜吳楚風俗異幽并琪
樹戎戎見雲飄箇箇輕飛塵如不到亦欲去逃名

和幹克莊題壽安寺詩

別島壓東溟沙黃草樹青金仙開紺闕玉女降珠庭龍
鉢波心獻蛟機雨外聽垂槎從此去為結候潮亭

和程小山春遊即事

小隊行春簇錦鞍海風習習射眸酸雲間僧寺鍾魚荅
雪後漁舟網罟寒曉挹東瀛窺若木夜瞻北極望長安
使君觀海難為水從此襟懷萬頃寬

和程小山留題壽安寺詩

公餘無事得相徉每笑浮生有底忙秋水魚龍歸澤國

春風花木護雲房，冒分東海安期棗。共接西池阿母觴，
聞道博桑有銅柱。長繩我欲繫飛光。

右前詩五首。崇明州朱庭瑞啓明二秀才來索和，刊
入郡志。

予總角時拜中岳仙伯於舍下，今已四十年矣。思
之如神遊紫府，見陶隱居累欲從之，而不可得。今
讀錢思復先生贈其子于匡山詩，不能不為之興。
懷遂次韻寓意呈思復匡山二先生云。

幼年曾揖浮邱伯，口談元經坐瑤席。我家老翁師事之，

授以神丹光五色憶從海上接盧敖汗漫騎鯨遊八極
至今佩劍瘞空山夜夜龍光射蒼壁高風可仰不可見
傳家只有床頭易鳳雛學道匡山中羽服翩翩瞳子碧
片玉峯頭長往來每嘆世情今匪昔錢塘故人七月來
共看新月如弦直舉杯邀月來酒中不知松露霑衣溼
山中之樂樂無央胡爾遑遑若行役作詩為答入山人
莫作長安車馬客

秋興十絕呈錢思復于匡廬袁子英

廉纖小雨逗微涼何處花風度暗香愛殺一雙飛翡翠

竝銜秋色過漁莊

又見涼生白苧衣
秋光全比去年非
閑身得似梁三伯
日日玉簪花上飛

西風忽起白蘋洲
吹落芙蓉幾瓣秋
快雨過晴涼似洗
鶉鴒啼在水西頭

絡緯專秋軋軋啼
西樓坐待月明時
梧桐樹上無多葉
莫遣涼風滿意吹

芭蕉細雨弄新寒
白髮高堂鏡裏看
無賴西風吹過雁
背翻秋色上淮安

自愛玉山深處居幽懷欲與世情疎近來交際渾多事
始信嵇康嬾作書

颯颯涼風吹芰荷虛庭正愛月明多秋聲忽在闌干外
驟雨滿池鳴綠波

玉山雲氣接蓬萊山下軒窗隔竹開金粟池頭衣帶水
聲聲引上轆轤來

淒風冷雨最關情灑向芭蕉不住聲獨有一庭書帶草
秋來猶伴鄭康成

溪上喬木老槎牙上有灼灼凌霄花碧雲四合月欲上

啼殺爭棲無數鴉

琦龍門為王氏孟德仲立求賦秋林讀書圖詩

龍門一別三月強忽然扣門登草堂盛言王家好兄弟
皎若丹邱雙鳳凰近向山中結書屋屋裏藏書三萬軸
門前一樹紫荆花堂背兩墩慈孝竹時當林麓西風起
木葉蕭蕭打窗紙簡編舒卷對新涼深夜篝燈日爭晷
大郎學禮可立身小郎學詩亦有成禕之懿之賢伯仲
元方季方難弟兄我生素有耽書癖忽聞此言深嘆息
未得扁舟逕造門秋林漠漠遙相憶邇來吳中閱閱家

養子不教從豪奢白狐之裘紫駟馬日日春風桃李花
從此荒嬉事輕薄盡把詩書束老閣老來對客始面牆
却悔青春不曾學君不見機雲學舍小如舟兄居東頭
弟西頭一朝同起仕晉室雲間名字垂千秋又不見韓
家學舍京師中當門只種青梧桐聯翩冠蓋可相望舉
世人呼兩相公似君之家亦希有千載讀書不窺牖壯
年才力正崢嶸功名冒落他人後聖元天子崇文儒明
年竝馬趨皇都大字雙懸龍虎榜為君題作登瀛圖

題龍門觀泉小像

龍門一鑄通青天傾厓束峽天梯連白雲萬疊吹不斷
上護一脈清泠泉泉飛如龍出山去石梁倒挂銀河懸
下方臺殿起突兀撞鐘擊鼓朝金仙道人齋餘憇寂寞
身披袈裟袒右肩面厓趺坐入水觀大千一息秋毫顛
天風泠泠響天樂舉頭忽散青松煙何人畫法追龍眠
塗朱點綠分清妍貌得空山定光相摩尼下照驪龍淵
我今焚香三稽首盥手摹勒青瑤鐫嗟予鬢髮久颯然
未能解脫塵世愆道人肯為一懺悔盡滌諸垢生青蓮
著我同坐盤石邊更論莊生秋水篇

送陳希文秀才北上

西風鞍馬古長洲，送子攜才事遠遊。
山割岷峨分地脈，水排淮泗合江流。
方今丞相南征日，似替周公北伐秋。
聖主築臺延國士，虎頭食肉定封侯。

自題繆叔民惠所畫讀書巢

自向江頭採白茅，山中結得讀書巢。
柳栽已發窺春眼，竹本初分帶雨梢。
曲水流花斜入塹，小橋憑岸直通郊。
未知何日從吾懶，且對青山誦解嘲。

和倪雲林所寄

十月清霜天始涼
家家砧聲夜擣裳
開書乃審近候好
問客兼知道味長
我尚笑談浮大白
君能服食事中黃
何當相過一相見
帶取奚奴攜錦囊

丞相出師口號

丞相出師秋九月
十月冬後到新州
南來驛騎雨哨尾
北去糧船風打頭
軍聲如雷震淮泗
殺氣上天干斗牛
早提髑髏見明主
四海一日同歌謳

次琦龍門所寄二詩兼東王氏兄弟

石橋北去路猶賒
竹裏開門是酒家
密密疎疎雲外屋

紅紅白白寺前花登山著屐思靈運落帽當風憶孟嘉
記得天池同勝賞歸來日脚已西斜

龍門壁立何巉巖海日照耀金爛斑爾言秋後山更好
我獨老來身未閑將攜綠玉杖九節去借白雲屋半間
為約王家兩兄弟日日賦詩相往還

和復翟文中知事

潯陽三世昔曾聞況汝才如五色雲去歲械詩承問訊
何時尊酒對論文京畿玉帛連綱入江嶼旌旗小隊分
筆硯書生供冗役每搔華髮倍思君

繆叔正郎中以漕事馳傳歷浙東諸郡渡大群小
羣二灘作渡灘歌見寄次韻復之

朝上灘暮下灘客行一日一日難飢蛟掉尾鰐捨齒奔
流百折何時已上灘萬篙進纔咫尺下灘回頭倏千里南
入粵東入甌灘流灘流去莫收使官乘檄過中流船頭
把觥船尾謳岸上村村似寒食店舍無煙人菜色賊圍
解去米如珠况復雨多傷二麥但願班師奏凱歌四海
同日休干戈野無烽塵水無風波大羣小羣將如之何
三二年來商旅難行畏途多棘政以為嘆徐君憲

以雪景盤車圖求題觀其風雪載道不能無感然
也遂為之賦云

山盤盤車逐逐大車前行後車促不愁雪裏衣裳單但
恐雪深車折軸行人歲暮心忉忉天寒馬疲牛腹朽日
落不知行路遙今年月尾度教鄙明年月頭過成臯二
月三月臨帝郊似聞物低米價高莫使終歲徒勞勞城
中貴客朱門豪狐裘繡襖紅錦袍琵琶合曲聲嘈嘈
房肉陣傳羊羔雪花迴風如席飄捲簾醉臉殷若桃豈
知人間衣食如牛毛

題徐公懋榦樹下放鶴小像

丰姿濯濯三春柳文采飄飄五色雲
未許仙家偕騏驎
榦樹下候靈君

題劉德方經歷西村圖次察士安御史韻

門前石子路三义正是西村第一家
牆缺遠山青入屋
簷均細柳綠藏雅坐臨流水堪垂釣
行入幽畦學種瓜
我亦桃源隱居者何時對雨剪燈花

琦龍門邀王仲立品茶有詩見寄云
踏雨過山來
喫茶瑛甚愛此句次韻以復

雞籠峯下爾東家破曉寫詩邀品茶秋風過樹落紅葉
夜雨滿溪流白沙浮缸蠟螳酒百斛插架牙籤書五車
嗟予有約不得去赤日畏途塵土遮

陳叔方寫竹一枝于春雪軒壁間龍門賦詩于左
瑛次韻寫寄

結軒正合背雞峯種竹哦詩也自工月夜滿林疑朔雪
秋聲入戶是春風題名聊紀一時興寫影當推八法功
若許扁舟徑相過爲君摘阮醉其中

寓居東郭風雨中辱王仲立叔正自山中遣奚奴

寄詩來和韻二首以復且招之過溪上時龍門同
在東郭

我愛君家好兄弟森森玉樹倚瓊林揮毫對寫閒居賦
促膝同歌梁甫吟牽牛蔓竹莖莖發薜荔懸松箇箇陰
問得書軒何處是雞籠峯下澗之潯

我愛君家好兄弟同處讀書秋樹林僕子囊書遠將至
道人把詩欣共吟十月清霜未為冷一日乍晴猶作陰
幾日扁舟過婁上須到狀元溪水潯

學圃亭詩為蕭元泰真人賦

學圃丈人蕭神翁黃冠羽服山澤容曾候青牛瞻紫氣
佩劍隱入東蒙峯南尋玉書探禹穴鞭霆叱電騎蒼龍
紫皇一日授瓊簡命主海上蓬萊宮蓬萊宮中春日好
碧桃滿地春風掃呼龍白晝耕紫煙種得玉芝與瑤草
五月五日手自收七月七日仙人擣擣成絳雪赤如丹
一服刀圭顏不老丈人元圃誰築亭彩霞為幕雲為屏
亭中夜誦黃庭經羣仙弭節空中聽霓旌飄飄衛九鳳
青都寄語遙丁寧賜以會稽外史號錫以翠羽流金鈴
我識丈人甫十歲示我琅函啟神祕飽讀山中石室書

碧玉丹章盡竒字謂我身中有仙骨晚歲相期供服事
大丹九轉今已成我獨胡為走塵世地肺采芝空避秦
武陵栽桃誰與鄰青門種瓜誠小隱東籬對菊何其人
彼皆與世或未合逃名潔已元非真何如丈人手種不
死藥不知人間甲子秋復春君不見朱仲李園三十六
歲收李子三千斛長安市上賣珠郎名在龜山九光錄
龍門與王仲立叔正同過草堂喜而賦詩

我別龍門強半月住在婁江之水湄客中見月動遐想
夢裏與君吟舊詩歸來不得一餉樂老去已成雙鬢絲

秋林弟兄有高誼扁舟到門如有期

是日瑛自婁江方歸而羣公之舟同及門矣故賦是詩也

次琦龍門草堂清集

銀燭華堂生夜寒深杯百罰起為歡翠盤行鱠傳冰縷
玉手分茶試月團故友別如三月久梅花折寄一枝看
還山倘若疏蓮沼好鑿龍門八節灘

王仲立遊華藏賦詩見寄次韻以復

聞君同過玉峯西盡日飲芳兼食菲懷人心與暮雲合

揮弦目送征鴻飛
淮西千里鳥絕粒
江南十月人無衣
安得風塵淨六合
馬上撓簫丞相歸

次琦龍門遊馬鞍山詩

馬鞍之山幽且佳
回巖疊嶺多僧家
雞鳴推窗看曉日
海色爛爛開紅霞
人言茲山出美玉
一草一木皆英華
石頭巖巖踞猛虎
藤蔓犖确纏長蛇
我昔春遊春日斜
山僧攜酒相邀遮
仙樂雲中降窈窕
天風松下吹袈裟
嚮師石屋憇蕭灑
一籬五色薔薇花
夜吹鐵笛廣公院
聯詩石鼎烹新茶
君今好奇良可誇
躡雲著屐追麋麇

詩成大字寫絕壁山靈衛護行人嗟歸來自駕白牛車
齊州九點元非遐下方盜賊聚如蟻視之不啻恒河沙

十一月二十七日霧中作

仲冬天氣暖如春忽見梅花思遠人黑霧漫天吹作雨
黃沙落地散為塵長淮千里連烽火西浙三年運米薪
近報大軍屯六合義丁日日點行頻

次西齋聽雨韻

今年臘月春未透窗前老梅方始花孤燈靜夜同聽雨
短夢此時應到家佳節明朝是冬至空江落日數年華

龍門歸去今成隱
冒寄活水來烹茶

十一月三十日冬至

今年南至子月盡宿霧不斂雲蒼涼愛日自添一線影
夜電忽開千丈光官府徵求苦到骨村落餓享寒無裳
近時南來持斧使盡是各部尚書郎

今年南至子月盡北風回暖似秋涼誰拈綵筆書雲物
我愛瓊杯泛酒光盤舞小垂纖玉手跕歌一色縷金裳
莫嗟青紫輕如芥好屬從軍白面郎

十二月初八日丞相自六合班師喜而有作呈秦

文仲秀才

百萬王師曉渡河江南民力已無多
鐃歌鼓吹軍前奏
渾脫蒲萄馬上馱
唐室籌謀歸李靖
漢廷功業數蕭何
書生亦欲觀文化再拜天階看舞戈

自題松下摘阮小像

山人愛著晉衣冠
手把月琴松下彈
貌得形容在丘壑
只緣才薄不勝官

臘月廿四夜姚子章省掾見訪小集西軒瑛與秦
文仲聯句以紀

今年臘月二十四有客乘舸下江村
顧雪從荔挺見三
白秦春到梅花露一痕
靚女當筵分豆粥
顧癡兒出戶
看執盆他時相見玉山裏
秦共說尊前語笑溫
顧

用前韻和呈姚婁東

今年臘月二十四風景頗似石壕村
斷岸雪消生草色
空江水落見冰痕
兒童共喜交年節
燈火爭燒老瓦盆
縣吏下鄉投府帖
相逢無暇說寒溫

臘月二十六日夜可詩齋夜集聯句時在座者于
彥成素子英秦文仲張大本顧瑛也

今夕迺何夕歲律已云暮更長燈燭明
顧夜冷冰雪冱
膝六巧薦瑞于封壤怒相妬簪盍各盡驩秦杯行不知
數肉臺春筍纖素法曲冰弦度紅淚泣風蠟張翠煙積
香霧鼎沸雀舌烹廟酒瀉龍頭注咿嚶轉鶯喉于蹢躅
踟躕步燕謔落語弇秦馳驅嘅行路計窮酋授首素車
墜費珠履風塵暗城郭張稼穡罄場圃憂傾漆室葵顧
咲分嬾殘芋天王狩河陽秦奸臣拒官渡濟時風雲會
于曠世龍虎遇前席宣室徵素下詔輪臺布凱奏杖杜
詩張諫諷校獵賦于羽舞兩階顧歌謠誇五袴時清仰

皇澤秦會少憶良晤春冰破微甲于夜月照寒素雲間
鶴鳴陸素吳下書堆顧疲袁髯似戟短于腹如瓠張也
鄉曲英顧秦亦廊廟具孔問邾子官張杜賞已公句睽
違念契闊秦茗芋寫情慄冉冉嘆駒馳素營營笑蚊聚
浮生草棲塵于虛名日晞露嗟彼噂沓徒顧有此和樂
孺用繼石鼎聯聊以寓所寓秦

右二十八韻是日懷陸良貴邾九成琦元璞也

題徐公憲載雪舟

山陰道上剡溪頭夜半失却王子猷梅花笑人不相見

至今脩竹風颼颼海虞徐卿隱者流以蒲作帆桂作舟
浩歌招隱疊疊不絕口迺以載雪大書標舵樓船中何
所有圖畫在左書在右船頭何所有三尺鯉魚千斛酒
客至漁童擊楫歌船尾樵青舞垂手或時浮琴川或時
泛笠澤不是浮家并泛宅一朝大雪夜填門忽憶阿婆
頭雪白中夜揚舲曉到家膝下稱觴壽群客一朝雪花
大一圍東郭有人御弊衣自披鶴氅上船去日暮與之
同載歸徐卿徐卿孝義有如此不數迴舟深夜裏匡廬
山人作文書卷端索我作歌書卷尾我家玉山深且遙

山中積雪暖不消君家丈人離山東結屋我亦倚山西
結巢去年臘雪厚三尺今年春雪一尺高雪中咫尺不
得會毋乃石頭路滑難相邀我今還君此卷增太息我
欲借君此舟載雪同遊遨

玉山璞稿上

三十一

三十二

玉山璞稿 至正乙未

玉山顧瑛

青玉案 彥成以他故去作此懷之

春寒惻惻春陰薄
整半月春簫索
旭日朝來升屋角
樹頭幽鳥對調新語
語罷雙飛却
紅入花腮青入萼
盡不爽花神約
可恨狂風空做惡
曉來一陣晚來一陣
難道都吹落

富春馮正卿其伯父古山父仁山結樓讀書名曰
來青古山登景定壬戌進士同張濡守獨松關濡

遁公與弟驢戰死樓敝復重葺之以盡卷尾

二馮讀書樓百尺富春山色開窗入文星絢爛照秋闌
劍氣崢嶸動寒碧長公死節獨松闕有弟驢者同其難
忠魂尚聞風雨夕馳突鏃馬撼獸鑲當時非無史官筆
國亂倉皇書不得於手宋季豈乏人天啟真人開北極
樓之結構五十年次公重葺修其椽黃金市書增萬卷
樓前大樹清陰還我與鍊崖期亦久吹簫騎牛古城口
為君持酒問張濡問濡家有茲樓否

和郊九成從軍詩時二月予以守闕妻上

洗甲東海水飲馬西江潮大風吹旗脚軍容愈飄姚戈
船踏櫓回月中橫短簫青袍富家兒髀裏肌肉消囚俘
獻六府以用報明朝

和秦文仲所寄就東郊九成

三月江南春事晚西枝花木恰芬菲燕尋舊壘歸華屋
魚趁新潮觸斷磯我亦自憐為客久君應不怪寄書稀
雲臺迂史如相問為說羈心欲奮飛

三月江南花事晚港上草色春欲迷勁弩射潮海水立
大旗翻風江日低隊簇錦韉塞永巷行分絳蠟照通閨

爭如歸去玉山裏期子共躡青雲梯

述懷

自笑閑身作散官也隨小隊簇金鞍江關月落烏啼早
海市春深雨氣寒殺賊有方多武備賑飢豈意屬儒冠
思家夜夜勞清夢幾日歸承菽水歡

和寄洪碧海兼柬袁仲博岳季堅

見說呼龍種石田今年瑤草勝常年仙花秀挹三危露
丹鼎香浮五色煙洗觥澗邊邀月飲拋書松下看雲眠
汝陽逸史知無恙閑看迂齋寫太元

代書寄岳季堅

忽驚使者下郊居起鎮危城備擣虛
半夜海聲江截斷一春花事雨驅除
朝騎生馬趨公府暮閱陰符校武書
只有計籌迂博士人來問我近何如

徐公憲載酒來慰寫寄于外史

四月西郊初雨晴飛花落絮兩冥冥
客中似我頭先白交際如君眼最青
江水又添南浦恨草堂自愧北山靈
徐卿載酒來相覓見說清齋寫道經

寫寄余方外

山陰道士紫雲裘向荷攜尊過我遊豈謂干戈頻在眼
更憐風雨又移舟
壚頭柳色猶牽恨客裏萱花不解憂
見說毘陵城下水近來匯合大江流

水軍謠

富家阿兒美且都紅絲綠縣金虎符爭誇殺賊取銀盃
髑髏擲還納大夫

富家阿兒如阿童操舟出海捉颶風七星對襟卷簷帽
賊中傳是水中龍

喜聞命相詔至喜而有作

鸞詔翩翩降帝旁江南赤子尚荒荒
鄴城月照雌雄劍淮甸星馳赤白囊
已見排山驅海若更須操矢射天狼
太平有象崇文治底用田家執戟郎

謾成

三月江南春尚寒花枝強半雨摧殘
通街不使新交鈔到處都添濫設官
虎士揮戈迴落日海神躍馬障狂瀾
畏途客裏能相見取醉高歌拔劍看

張景思同守西關蒙惠白鬣魚一尾
忽常呂二妓見適就留夜飲口占以記

閑居每羨鹿門龐忽爾移文守海邦厭聽潮聲無夜雨
喜看春色帶晴江白魚受釣供三尺翠羽穿花見一雙
騎馬歸來佳客在畫堂綠酒照銀缸

和瞿惠夫即事二首

澤國清和四月天不堪公事重留連受風燕子猶多語
向日葵花政取妍使者雨中乘驛至王師海上枕戈眠
腐儒不願黃金印舊業猶存負郭田

時事紛紛若聚沙自憐客裏度春華奸雄豈是池中物
狂妄眞成井底蛙山色空江雲障斷星芒垂野斗橫斜

寸心憂國慙無補兩鬢飛霜一半加

予以官守繫身七十日聞草堂松菊積雨半荒馬
上口占一律

我守西關七十日朝朝騎馬入城行草堂積雨荒松菊
水國無花少燕鶯赤子弄兵連百里雞人擊柝報嚴更
安能鑄劍為農器盡使閒田寸寸耕

金屏曲

錦堂龜甲泥金屏九枝蠟樹花熒熒四星當筵夜降靈
軍裝官妓雙娉婷歌轉嬌鶯舞輕燕五十朱絲瀉幽怨

瑞玉深杯割花片四月八日尊前勸沈香火炙毼氍毹紅
瑤罌水滴金銅龍猿翁劍杖擊滅燭蝴蝶交飛落寒玉
碧煙綠霧迷冶容花魂夜出闌昌宮畧湯醉浴雙芙蓉
牽雲曳雨留春風隨珎遺珥鬼妻拾向月咿啾白狐泣
桂旗行行去無跡雄雞雅雅呼日出

花兒中以弓矢受知大帥辟為親隨其所居曰孝
思筠室攜卷求題為書二絕

花郎每憶奉親時種竹當窗扁孝思新筍今年密如簣
竿竿盡刻蓼莪詩

挽强射的久知名見賊身如快鶻輕大府遶才居上選
傾城盡說得花卿

和許彥溫都事見寄

西郊草堂婁水上夏木晝陰車馬喧子為武官之虎相
我欲隱居無鹿門陶令醉歸五柳宅杜老愁憶浣花村
守關三月不得去屋裏候賓欣有孫

和卞室之靈慈宮對景有感

又向西郊揖馬鞭相逢不飲亦凄然登盤杏子紅於染
出水鮎魚白更鮮夜電引雷催雨至海潮平岸帶江連

客懷盡日無排遣自向南窗類斷編

覃維欽府祿雨中過草堂談宮詞樂府造語新麗
作詩以贈且期攜紅牙者同至

夜雨高堂生乍涼眞珠美酒艷紅光
香凝龜甲屏風上
水滴蓮花刻漏長
麗語盛傳今樂府
新詩多是晉文章
如公案牘能閑暇
攜取張家記曲娘

無題

惜春長欲與春期
薄倖東君信有私
花粉護房蜂祝子
芹泥葺壘燕巢兒
蜀娥恨織七成帳
吳女愁縈八繭絲

不寄回文機上錦空將五色染相思

望斷金鞍白鼻騮兒家門戶鎖春華牡丹紫拆初含蕊
豆蔻紅酣半吐花盼女樓中飛燕子來婆娑裏卜琵琶
雕籠鸚鵡休饒舌長是無人叫點茶

黃四孃家竹過牆日長愁斷九回腸
薜蘿蕪葉大思公子
萱草花開憶漫郎
鬢撲金蟬垂
蜀葉帶銜玉燕動丁當
自將團扇隨蝴蝶要打雙飛一道香

石城女子唱迴波唱入迴風思轉多
腸斷紫鸞分破鏡
淚拋紅豆溼輕羅
東游洛水思甄后
西望巫山憶楚娥

五色柔情絲萬縷夢魂長繫海棠窩

于彥成為山陰之行賦此以別

端陽明日是遺恨在懷沙客裏非無酒尊前不見花受
風憐舞燕得雨哭鳴蛙只憶山陰客孤帆去路賒

予逃名於吳淞江時于彥成將歸越上舟中有懷
冒將身事逐飄蓬鬻爵何緣到野翁老去滔滔嗟逝水
愁來咄咄坐書空一窗夜色長江裏十里雨聲清夢中
更憶會稽于外史行廚還在灤亭東

舟中寄婁東諸友

憶昨西郊嘆別離，扁舟便向雨中移。
行窮江水一百里，卧盡風波十二時。
到處好山皆可畫，近來新事不如棋。
殷勤寄語婁東友，歸日草堂重賦詩。

乙未書實和孟天暉都司見寄

江頭日日惜芳時，三月春光兩鬢絲。
拔劍自歌還自舞，邑人誰識虎頭癡。

治安無策濟時艱，始信金消壯士顏。
怪底颶風翻漲海，浪頭一直過狼山。

獵獵東風吹火旗，水軍三萬盡精肥。
一春殺賊知多少，

箇箇身穿濺血衣

婁上人家不識春
簷頭蛛網亦生塵
朱門桃李皆零落
只有東風未嫁人

隔屋征人去不歸
朝朝思婦泣春菲
大隄芳草連天長
莫信啼鵲怨落暉

海口潮聲挾雨來
西風一陣却吹迴
書生此日愁如洗
斫地高歌是莫哀

聞道君王日早參
每虛前席問江南
何人醫國如秦緩
有客能棋似李憇

盡說樓船水戰鏖西風烈火張天高一從赤壁爭雄後
千載功名只騎曹

大戶今年無老米細民近日有新錢街衢寂寂無車馬
風景淒淒似禁煙

梅雨今年多去年青秧白水漫平田端陽過了南風起
不見誰開漕運船

送方行已往松江參臻雲谷和尚

阿師法號號行已百里搖船弄新水玉山正月春始寒
不放風光到桃李桃李花開花未成一月都無五日晴

忽然而來遽然別把酒對春無限情無限情在何處細
雨蒼苔石頭路張帆又向雲間行水草青青飛白鷺雲
間古寺金銀開中有黃金獅子臺老禪宴坐揮玉麈談
空說有聲如雷阿師今年纔二十慧性豁開非面壁可
翁弟子數十人眼見阿師先入室僧中云是支道林况
復好詩仍好琴詩以繼風人之大雅琴以寫古人之素
心我欲留師十日住師竟掉頭不迴顧揮絃興逐孤鴻
飛囊詩脚踏春潮去春潮去暮即還矯首相思雲樹間
老我相從修淨土鑿沼種蓮歸故山

舟泊山塘雨中口號

海賊初退山賊連姑胥細民如倒懸只憂疫起在五月
豈意雨多如去年山光依微弄野靄水色慘澹凝愁煙
城中交鈔糶官米城外鼓聲催戽田

乙未五月口號

二月修城五月過修城不了奈城何只因一夜斜風雨
到曉都坍一半多

農家祈社種良田盡卜今年勝去年抱布貿絛都插遍
開門一夜水連天

成隊誰家青苧娘頭遮箬笠足如霜入城糴米不歸去
屋裏踏車人正忙

雨中賣魚無買冰沿村打鼓倚鮮秤二斤十貫新交鈔
只直倉黃米四升

堤頭放馬是何人兩兩三三輶作羣強把新錢買村酒
口稱曾去做苗軍

長歌寄孟天暉都事

憶昔春風吹少年繡衣驕馬珊瑚鞭錦堂絲管遲落日
青樓鶯燕迷花煙即今未老嗟當日坐卧使人倦行立

太平天下起干戈從此百憂如蝟集大兒服勤欲養親
擬卜草堂聊遠塵前年天子賜金虎命長千夫防海濱
百里離居將二載我復治生給不逮郭外薄田力作耕
原上柔桑訓奴採二親頭白笑語溫次兒行酒壻應門
有弟隔屋罕相見我婦日牽齧齧孫天子仁慈尚姑息
丞相南征興重役乘時餓虎晝喫人誰與蒼生繫休戚
民力不堪供奉董青盡用尚書丞新行交鈔愈澀滯
米價十千酬四升師出無功天子怒一朝遠放西河去
班師下詔慰黎元四海歌謠滿途路今年頑民起西山

帕首舉火燒閭闔城中六官奮六節凱歌馬上擒俘還
是時海寇集江下水軍殺之海為赭元戎不識予何人
起作區區守關者守關三月不得歸豈假威權屬布衣
自謂一身本無事又俾審理民間飢補官使者招入粟
一紙白麻三萬斛頻年官糴廩為空數月舉家朝食粥
時維五月梅雨多眼見青田生白波飢農仰天哭無食
今秋無成將奈何吳江漫漫風波急夜返扁舟及家室
坐看急電怒驅雷驟雨打窗愁欲泣我歌長歌行路難
聞者撫膺坐長嘆皇天流毒虐下土自此天下何由安

嗚呼自此天下何由安

陳敬初詩來問訊次韻以復

我別故人陳太邱住在婁江之上頭南風吹海大魚出
西日射地連山浮守關三月騎官馬聽雨十日對漁舟
緬憶行春共行樂如此好懷成夢遊

寄題桃溪吳浩然平遠樓

飛樓高立桃花溪溪上碧桃花滿蹊天邊湖水開簾入
雲外山巒到檻齊每見神龍挾子過曾聞靈姪向人啼
何時一舸當門繫醉倚闌干取次題

次韻吳東礪見貽

龍門盛說吳東礪投老心閑能好詩燕賓每出蕉葉簔
教子自唱柳枝詞山光隔野蕩晴靄水氣入林生碧滋
我亦桃源隱居者百里悠悠勞遠思

次龍門韻寄杪櫺室公孤月上人

曾向虎邱兼月住雪滿連山萬松樹于時始識公上人
日日相邀勞治具夜來有夢過僧房茶煮劍池春水香
杪櫺一樹花盡發覺來鼻觀生清涼今日龍門俄至此
邀我置身巖壑裏寄問東林遠法師著得武陵陶處士

八月十日與龍門飲于西樓口占一律以似

徙倚溪樓上西風欲暮天
亂雲依樹出落日向江縣驛
斷南來騎潮催北去船相逢誠不易對酒話當年

題柯敬仲畫梅花竹枝

死別丹邱老于今二十年
似看顏色在因有畫圖傳
瘦嶺一枝雪淇園數葉煙
令人春雨裏相對泣嬋娟

韋德珪攜詩見訪次韻以復

儒冠自笑不封侯猶向山中氣
食牛未見李邕思識面
若逢東野合低頭新詩爛寫泥金紙
美酒深傾藥玉舟

安得相逢王子晉月明笙鶴過丹邱

聽雨二絕

涼風颯颯下庭皋落盡梧桐雨未消只道秋涼無著處
元來多半在芭蕉

生憎秋暑不肯退入夜飛蚊猶更多不是涼風吹雨急
終宵無復奈渠何

秋興二絕

短檠照夢獨闌情七月江南尚甲兵此夜書生愁裏聽
秋風秋雨盡軍聲

草堂秋靜絕埃塵
日日門迎車馬賓
獨嘆庭中雙棗樹
今年無子惠比隣

和繆叔正見寄就東秦文仲

八月新涼入袂衣
阿郎騎馬到門稀
山中有客論秋水
江上誰家歌采薇
野鶴步月作人立
木葉受風如鳥飛
寄訊勘書秦太史
木犀花開猶未歸

次姜羽儀韻二首

落葉滿林啼亂鴉
不堪何處起哀笳
忽於半夜驚時序
又近中秋看月華
射石楚生空訝虎
縣弓廣客獨疑蛇

何時得似青門隱十畝山田盡種瓜

草堂八月暑微微竹裏哦詩晝掩扉過雨秋花如我瘦
未霜溪蟬為人肥長教肘後黃金印不到山中白苧衣
正爾西風動愁思又驚飢雁渡江飛

鄭君舉府掾分幕西關次韻以寄

掾郎自愛西郊幽大旗卓地臨清流坐占柳陰臨晉帖
行穿花裏佩吳鉤橫槩賦詩我所愛擊拆抱關誰與傳
何當案牘假餘暇同載玉山佳處遊

次君舉西郊即事

西枝之村不數里扶醉與君清夜遊三更落月照官舍
八月涼風吹客舟簾葭蒼蒼始愛露絡緯軋軋尚專秋
兵戈在眼不甯退安得置身同一邱

蔡山人隱居

蔡家隱居絕蕭爽鑿塹引水環幽深當門十里荻花浦
繞屋一林斑竹陰維艇正看黃葉落開尊時對白鷗斟
畏途別去罕得見且醉西風傾素心

題袁仲長仙史綠筠軒

仙家住在簞簞谷箇箇琅玕護石扉委佩靜聞蒼雪落

梳頭閑看綠雲飛月中王子吹笙過林下壺公策杖歸
若許迂疎逕相造為君攜取四弦揮

題劉商觀弈圖

四老松根角兩棋野人如鶴立多時箇中便是商山樂
世上剛傳石室竒一劫尚教遲黑子千年何用刻銀絲
老坡好事能題識永配蘭亭玉枕碑

題袁外史德潤堂

君子有令德於焉潤其身況彼學仙者逍遙巖壑春華
宇構層阿稽首延玉賓綠窗生紫煙珠樹散芳塵道藏

五千卷進業維日新味元葆沖和養素全天眞願言崇
靈澤永永流後人

計籌杜丹卹眞人以雜詩卷俾岳季堅來草堂索
詩就次卷中甘允從三絕

欲向丹卹借白雲瑤壇稽首玉晨君只愁俗眼無多力
不識琅函石室文

聞道通元似祖洲羣仙於此盡遲留剛風不到天根上
夜夜丹光五色流

紫雲闕下紫雲橫瓊秀亭前壁月明欲借芝田雙鶴子

來聽仙史醉吹笙

題石魚為杜丹邱真人賦

仙人有靈玉渾然神鯉形曾作大鯨吼振鬣徙南溟

靈辟

石魚元高侯彥敬得之徑尺而鱗鬣口目具焉侯遺南
谷杜真人真人仙去為月溪王真人持去月溪羽化復
為杜丹邱歸之

和荅呂養浩

搏虎南山膽氣雄男兒壯志本來同却將短卷描蒲女
又把新詩寄敬中夜月浙江何日渡秋風淮甸幾時通
要當挾策見天子共看扶桑曉挂弓

就次韻荅諸葛用中

鄧城遙識劍雌雄自古相知博物同
向見袁安來舍下始知諸葛隱隆中
林泉竹里詩曾賦舟楫桃源路可通
殺敵豈能無猛將逢人莫問楚王宮

中秋寓盤闕適諸葛用中邾士林秦文仲龍門子
英同會就留賞月分賦蓬字

中秋又在客邊逢莫嘆流光轉斷蓬
老子固當清興發故人相見好懷同
酒涵大地山河影身置廣寒宮闕中
明日更期維白舫共扶殘醉倒詩筒

題唐人牽馬圖

舞馬誰牽下木牀
絳纓初解玉丁當
梨園莫唱傾杯樂
錯把春風屬八坊

題三生圖

三生石上舊因緣
也是山僧也是仙
記得分明都不說
從他月照葛洪川

題相馬圖

神駿從來不受羈
僧中只有道林師
若教腳迹踏天下
後代何緣得馬兒

君臣同慶樂送脫因萬戶

唐樂志君臣同慶樂一曲貞觀中蘇定方執賀魯李
勣平高麗獻馘奏凱四曲之一也其詞曰主聖開昌
厯臣忠奉大猷君看偃草後便是太平秋瑛三復是
章不勝撫膺方今四野多壘海波橫流黎甿苦於誅
求國賦艱於饟運而聖天子端居九重累下寬詔以
慰元元之望又選樞密院斷事官脫因公為漕侯理
海運公盡勞王事三年吳米畢達京邑至正乙未春
賊起新豐踰楓橋抵閭闔將入城肆殺掠公不以有

司之事為彼任首決大議率衆殺賊以全吳城豈非
奉大猷為聖天子佐昌厯者也以公之才之忠設聖
天子命之誅羣惡則大平之秋可待瑛謹葺長短句
引其意使吳民歌以報公公之恩德固不在下士鄙
語美之然欲希公之聽庶知婁東野人亦知公之萬
一云

盛哉世祖馬上開皇封鍊馬蹴踏萬國空奉琛獻璧被
聖化黑海之水直與銀河通百年禮樂武備弛生民有
眼不識戈與弓邇來花山豎兒起微釁延蔓長淮千里

帕首多如蠡巨鯨吞舟波浪白落日壓山旗幟紅城非
不高官不守所至赤子戢戢為沙蟲江南供需民力竭
家家喬木生秋風兵興之際天子之憂在海運所以遴
官理漕御筆大書除我公公才磊落固是匡贊具况復
讀書有志文武充推心置人人亦樂為用不以細故芥
蒂於其胷三年東吳稻米抵都邑丹宸一一標全功今
之人食君之祿不能為君盡大節臨難畏避憂沖沖國
之重事天下繫豈可責分彼已不得竭效臣子忠且如
今年春盜賊起新豐四更急撞關聚譟舉火攻議者孤

疑計莫出公曰此賊已墮吾掌中瞠目拔劍斫長案有
違令者當與此案同議兵一千人袒臂如雲從軍聲如
雷震闕出橫鉞自主天前衝日炙龍花上金甲猩紅纓
拂胡青驄手挽強弓發猛矢射殺西山雙白熊野天秋
高蒼翠健凌兢狐兔無潛蹤縛俘載馘振旅入城去短
簫奏凱擊鼓聲鑿鑿城中居民比屋四十萬長街廣巷
羅拜父老婦女兒與童咸言受活無以報兩手加額願
公五福全而崇汲黯發粟漢廷實元老毛遂歆血戰國
推談宗如公者總二子之才斷豈非聖元國孕之所鍾

誰能排雲叫九重有臣如此天子何不召入明光宮大
啟元戎十百乘授以斧鉞出以誅羣兇坐見功成舞干
報天子邦基式固河山雄婁東野人拜手重稽首期公
致君堯舜動業齊變龍謹歌君臣同慶樂千秋萬歲永
永傳無窮

題雲山圖有感

樹密嵐光薄山空雨氣酣阿誰亭子上對坐說江南

題子昂畫楚江春曉

東方旭日出瞳矐照見巴江曲似弓莫遣猿聲到巫峽

山頭猶有楚王宮

雪姑吟題朱澤民所畫雪姑鳥

雪姑鸚鵡洲邊住自小無心事機杼一身悔嫁白頭翁
日日孤棲不知處立傍溪頭楊柳枝春風雅舅欲相依
不聽杜鵑好言語勸姑在外不如歸姑不見韓朋樹上
相思雀雙宿雙歸雙又飲啄

天寶宮詞十二首以寓所感

天寶雞坊寵賈昌不教蝴蝶上釵梁錦裯晝浴天驕子
絳節朝看王大娘芍藥金闌開內苑蒲萄玉觥酌西涼

月支十萬資。臙粉獨有三姨素面妝。

五家第宅近天家。侍女都封繫臂紗。池上桃開銷恨樹。
閣中香進助情花。風迴輦道鸞鈴遠。日射龍顏雉扇斜。
韓號竝騎官廐馬。醉攬丞相踏堤沙。

蓮花池畔暑風涼。玉竹迴文寶簾光。貪倚畫屏巢翡翠。
誤開金鎖放鴛鴦。輕綃披霧誇新浴。墮髻歌雲銜晚妝。
笑指女牛私語處。長生殿下月中央。

五色卿雲護帝城。春風無處不關情。小花靜院渝吹簫。
淡月閒房背合箏。鳳爪擘柑封鈿合。龍頭瀉酒下瑤罍。

後宮學做金錢會香水蘭盆浴化生

龍旂孔蓋擁鸞幢步輦追隨幸曲江鳥道正通天上路
羊車直到竹間窗桃花柳葉元無恨燕子鶯兒各有雙
中貴向人言近事風流陣裏帝先降

秘閣香殘日影移燈分青玉刻盤螭琵琶鳳結紅文木
弦索蠶絲綠水絲金屋有花頻賭酒玉杵無子不彈碁
傳宣趣發明馳使南海今年進荔枝

近臣諧謔似枚皋侍宴承恩得錦袍扇賜方空描蛺蝶
局看雙陸賭櫻桃翰林醉進清平調光祿新呈玉色醪

密奏君王好將息昨朝馬上打圍勞

號國來朝不動塵障泥一色繡麒麟朱衣小队高呵道
粉筆新圖徧寫眞寶雀玉蟬簪翠髻銀鵲金鳳踏文茵
一從羯鼓催春後不信司花別有神

十三女子壁壘簇選作梨園第一流却道荷花眞解語
豈知萱草本忘憂紅鸞不照深宮命翠鳳常看破鏡羞
舞得太平并萬歲五年誰賜錦纏頭

五王馬上打毬歸羸得宮花獻貴妃樂起閭門邊奏少
禍因臺寺諫書稀侍兒隨掌皆頒紫散子蒙恩亦賜緋

姊妹相從習歌舞何人能製柘黃衣

新製霓裳按舞腰笑他飛燕怕風飄玉蠶倒卧蟠條脫
金鳳斜飛上步搖雲母屏前齊奏樂沈香火底竝吹簫
只因野鹿銜花去從此君王罷早朝

宮衣窄窄小黃門躑躅初開賜縹盆夜月不窺鸚鵡冢
春風每憶鳳皇園愛收花露消心渴怕解金珂見爪痕
只有椒房老宮監白頭一一話開元

題姪良用臨趙魏公霜浦漁舟圖

曉霜靜落蘆花裏漁父拏舟弄荇水平岡雜樹淨無煙

夾浦亂山青似洗翰林是時始歸老最愛漚波亭子好
坐窗援筆寫江南一段秋光落揮掃不知傳世今幾年
百金酬直不棄損虎頭猶子亦癡絕生紙一幅能模傳
前年之官去東浙作贄殷勤贈云別為將老眼細摩挲
頗似唐人臨晉帖咄咄八法皆逼真獨於妙處難其神
蘭亭贗本永寶世藏護不減囊中珍今我不樂居溪上
客有龍門遠相訪共披此卷遣閒情眼底澄江動晴浪
嗟今南北皆干戈清風日少紅塵多磨穿鏤研不得志
拔劍斫地空高歌何似長竿在吾手多向船頭載新酒

寄謝故人顏太師莫向煙波尋釣叟

題韓熙載縱樂圖

文公避難肆荒淫買妓朝朝散俸金
客有舒生能按節如何不畫獨絃琴

金粟影亭懷于彥成五十韻

八月玉山上桂花千樹黃或依松下石多亞竹邊岡葉
帶寒煙重陰連宿霧張疎葩跼裏見小蕊萼中藏偃蹇
當危檻婆娑覆短牆畫闌縣瘦影金粟散幽香皓魄穿
虛幌樛枝倚曲塘臨流清可愛著雨溼何妨丹鵲排雲

三、美由司

步障呼下踏謡娘按曲歌桃扇圍棋勝紫囊芙蓉連蒂
葺橘子並頭嘗弋鳥驚逢驚雷魚喜得魴娉婷行鑿落
弦索奏鴛鴦翠袖擎燈燭銀鈎寫樂章閑談矜漢語嫚
罵據胡牀屢舞袁千里聯詩顧辟疆至今猶想像此際
謂尋常俯仰經三載干戈滿四荒名慚徵士起職愧守
關忙接境無雞犬當途正虎狼何期雲出岫竟逐雁隨
陽世事憐多變人情既可傷睽違誠草草音問太茫茫
去日應愁暑今朝已喜涼轉頭誠久別矯首獨相望越
上秋方好巖頭樹亦芳猶聞留鑑曲未報渡錢唐晞髮

當天姥題詩寄草堂身棲衆香國夢遶百花莊適意多
行樂歸期久相忘灤西亭子好幾日促輕裝

至正乙未十月二十六日讀書舍會合聯句

王歷十五載陽月廿六夜嚴節增淒厲顧暮畧易推謝

宿莽委中園素驚歎納虛榭集鳳萃時彥恢鳴騶駐華

駕襟分念契閣盧簪盍樂休假紺錦詩在囊顧籤軸書

紉架唳吭宵警清素宿羽風聲乍霜階殞葉積恢露石

泣花亞明星光粲燈盧溜雨寒落醉喚婦給膳庖顧命

童肅迎迓破橘香在枝素冒魚水回汎膾飛雪縷盤恢

酒豔霞流竿奏馮牙拍節盧樂度冰絲借吳風語柔麗
顧楚雲秀嬌姹春喉弄鳴鶯素塵鞿舞飛鷗炭呀朱火
獸恢香歆博山麝煮茶龍頭鑄盧噉肉牛心炙甲鉅房
剖栗顧吻渴漿沃蔗蔕時歎合并素深情勞慰藉憂葵
終念魯恢逐鹿窮爭伯群妖樹白挺盧黔首帕紅鬃流
馬曉渡瀘顧細柳夜屯灞一戈魯陽揮素三箭天山射
跳躍突精騎恢彎弓控強殲斬馘刃割羊盧歐毒火焚
蟻威聲淮蔡功顧佳氣舂陵咷降納慎撫綏素違傲母
貸赦獻凱捷書旋恢班師令旂禡銘鼎會勒勲盧賜金

那吝價色絲組雲宸顧鍊石補天罅事國宜盡瘁素奮

身不遑暇終朝帝業隆恢喜見綸言下苗格階舞干盧

夷貢布輪幪明時歌再康顧此日酒頻貫詩弭序毛齒

素觴令笑機獲酤玉山頽恢傾倒縣河瀉行嗟阮籍

途盧耕學樊遲稼聯次石鼎句顧咏紀讀書舍雪繭筆

絢花素銅盤燭燒樺駒隙恣窮險恢蟻聚散炎憂願得

解甲兵盧庶以事桑柘永齊白首民顧擊壤頌元化顧

至正乙未十月廿九日玉山中玉毬花開飲酒花

下時琴川妓秀雲在焉

十月兵戈未肯休，為將綠酒滌煩憂。
美人笑解金條脫，獨樹花開玉繡毬。
冷豔尚含春雨露，閒情猶帶舊風流。
喚回蝴蝶團香夢，睡隔梧桐落葉秋。
化力豈教司后土，樂聲底用打涼州。
廚中儘有逡巡酒，勝賞何妨日日留。

寄張彥宏進士

聞道風流張聘君，俊才絕似鮑參軍。
玉壺滿貯三危露，丹鳳高騫五彩雲。
笑倚月中金粟樹，醉招花下石榴裙。
幾時同下秦廷榻，剪燭聯詩坐夜分。

送韋伯圭教諭富陽

古城元聖宅正在富陽山水落魚梁出峯迴鳥道環先生施教去弟子讀書還應過嚴陵廟看碑拂蘚斑

漫成

未知曾解太平圍獨嘆時光在眼非黑海水寒魚到少玉關風急雁來稀軍中盡說廉頗老口裏新傳趙孝肥愁見嚴霜落紅葉行人何處寄征衣

送王叔正贊親

新婚王郎實我弟閱閱世家金葉儒種玉求妻知雍伯乘龍作壻見淳于兔絲女蘿附脩竹翠鸞青鳥集高梧

何以贈之九子墨更祝少君勤事姑

乙未冬至口號

乙未南至節候好晴日暖風如早春既占雲物卜來歲
又見梅花喜似人寒溫叙語拜孫子綵服稱觴娛老親
只憐舍弟不在眼更憶大郎鏖戰塵

安別駕殺賊紀實歌

至正十五年冬十一月廿六日崑山之石浦村有賊
黨殺土豪胡氏父子及孫火其屋掠其妻女財物巢
于村之無相寺將有助逆之意州尹于闐彥暉公外

示以安至次月廿三日假以他事詣訴于郡郡官聞
于分省參政公以本郡治中安公行勦伐事公即率
親隨精兵快馬聲言發常熟乃銜枚夜行至眞義里
分符俾瑛與陳志學各選水軍協力剿捕時廿四日
夜廿五日早過江令集千墩寺寺之去無相寺廿里
州尹率水軍自此西進義士張漢傑奇領各募義丁
分把去路治中公自江北浮馬直入賊巢擒賊焚寺
令軍而回是夜已半此行也計官軍五百水軍六百
民之袒肩者千有二百人往返者再宿生擒首賊二

十有六殺死焚死者無算脅從者貸之得米若干石
銀若干錠他物稱是實用兵神速之力也璘泰從軍
幕中謹歌長歌一章以紀其事且美治中公能奮勇
倣忠報國也歌曰

君不聞趙雲開關下長坂蜀主謂之一身膽又不聞李
廣衝敵勇冠羣軍中號曰飛將軍二千年間幾人亞復
見西河安別駕別駕今年二十六燕領虎頭目如畫春
來殺賊西閭關手中寶刀龍爵鏐胯下一疋雪色馬滿
身血濺桃花斑吳淞江南歲將莫有賊殺人團黨聚心

期絳帕接刀兵日費黃金置旗鼓州尹慮久除剪難中
藏長策外示安曉張大榜諭渠首夜裏飛章聞郡官別
駕因之白參政授以兵符口傳令帳前五百繡衣人疾
走銜枚涉泥濘草堂擊柝報二更軍吏扣門提水兵揀
精揮勇得三百戈船踏櫓隨潮行遲明下令千墩集最
喜打頭風雨急二十四馬渡長江直擣賊巢擒賊出手
拏步挾馬上馱髯胡摩笛烏烏歌歸來火光燭天地卸
甲共傾金叵羅鉦鼓遙遙入城去父老歡迎滿途具
慶堂中散賜金父候兒歸兒拜父百年一門絕代無父

領太尉兼大夫眼前有子乃如此將相雙全忠孝俱今
年大家盡無米小家嗷嗷食糠粃水田百里生白波蔓
草不除春不已經濟正在艱難時花卿姓名齟齬知勿
謂一身自年少繫此大郡之安危兵家行兵貴料敵重
地無人戒深入王翦伐荆六十萬司馬擒孟繚八日西
河別駕眞英材貂蟬定向兜鍪來一心成功報天子天
子已築高高臺書生從軍居幕下粉面聊為萬一謝作
歌更紀殺賊時乙未季冬廿五夜

崑山知州坊侯平賊詩

美哉太守于闐氏自是明時瑚璉器朱旛阜蓋來是邦
正值兵戈紛擾際東鄉瀕海賊已殘西鄉平地翻波瀾
家家門戶鎖蛛網征需百出無時安蒞政黃堂十二日
亭長馳書如雨急江南賊起夜殺人虜妾攘妻火廬室
耿耿古寺深且幽白晝縱飲羣聚麀寶刀傳令割白馬
銅盤歃血槌烏牛聲言濟江過江北守也聞之不形色
于時絳帕接近郊縱有官軍擒未得披衣曉登江上舟
雙童擊楫歌中流詣巢微服語慨切責以大義安其酋
□□□□□□□□吐胷中治安策叩頭拜受銅虎符

分得帳前軍五百西河別駕來主軍快馬馳突夜躡雲
雕弓三隻翠羽箭繡袍五色龍花文分令銜枚渡江水
三千義軍同日起軍容斬斬不可當首尾長蛇行十里
大旗獵獵翻朔風血染吳淞江水紅殺氣滿天化為霧
牽雲帶雨寒迷濛啾啾舊鬼銜冤哭砲石飛聲撼坤軸
黃髮碧眼老毡毼手挾生俘生啖肉火炎樓閣千丈高
奮大衝擊氣愈豪快鶻一舉不回顧窘兔三窟何由逃
逢逢鼓打回軍樂箇箇渠魁馬前縛羶房夜坐紅氍毹
美酒千杯金鑿落我守審錄明如神有罪不及註誤人

向非不滅造惡者九泉抱恨何由伸是行用兵最神速
餘子高談空碌碌計程數百倍道行往返都來渾信宿
中原處處無完城江南日日青草生土官如守報天子
四野豎兒何足平書生從軍亦何補但願執鞭安此土
既看劍斬長橋蛟更須矢射南山虎只今郡官皆大材
六參分省堂堂開要當努力盡撫事千載薰黃今復來
君不見北來丞相坐南省便宜除官至三品考功端合
陞上階不待飛章九重請

岳季堅自計籌來飲于雪巢口占二絕

江上北風初厲寒雪巢賓客話團欒花開一箇枇杷樹
明日持盃做雪看

江上北風未成冷雪巢無雪奈冬何老子若來遲半月
定看雪似去年多

次王仲立歲夜見寄口號

澤國江空歲晏天人家雪沒斷炊煙田田白水深三尺
未卜新年勝舊年

寄城南彈箏美人

裊裊婷婷十五時雙鬟低躲綠雲垂桃花貪結春風子

錯恨當年杜牧之

銀甲彈箏玳瑁筵新聲翻在十三弦
綠雲忽逐梨雲去
夢隔梅花月子圓

曾將螺子染金篦為補春山八字眉
最是橫波流太急
不容舟楫渡江遲

雪作肌膚玉作神黃金幾欲買青春
只因變却龜兒卦
到底東風錯嫁人

送韋道寧閩憲奏差

閩中第一東南會
海市環山聚船舶
商五月炎風開茉莉

三州瘴雨溼檳榔行人日日隨驄馬悍吏時時避繡裳
見說石門堪隱世羽書不到止戈堂

送姚以善陞浙東帥閫

漕府服勞陞帥閫臨歧送別更題詩兵戈尚爾連千里
鞍馬毋煩事四馳城上風高聽刁斗海邊日出見旌旗
虎頭猶子如相見說我于今老更癡

題趙子昂畫琅玕竹

我有一疋撫州紙愛之不減鶯溪綃學士放筆作直幹
此君如玉多清標梁王宅裏月皎皎山簡池上秋蕭蕭

腸斷江南鉞鉤鎖鳳鳥不來今寂寥

題春勝遊圖

憶昔醉看天平山龍門日炙春爛斑
茶煮白雲亭子間頻年甲兵蔓南北
未卜此身能再閑

送周天蟾

天蟾子布衣儒家在金陵市上居
年方十五習孫吳二十作賦擬三都
揣摩讀成不下蘇猿臂豹頭七尺軀
膂力絕人世所無擊劍慣騎生馬駒
結客况結專設諸手提鉞杖歷方輿
道逢異人毛莫如口咬皇極元元書
摩

盪動靜皆潛虛豁然一悟忠義俱不向侯門曳長裾誓
與天子守皇都至正壬辰秋月初紅巾寇抗數萬餘斬
闕據嶺袒臂呼大參董侯奉虎符延君幕下參軍謨布
以長陳緣平途乃張左翼伏石肱君居中軍三擊桴黃
旗赤幟紛前驅傾巢擣穴擒其俘徑歸田里耕而鋤浙
垣校功奏王除不曰弓旌駟馬車皇皇使者來草廬水
軍開府東海隅大帥待君猶鳳雛江左未必無夷吾試
君新翻水戰圖丈夫抱才不設攄徒令後世空嗟吁春
江花開當酒壚壚頭酒價如珍珠為君豈惜滿眼酤手

折楊柳歌吳歆作詩送君語非謾不信問之秦太迂

去年秋九月天蟾先生過余草堂偶談及水軍事余
謂水戰之法甚難蓋舟楫有遲速風水有逆順故不
能齊其隊伍先生自言近以八陣圖法翻製水戰陣
圖一十有八予以兒輩長千夫領寧海所事或有所
用求之未獲示誨今先生以大帥之招復至海上聞
下榻泮宮遂往見之而先生又御風西遊矣陳性之
訓導出贈行冊求予詩其出處隱顯文仲秦先生已
序之予復何言重違其意為長歌一章以歌之文仲

「三」玉手

「三」

性嗜書有書迂婁江人稱為太迂先生云今年實至
正乙未后正月十日玉山顧瑛謹識

玉山璞稿下

